

---

# Shri Ram Charit Manas

## श्री राम चरित मानस

### Document Information

---

Text title : Shri Ram Charit Manas - Ayodhyakand

File name : manas2\_i.itx

Category : raama, tulasIdAsa, hindi

Location : doc\_z\_otherlang\_hindi

Author : Goswami Tulasidas

Transliterated by : Mr. Balram J. Rathore, Ratlam, M.P., a retired railway driver

Description-comments : Awadhi, Converted from ISCII to ITRANS

Acknowledge-Permission: Dr. Vineet Chaitanya, vc@iiit.net

Latest update : August 28, 2021

Send corrections to : sanskrit at cheerful dot c om

---

This text is prepared by volunteers and is to be used for personal study and research. The file is not to be copied or reposted without permission, for promotion of any website or individuals or for commercial purpose.

**Please help to maintain respect for volunteer spirit.**

---

Please note that proofreading is done using Devanagari version and other language/scripts are generated using **sanscript**.

---

February 13, 2024

*sanskritdocuments.org*

---

श्री राम चरित मानस



श्रीगणेशायनमः  
श्रीजानकीवल्लभो विजयते  
श्रीरामचरितमानस  
द्वितीय सोपान  
अयोध्या-काण्ड  
श्लोक

यस्याङ्के च विभाति भूधरसुता देवापगा मस्तके  
भाले बालविधुर्गले च गरलं यस्योरसि व्यालराट्।  
सोऽयं भूतिविभूषणः सुरवरः सर्वाधिपः सर्वदा  
शर्वः सर्वगतः शिवः शशिनिभः श्रीशङ्करः पातु माम् ॥ १ ॥

प्रसन्नतां या न गताभिषेकतस्तथा न मम्ले वनवासदुःखतः।  
मुखाम्बुजश्री रघुनन्दनस्य मे सदास्तु सा मञ्जुलमंगलप्रदा ॥ २ ॥

नीलाम्बुजश्यामलकोमलाङ्गं सीतासमारोपितवामभागम्।  
पाणौ महासायकचारुचापं नमामि रामं रघुवंशनाथम् ॥ ३ ॥

दो. श्रीगुरु चरन सरोज रज निज मनु मुकुरु सुधारि।  
बरनउँ रघुबर विमल जसु जो दायकु फल चारि ॥  
जब तें रामु व्याहि घर आए। नित नव मंगल मोद बधाए ॥  
भुवन चारिदस भूधर भारी। सुकृत मेघ बरषहि सुख बारी ॥  
रिधि सिधि संपति नदीं सुहाई। उमगि अवध अंबुधि कहूँ आई ॥  
मनिगन पुर नर नारि सुजाती। सुचि अमोल सुंदर सब भाँती ॥  
कहि न जाइ कछु नगर बिभूती। जनु एतनिअ विरंचि करतूती ॥  
सब विधि सब पुर लोग सुखारी। रामचंद मुख चंदु निहारी ॥  
मुदित मातु सब सखीं सहेली। फलित बिलोकि मनोरथ बेली ॥  
राम रूपु गुनसीलु सुभाऊ। प्रमुदित होइ देखि सुनि राऊ ॥

दो. सब कै उर अभिलाषु अस कहहि मनाइ महेसु।

आप अछत जुबराज पद रामहि देउ नरेसु ॥ १ ॥

एक समय सब सहित समाजा। राजसभाँ रघुराजु विराजा ॥  
सकल सुकृत मूरति नरनाहू। राम सुजसु सुनि अतिहि उछाहू ॥  
नृप सब रहहि कृपा अभिलाषेँ। लोकप करहि प्रीति रुख राखेँ ॥  
तिभुवन तीनि काल जग माहीं। भूरि भाग दसरथ सम नाहीं ॥  
मंगलमूल रामु सुत जासू। जो कछु कहिज थोर सबु तासू ॥  
रायँ सुभायँ मुकुरु कर लीन्हा। बदनु बिलोकि मुकुट सम कीन्हा ॥  
श्रवन समीप भए सित केसा। मनहुँ जरठपनु अस उपदेसा ॥  
नृप जुबराज राम कहूँ देहू। जीवन जनम लाहु किन लेहू ॥

दो. यह विचारु उर आनि नृप सुदिनु सुअवसरु पाइ।

प्रेम पुलकि तन मुदित मन गुरहि सुनायउ जाइ ॥ २ ॥

कहइ भुआलु सुनिअ मुनिनायक। भए राम सब बिधि सब लायक ॥  
सेवक सचिव सकल पुरबासी। जे हमारे अरि मित्र उदासी ॥  
सबहि रामु प्रिय जेहि बिधि मोही। प्रभु असीस जनु तनु धरि सोही ॥  
बिप्र सहित परिवार गोसाईं। करहि छोहु सब रौरिहि नाई ॥  
जे गुर चरन रेनु सिर धरहीं। ते जनु सकल विभव बस करहीं ॥  
मोहि सम यहु अनुभयउ न दूजेँ। सबु पायउँ रज पावनि पूजेँ ॥  
अब अभिलाषु एकु मन मोरें। पूजहि नाथ अनुग्रह तोरें ॥  
मुनि प्रसन्न लखि सहज सनेहू। कहेउ नरेस रजायसु देहू ॥

दो. राजन राउर नामु जसु सब अभिमत दातार।

फल अनुगामी महिप मनि मन अभिलाषु तुम्हार ॥ ३ ॥

सब बिधि गुरु प्रसन्न जियँ जानी। बोलेउ राउ रहँसि मृदु बानी ॥  
नाथ रामु करिअहिँ जुबराजू। कहिअ कृपा करि करिअ समाजू ॥  
मोहि अछत यहु होइ उछाहू। लहहिँ लोग सब लोचन लाहू ॥  
प्रभु प्रसाद सिव सबइ निबाहीं। यह लालसा एक मन माहीं ॥  
पुनि न सोच तनु रहउ कि जाऊ। जेहिँ न होइ पाछेँ पछिताऊ ॥  
सुनि मुनि दसरथ बचन सुहाए। मंगल मोद मूल मन भाए ॥  
सुनु नृप जासु विमुख पछिताहीं। जासु भजन विनु जरनि न जाहीं ॥  
भयउ तुम्हार तनय सोइ स्वामी। रामु पुनीत प्रेम अनुगामी ॥

दो. बेगि बिलंबु न करिअ नृप साजिअ सबुइ समाजु।

सुदिन सुमंगलु तबहिं जब रामु होहिं जुबराजु ॥ ४ ॥

मुदित महिपति मंदिर आए। सेवक सचिव सुमंत्रु बोलाए ॥  
 कहि जयजीव सीस तिन्ह नाए। भूप सुमंगल बचन सुनाए ॥  
 जौ पाँचहि मत लागै नीका। करहु हरषि हियँ रामहि टीका ॥  
 मंत्री मुदित सुनत प्रिय बानी। अभिमत बिरवँ परेउ जनु पानी ॥  
 बिनती सचिव करहि कर जोरी। जिअहु जगतपति बरिस करोरी ॥  
 जग मंगल भल काजु बिचारा। बेगिअ नाथ न लाइअ बारा ॥  
 नृपहि मोटु सुनि सचिव सुभाषा। बढत बौड जनु लही सुसाखा ॥

दो. कहेउ भूप मुनिराज कर जोइ जोइ आयसु होइ।

राम राज अभिषेक हित बेगि करहु सोइ सोइ ॥ ५ ॥

हरषि मुनीस कहेउ मृदु बानी। आनहु सकल सुतीरथ पानी ॥  
 औषध मूल फूल फल पाना। कहे नाम गनि मंगल नाना ॥  
 चामर चरम बसन बहु भाँती। रोम पाट पट अगनित जाती ॥  
 मनिगन मंगल वस्तु अनेका। जो जग जोगु भूप अभिषेका ॥  
 बेद बिदित कहि सकल बिधाना। कहेउ रचहु पुर बिबिध बिताना ॥  
 सफल रसाल पूगफल केरा। रोपहु बीथिन्ह पुर चहुँ फेरा ॥  
 रचहु मंजु मनि चौकें चारू। कहहु बनावन बेगि बजारू ॥  
 पूजहु गनपति गुर कुलदेवा। सब बिधि करहु भूमिसुर सेवा ॥

दो. ध्वज पताक तोरन कलस सजहु तुरग रथ नाग।

सिर धरि मुनिबर बचन सबु निज निज काजहिं लाग ॥ ६ ॥

जो मुनीस जेहि आयसु दीन्हा। सो तेहिं काजु प्रथम जनु कीन्हा ॥  
 बिप्र साधु सुर पूजत राजा। करत राम हित मंगल काजा ॥  
 सुनत राम अभिषेक सुहावा। बाज गहागह अवध बधावा ॥  
 राम सीय तन सगुन जनाए। फरकहिं मंगल अंग सुहाए ॥  
 पुलकि सप्रेम परसपर कहहीं। भरत आगमनु सूचक अहहीं ॥  
 भए बहुत दिन अति अवसेरी। सगुन प्रतीति भेंट प्रिय केरी ॥  
 भरत सरिस प्रिय को जग माहीं। इहइ सगुन फलु दूसर नाहीं ॥  
 रामहि बंधु सोच दिन राती। अंडन्हि कमठ हदउ जेहि भाँती ॥

दो. एहि अवसर मंगलु परम सुनि रहँसेउ रनिवासु।

सोभत लखि बिधु बढत जनु बारिधि वीचि बिलासु ॥ ७ ॥

प्रथम जाइ जिन्ह बचन सुनाए। भूषन बसन भूरि तिन्ह पाए ॥  
 प्रेम पुलकि तन मन अनुरागीं। मंगल कलस सजन सब लागीं ॥  
 चौकें चारु सुमित्राँ पुरी। मनिमय विबिध भाँति अति रुरी ॥  
 आनँद मगन राम महतारी। दिए दान बहु विप्र हँकारी ॥  
 पूर्जाँ ग्रामदेवि सुर नागा। कहेउ बहोरि देन बलिभागा ॥  
 जेहि बिधि होइ राम कल्यानू। देहु दया करि सो बरदानू ॥  
 गावहि मंगल कोकिलबयनीं। बिधुबदनीं मृगसावकनयनीं ॥

दो. राम राज अभिषेकु सुनि हियँ हरषे नर नारि।

लगे सुमंगल सजन सब विधि अनुकूल बिचारि ॥ ८ ॥

तब नरनाहँ बसिष्ठ बोलाए। रामधाम सिख देन पठाए ॥  
 गुर आगमनु सुनत रघुनाथा। द्वार आइ पद नायउ माथा ॥  
 सादर अरघ देइ घर आने। सोरह भाँति पूजि सनमाने ॥  
 गहे चरन सिय सहित बहोरी। बोले रामु कमल कर जोरी ॥  
 सेवक सदन स्वामि आगमनू। मंगल मूल अमंगल दमनू ॥  
 तदपि उचित जनु बोलि सप्रीती। पठइअ काज नाथ असि नीती ॥  
 प्रभुता तजि प्रभु कीन्ह सनेहू। भयउ पुनीत आजु यहु गेहू ॥  
 आयसु होइ सो करौं गोसाईं। सेवक लहइ स्वामि सेवकाई ॥

दो. सुनि सनेह साने बचन मुनि रघुबरहि प्रसंस।

राम कस न तुम्ह कहहु अस हंस बंस अवतंस ॥ ९ ॥

बरनि राम गुन सीलु सुभाऊ। बोले प्रेम पुलकि मुनिराऊ ॥  
 भूप सजेउ अभिषेक समाजू। चाहत देन तुम्हहि जुवराजू ॥  
 राम करहु सब संजम आजू। जाँ विधि कुसल निबाहै काजू ॥  
 गुरु सिख देइ राय पहिं गयउ। राम हृदयँ अस बिसमउ भयउ ॥  
 जनमे एक संग सब भाई। भोजन सयन केलि लरिकार्ई ॥  
 करनबेध उपवीत बिआहा। संग संग सब भए उछाहा ॥  
 विमल बंस यहु अनुचित एकू। बंधु बिहाइ बडेहि अभिषेकू ॥  
 प्रभु सप्रेम पछितानि सुहाई। हरउ भगत मन कै कुटिलाई ॥

दो. तेहि अवसर आए लखन मगन प्रेम आनंद।

सनमाने प्रिय बचन कहि रघुकुल कैरव चंद ॥ १० ॥

बाजहिं बाजने बिबिध बिधाना। पुर प्रमोदु नहिं जाइ बखाना ॥  
 भरत आगमनु सकल मनावहिं। आवहुँ बेगि नयन फलु पावहिं ॥  
 हाट बाट घर गलीं अथाई। कहहिं परसपर लोग लोगाई ॥  
 कालि लगन भलि केतिक बारा। पूजिहि बिधि अभिलाषु हमारा ॥  
 कनक सिंघासन सीय समेता। बैठहिं रामु होइ चित चेता ॥  
 सकल कहहिं कब होइहि काली। विघन मनावहिं देव कुचाली ॥  
 तिन्हहि सोहाइ न अवध बधावा। चोरहि चंदिनि राति न भावा ॥  
 सारद बोलि बिनय सुर करहीं। बारहिं बार पाय लै परहीं ॥

दो. बिपति हमारि बिलोकि बडि मातु करिअ सोइ आजु।

रामु जाहिं बन राजु तजि होइ सकल सुरकाजु ॥ ११ ॥

सुनि सुर बिनय ठाढि पछिताती। भइउँ सरोज बिपिन हिमराती ॥  
 देखि देव पुनि कहहिं निहोरी। मातु तोहि नहिं थोरिउ खोरी ॥  
 बिसमय हरष रहित रघुराऊ। तुम्ह जानहु सब राम प्रभाऊ ॥  
 जीव करम बस सुख दुख भागी। जाइअ अवध देव हित लागी ॥  
 बार बार गहि चरन सँकोचौ। चली बिचारि बिबुध मति पोची ॥  
 ऊँच निवासु नीचि करतूती। देखि न सकहिं पराइ बिभूती ॥  
 आगिल काजु बिचारि बहोरी। करहहिं चाह कुसल कवि मोरी ॥  
 हरषि हृदयँ दसरथ पुर आई। जनु ग्रह दसा दुसह दुखदाई ॥

दो. नामु मंथरा मंदमति चेरी कैकेइ केरि।

अजस पेटारी ताहि करि गई गिरा मति फेरि ॥ १२ ॥

दीख मंथरा नगरु बनावा। मंजुल मंगल बाज बधावा ॥  
 पूछेसि लोगन्ह काह उछाहू। राम तिलकु सुनि भा उर दाहू ॥  
 करइ बिचारु कुबुद्धि कुजाती। होइ अकाजु कवनि बिधि राती ॥  
 देखि लागि मधु कुटिल किराती। जिमि गवँ तकइ लेउँ केहि भाँती ॥  
 भरत मातु पहिं गइ बिलखानी। का अनमनि हसि कह हँसि रानी ॥  
 ऊतरु देइ न लेइ उसासू। नारि चरित करि ढारइ आँसू ॥  
 हँसि कह रानि गालु बड तोरें। दीन्ह लखन सिख अस मन मोरें ॥  
 तबहुँ न बोलु चेरि बडि पापिनि। छाडइ स्वास कारि जनु साँपिनि ॥

दो. सभय रानि कह कहसि किन कुसल रामु महिपालु।

लखनु भरतु रिपुदमनु सुनि भा कुबरी उर सालु ॥ १३ ॥

कत सिख देइ हमहि कोउ माई। गालु करब केहि कर बलु पाई ॥  
 रामहि छाडि कुसल केहि आजू। जेहि जनेसु देइ जुबराजू ॥  
 भयउ कौसिलहि बिधि अति दाहिन। देखत गरब रहत उर नाहिन ॥  
 देखेहु कस न जाइ सब सोभा। जो अवलोकि मोर मनु छोभा ॥  
 पूतु बिदेस न सोचु तुम्हारे। जानति हहु बस नाहु हमारे ॥  
 नीद बहुत प्रिय सेज तुराई। लखहु न भूप कपट चतुराई ॥  
 सुनि प्रिय बचन मलिन मनु जानी। झुकी रानि अब रहु अरगानी ॥  
 पुनि अस कवहुँ कहसि घरफोरी। तब धरि जीभ कढावउँ तोरी ॥

दो. काने खोरे कूबरे कुटिल कुचाली जानि।

तिय बिसेषि पुनि चेरि कहि भरतमातु मुसुकानि ॥ १४ ॥

प्रियवादिनि सिख दीन्हिउँ तोही। सपनेहुँ तो पर कोपु न मोही ॥  
 सुदिनु सुमंगल दायकु सोई। तोर कहा फुर जेहि दिन होई ॥  
 जेत स्वामि सेवक लघु भाई। यह दिनकर कुल रीति सुहाई ॥  
 राम तिलकु जौ साँचेहुँ काली। देउँ मागु मन भावत आली ॥  
 कौसल्या सम सब महतारी। रामहि सहज सुभायँ पिआरी ॥  
 मो पर करहि सनेहु बिसेषी। मैं करि प्रीति परीछा देखी ॥  
 जौ बिधि जनमु देइ करि छोहू। होहुँ राम सिय पूत पुतोहू ॥  
 प्रान तें अधिक रामु प्रिय मोरें। तिन्ह कें तिलक छोभु कस तोरें ॥

दो. भरत सपथ तोहि सत्य कहु परिहरि कपट दुराउ।

हरष समय बिसमउ करसि कारन मोहि सुनाउ ॥ १५ ॥

एकहिं बार आस सब पूजी। अब कछु कहब जीभ करि दूजी ॥  
 फोरै जोगु कपारु अभागा। भलेउ कहत दुख रउरेहि लागा ॥  
 कहहिं झूठि फुरि बात बनाई। ते प्रिय तुम्हहि करुइ मैं माई ॥  
 हमहुँ कहवि अब ठकुरसोहाती। नाहिं त मौन रहब दिनु राती ॥  
 करि कुरूप बिधि परबस कीन्हा। बवा सो लुनिअ लहिअ जो दीन्हा ॥  
 कोउ नृप होउ हमहि का हानी। चेरि छाडि अब होब कि रानी ॥  
 जारै जोगु सुभाउ हमारा। अनभल देखि न जाइ तुम्हारा ॥  
 तातें कछुक बात अनुसारी। छमिअ देबि बडि चूक हमारी ॥

दो. गूढ कपट प्रिय बचन सुनि तीय अघरबुधि रानि।

सुरमाया बस बैरिनिहि सुहृद जानि पतिआनि ॥ १६ ॥

सादर पुनि पुनि पूँछति ओही। सबरी गान मृगी जनु मोही ॥  
 तसि मति फिरी अहइ जसि भाबी। रहसी चेरी घात जनु फाबी ॥  
 तुम्ह पूँछहु मै कहत डेराऊँ। धरेउ मोर घरफोरी नाऊँ ॥  
 सजि प्रतीति बहुविधि गढि छोली। अवध साढसाती तब बोली ॥  
 प्रिय सिय रामु कहा तुम्ह रानी। रामहि तुम्ह प्रिय सो फुरि बानी ॥  
 रहा प्रथम अब ते दिन बीते। समउ फिरें रिपु होहिं पिंरीते ॥  
 भानु कमल कुल पोषनिहारा। बिनु जल जारि करइ सोइ छारा ॥  
 जरि तुम्हारि चह सवति उखारी। रूँधहु करि उपाउ बर बारी ॥

दो. तुम्हहि न सोचु सोहाग बल निज बस जानहु राउ।

मन मलीन मुह मीठ नृप राउर सरल सुभाउ ॥ १७ ॥

चतुर गँभीर राम महतारी। बीचु पाइ निज बात सँवारी ॥  
 पठए भरतु भूप ननिअउरें। राम मातु मत जानव रउरें ॥  
 सेवहिं सकल सवति मोहि नीकें। गरबित भरत मातु बल पी कें ॥  
 सालु तुम्हार कौसिलहि माई। कपट चतुर नहिं होइ जनाई ॥  
 राजहि तुम्ह पर प्रेमु बिसेषी। सवति सुभाउ सकइ नहिं देखी ॥  
 रची प्रंपचु भूपहि अपनाई। राम तिलक हित लगन धराई ॥  
 यह कुल उचित राम कहूँ टीका। सबहि सोहाइ मोहि सुठि नीका ॥  
 आगिलि बात समुझि डरु मोही। देउ दैउ फिरि सो फल ओही ॥

दो. रचि पचि कोटिक कुटिलपन कीन्हेसि कपट प्रबोधु ॥

कहिसि कथा सत सवति कै जेहि विधि बाढ विरोधु ॥ १८ ॥

भावी बस प्रतीति उर आई। पूँछ रानि पुनि सपथ देवाई ॥  
 का पूछहुँ तुम्ह अबहुँ न जाना। निज हित अनहित पसु पहिचाना ॥  
 भयउ पाखु दिन सजत समाजू। तुम्ह पाई सुधि मोहि सन आजू ॥  
 खाइअ पहिरिअ राज तुम्हारें। सत्य कहें नहिं दोषु हमारें ॥  
 जौ असत्य कछु कहव बनाई। तौ विधि देइहि हमहि सजाई ॥  
 रामहि तिलक कालि जौ भयऊ। तुम्ह कहूँ बिपति बीजु विधि बयऊ ॥  
 रेख खँचाइ कहउँ बलु भाषी। भामिनि भइहु दूध कइ माखी ॥  
 जौ सुत सहित करहु सेवकाई। तौ घर रहहु न आन उपाई ॥

दो. कद्रूँ बिनतहि दीन्ह दुखु तुम्हहि कौसिलाँ देव।

भरतु बंदिगृह सेइहहिं लखनु राम के नेव ॥ १९ ॥

कैकयसुता सुनत कटु बानी। कहि न सकइ कछु सहमि सुखानी ॥  
 तन पसेउ कदली जिमि काँपी। कुबरीं दसन जीभ तब चाँपी ॥  
 कहि कहि कोटिक कपट कहानी। धीरजु धरहु प्रबोधिसि रानी ॥  
 फिरा करमु प्रिय लागि कुचाली। बकिहि सराहइ मानि मराली ॥  
 सुनु मंथरा बात फुरि तोरी। दहिनि आँखि नित फरकइ मोरी ॥  
 दिन प्रति देखउँ राति कुसपने। कहउँ न तोहि मोह बस अपने ॥  
 काह करौ सखि सूध सुभाऊ। दाहिन बाम न जानउँ काऊ ॥

दो. अपने चलत न आजु लागि अनभल काहुक कीन्ह।

केहिं अघ एकहि बार मोहि दैअँ दुसह दुखु दीन्ह ॥ २० ॥

नैहर जनमु भरब बरु जाइ। जिअत न करबि सवति सेवकाई ॥  
 अरि बस दैउ जिआवत जाही। मरनु नीक तेहि जीवन चाही ॥  
 दीन बचन कह बहुबिधि रानी। सुनि कुबरीं तियमाया ठानी ॥  
 अस कस कहहु मानि मन ऊना। सुखु सोहागु तुम्ह कहुँ दिन दूना ॥  
 जेहिं राउर अति अनभल ताका। सोइ पाइहि यहु फलु परिपाका ॥  
 जब तें कुमत सुना मैं स्वामिनि। भूख न बासर नींद न जामिनि ॥  
 पूँछेउ गुनिन्ह रेख तिन्ह खाँची। भरत भुआल होहिं यह साँची ॥  
 भामिनि करहु त कहौं उपाऊ। है तुम्हरीं सेवा बस राऊ ॥

दो. परउँ कूप तुअ बचन पर सकउँ पूत पति त्यागि।

कहसि मोर दुखु देखि बड कस न करब हित लागि ॥ २१ ॥

कुबरीं करि कबुली कैकेई। कपट छुरी उर पाहन टेई ॥  
 लखइ न रानि निकट दुखु कैसे। चरइ हरित तिन बलिपसु जैसे ॥  
 सुनत बात मृदु अंत कठोरी। देति मनहुँ मधु माहुर घोरी ॥  
 कहइ चेरी सुधि अहइ कि नाही। स्वामिनि कहिहु कथा मोहि पाहीं ॥  
 दुइ बरदान भूप सन थाती। मागहु आजु जुडावहु छाती ॥  
 सुतहि राजु रामहि बनवासू। देहु लेहु सब सवति हुलासु ॥  
 भूपति राम सपथ जब करई। तब मागेहु जेहिं बचनु न टरई ॥  
 होइ अकाजु आजु निसि बीतें। बचनु मोर प्रिय मानेहु जी तें ॥

दो. बड कुघातु करि पातकिनि कहेसि कोपगृहँ जाहु।

काजु सँवारेहु सजग सबु सहसा जनि पतिआहु ॥ २२ ॥

कुबरिहि रानि प्रानप्रिय जानी। बार बार बडि बुद्धि बखानी ॥

तोहि सम हित न मोर संसारा। बहे जात कइ भइसि अधारा ॥  
 जौं बिधि पुरब मनोरथु काली। करौं तोहि चख पूतारि आली ॥  
 बहुबिधि चेरिहि आदरु देई। कोपभवन गवनि कैकेई ॥  
 बिपति बीजु बरषा रितु चेरी। भुईं भइ कुमति कैकेई केरी ॥  
 पाइ कपट जलु अंकुर जामा। बर दोउ दल दुख फल परिनामा ॥  
 कोप समाजु साजि सबु सोई। राजु करत निज कुमति बिगोई ॥  
 राउर नगर कोलाहलु होई। यह कुचालि कछु जान न कोई ॥

दो. प्रमुदित पुर नर नारि। सब सजहिं सुमंगलचार।

एक प्रविसहिं एक निर्गमहिं भीर भूप दरवार ॥ २३ ॥

बाल सखा सुन हियँ हरषाहीं। मिलि दस पाँच राम पहिं जाहीं ॥  
 प्रभु आदरहिं प्रेमु पहिचानी। पूँछहिं कुसल खेम मृदु बानी ॥  
 फिरहिं भवन प्रिय आयसु पाई। करत परसपर राम बडाई ॥  
 को रघुबीर सरिस संसारा। सीलु सनेह निबाहनिहारा।  
 जेहि जेहि जोनि करम बस भ्रमहीं। तहँ तहँ ईसु देउ यह हमहीं ॥  
 सेवक हम स्वामी सियनाहू। होउ नात यह ओर निबाहू ॥  
 अस अभिलाषु नगर सब काहू। कैकयसुता हृदयँ अति दाहू ॥  
 को न कुसंगति पाइ नसाई। रहइ न नीच मतेँ चतुराई ॥

दो. साँस समय सानंद नृपु गयउ कैकेई गेहँ।

गवनु निठुरता निकट किय जनु धरि देह सनेहँ ॥ २४ ॥

कोपभवन सुनि सकुचेउ राउ। भय बस अगहुड परइ न पाऊ ॥  
 सुरपति बसइ बाहँबल जाके। नरपति सकल रहहिं रुख ताकेँ ॥  
 सो सुनि तिय रिस गयउ सुखाई। देखहु काम प्रताप बडाई ॥  
 सूल कुलिस असि अँगवनिहारे। ते रतिनाथ सुमन सर मारे ॥  
 सभय नरेसु प्रिया पहिं गयऊ। देखि दसा दुखु दारुन भयऊ ॥  
 भूमि सयन पटु मोट पुराना। दिए डारि तन भूषण नाना ॥  
 कुमतिहि कसि कुबेषता फाबी। अन अहिवातु सूच जनु भाबी ॥  
 जाइ निकट नृपु कह मृदु बानी। प्रानप्रिया केहि हेतु रिसानी ॥

छं. केहि हेतु रानि रिसानि परसत पानि पतिहि नेवारई।

मानहुँ सरोष भुअंग भामिनि विषम भाँति निहारई ॥

दोउ बासना रसना दसन बर मरम ठाहरु देखई।

तुलसी नृपति भवतव्यता बस काम कौतुक लेखई ॥

सो. बार बार कह राउ सुमुखि सुलोचिनि पिकबचनि।

कारन मोहि सुनाउ गजगामिनि निज कोप कर ॥ २५ ॥

अनहित तोर प्रिया केई कीन्हा। केहि दुइ सिर केहि जमु चह लीन्हा ॥

कहु केहि रंकहि करौ नरेसू। कहु केहि नृपहि निकासौ देसू ॥

सकउँ तोर अरि अमरउ मारी। काह कीट बपुरे नर नारी ॥

जानसि मोर सुभाउ बरोरू। मनु तव आनन चंद चकोरू ॥

प्रिया प्रान सुत सरबसु मोरें। परिजन प्रजा सकल बस तोरें ॥

जौं कछु कहौ कपटु करि तोही। भामिनि राम सपथ सत मोही ॥

बिहसि मागु मनभावति बाता। भूषन सजहि मनोहर गाता ॥

घरी कुघरी समुझि जियँ देखू। बेगि प्रिया परिहरहि कुबेषू ॥

दो. यह सुनि मन गुनि सपथ बडि बिहसि उठी मतिमंद।

भूषन सजति बिलोकि मृगु मनहुँ किरातिनि फंद ॥ २६ ॥

पुनि कह राउ सुहृद जियँ जानी। प्रेम पुलकि मृदु मंजुल बानी ॥

भामिनि भयउ तोर मनभावा। घर घर नगर अनंद बधावा ॥

रामहि देउँ कालि जुबराजू। सजहि सुलोचनि मंगल साजू ॥

दलकि उठेउ सुनि हृदउ कठोरू। जनु छुइ गयउ पाक बरतोरू ॥

ऐसिउ पीर बिहसि तेहि गोई। चोर नारि जिमि प्रगटि न रोई ॥

लखहि न भूप कपट चतुराई। कोटि कुटिल मनि गुरू पढाई ॥

जद्यपि नीति निपुन नरनाहू। नारिचरित जलनिधि अवगाहू ॥

कपट सनेहु बढाइ बहोरी। बोली बिहसि नयन मुहु मोरी ॥

दो. मागु मागु पै कहहु पिय कबहुँ न देहु न लेहु।

देन कहेहु बरदान दुइ तेउ पावत संदेहु ॥ २७ ॥

जानेउँ मरमु राउ हँसि कहई। तुम्हहि कोहाब परम प्रिय अहई ॥

थाति राखि न मागिहु काऊ। बिसरि गयउ मोहि भोर सुभाऊ ॥

झूठेहुँ हमहि दोषु जनि देहू। दुइ कै चारि मागि मकु लेहू ॥

रघुकुल रीति सदा चलि आई। प्रान जाहुँ बरु बचनु न जाई ॥

नहिँ असत्य सम पातक पुंजा। गिरि सम होहिँ कि कोटिक गुंजा ॥

सत्यमूल सब सुकृत सुहाए। बेद पुरान विदित मनु गाए ॥

तेहि पर राम सपथ करि आई। सुकृत सनेह अवधि रघुराई ॥

बात दृढाइ कुमति हँसि बोली। कुमत कुबिहग कुलह जनु खोली ॥

दो. भूप मनोरथ सुभग बनु सुख सुविहंग समाजु।

भिल्लनि जिमि छाडन चहति बचनु भयंकरु बाजु ॥ २८ ॥

मासपारायण, तेरहवाँ विश्राम

सुनहु प्रानप्रिय भावत जी का। देहु एक बर भरतहि टीका ॥

मागउँ दूसर बर कर जोरी। पुरवहु नाथ मनोरथ मोरी ॥

तापस बेष बिसेषि उदासी। चौदह बरिस रामु बनबासी ॥

सुनि मृदु बचन भूप हियँ सोकू। ससि कर छुअत विकल जिमि कोकू ॥

गयउ सहमि नहिं कछु कहि आवा। जनु सचान बन झपटेउ लावा ॥

बिबरन भयउ निपट नरपालू। दामिनि हनेउ मनहुँ तरु तालू ॥

माथे हाथ मूदि दोउ लोचन। तनु धरि सोचु लाग जनु सोचन ॥

मोर मनोरथु सुरतरु फूला। फरत करिनि जिमि हतेउ समूला ॥

अवध उजारि कीन्हि कैकेई। दीन्हसि अचल बिपति कै नेई ॥

दो. कवनें अवसर का भयउ गयउँ नारि बिस्वास।

जोग सिद्धि फल समय जिमि जतिहि अबिद्या नास ॥ २९ ॥

एहि विधि राउ मनहिं मन झाँखा। देखि कुभाँति कुमति मन मारखा ॥

भरतु कि राउर पूत न होही। आनेहु मोल बेसाहि कि मोही ॥

जो सुनि सरु अस लाग तुम्हारें। काहे न बोलहु बचनु सँभारे ॥

देहु उतरु अनु करहु कि नाहीं। सत्यसंध तुम्ह रघुकुल माहीं ॥

देन कहेहु अब जनि बरु देहू। तजहुँ सत्य जग अपजसु लेहू ॥

सत्य सराहि कहेहु बरु देना। जानेहु लेइहि मागि चबेना ॥

सिबि दधीचि बलि जो कछु भाषा। तनु धनु तजेउ बचन पनु राखा ॥

अति कटु बचन कहति कैकेई। मानहुँ लोन जरे पर देई ॥

दो. धरम धुरंधर धीर धरि नयन उघारे रायँ।

सिरु धुनि लीन्हि उसास असि मारेसि मोहि कुठायँ ॥ ३० ॥

आगें दीखि जरत रिस भारी। मनहुँ रोष तरवारि उघारी ॥

मूठि कुबुद्धि धार निठुराई। धरी कूबरीं सान बनाई ॥

लखी महीप कराल कठोरा। सत्य कि जीवनु लेइहि मोरा ॥

बोले राउ कठिन करि छाती। बानी सबिनय तासु सोहाती ॥

प्रिया बचन कस कहसि कुभाँती। भीर प्रतीति प्रीति करि हाँती ॥

मोरें भरतु रामु दुइ आँखी। सत्य कहउँ करि संकरू साखी ॥  
अवसि दूतु मैं पठइव प्राता। ऐहहिं बेगि सुनत दोउ भ्राता ॥  
सुदिन सोधि सबु साजु सजाई। देउँ भरत कहूँ राजु बजाई ॥

दो. लोभु न रामहि राजु कर बहुत भरत पर प्रीति।

मैं बड छोट बिचारि जियँ करत रहेउँ नृपनीति ॥ ३१ ॥

राम सपथ सत कहूँ सुभाऊ। राममातु कछु कहेउ न काऊ ॥  
मैं सबु कीन्ह तोहि बिनु पूँछें। तेहि तें परेउ मनोरथु छूछें ॥  
रिस परिहरू अब मंगल साजू। कछु दिन गएँ भरत जुबराजू ॥  
एकहि बात मोहि दुखु लागा। बर दूसर असमंजस मागा ॥  
अजहूँ हृदय जरत तेहि आँचा। रिस परिहास कि साँचेहूँ साँचा ॥  
कहु तजि रोषु राम अपराधू। सबु कोउ कहइ रामु सुठि साधू ॥  
तुहूँ सराहसि करसि सनेहू। अब सुनि मोहि भयउ सदेहू ॥  
जासु सुभाउ अरिहि अनुकूला। सो किमि करिहि मातु प्रतिकूला ॥

दो. प्रिया हास रिस परिहरहि मागु बिचारि बिबेकु।

जेहिं देखौं अब नयन भरि भरत राज अभिषेकु ॥ ३२ ॥

जिए मीन बरू वारि बिहीना। मनि बिनु फनिकु जिए दुख दीना ॥  
कहउँ सुभाउ न छलु मन माहीं। जीवनु मोर राम बिनु नाहीं ॥  
समुझि देखु जियँ प्रिया प्रवीना। जीवनु राम दरस आधीना ॥  
सुनि भ्रदु बचन कुमति अति जरई। मनहूँ अनल आहुति घृत परई ॥  
कहइ करहु किन कोटि उपाया। इहाँ न लागिहि राउरि माया ॥  
देहु कि लेहु अजसु करि नाहीं। मोहि न बहुत प्रपंच सोहाहीं।  
रामु साधु तुम्ह साधु सयाने। राममातु भलि सब पहिचाने ॥  
जस कौसिलाँ मोर भल ताका। तस फलु उन्हहि देउँ करि साका ॥

दो. होत प्रात मुनिबेष धरि जौं न रामु बन जाहिं।

मोर मरनु राउर अजस नृप समुझिअ मन माहिं ॥ ३३ ॥

अस कहि कुटिल भई उठि ठाढी। मानहूँ रोष तरंगिनि बाढी ॥  
पाप पहार प्रगट भइ सोई। भरी क्रोध जल जाइ न जोई ॥  
दोउ बर कूल कठिन हठ धारा। भवँ कूबरी बचन प्रचारा ॥  
ढाहत भूपरूप तरु मूला। चली बिपति बारिधि अनुकूला ॥  
लखी नरेस बात फुरि साँची। तिय मिस मीचु सीस पर नाची ॥

गहि पद बिनय कीन्ह बैठारी। जनि दिनकर कुल होसि कुठारी ॥  
मागु माथ अबहीं देउँ तोही। राम बिरहँ जनि मारसि मोही ॥  
राखु राम कहँ जेहि तेहि भाँती। नाहिं त जरिहि जनम भरि छाती ॥

दो. देखी ब्याधि असाध नृपु परेउ धरनि धुनि माथ।

कहत परम आरत बचन राम राम रघुनाथ ॥ ३४ ॥

ब्याकुल राउ सिधिल सब गाता। करिनि कलपतरु मनहुँ निपाता ॥  
कंठु सूख मुख आव न बानी। जनु पाठीनु दीन बिनु पानी ॥  
पुनि कह कटु कठोर कैकेई। मनहुँ घाय महुँ माहुर देई ॥  
जौं अंतहुँ अस करतबु रहेऊ। मागु मागु तुम्ह केहि बल कहेऊ ॥  
दुइ कि होइ एक समय भुआला। हँसब ठठाइ फुलाउब गाला ॥  
दानि कहाउब अरु कृपनाई। होइ कि खेम कुसल रौताई ॥  
छाडहु बचनु कि धीरजु धरहू। जनि अबला जिमि करुना करहू ॥  
तनु तिय तनय धामु धनु धरनी। सत्यसंध कहँ तृन सम बरनी ॥

दो. मरम बचन सुनि राउ कह कह कछु दोषु न तोर।

लागेउ तोहि पिसाच जिमि कालु कहावत मोर ॥ ३५ ॥ ॐ

चहत न भरत भूपतहि भोरें। विधि बस कुमति बसी जिय तोरें ॥  
सो सबु मोर पाप परिनामू। भयउ कुठाहर जेहि विधि बामू ॥  
सुबस बसिहि फिरि अवध सुहाई। सब गुन धाम राम प्रभुताई ॥  
करिहहिं भाइ सकल सेवकाई। होइहि तिहुँ पुर राम बडाई ॥  
तोर कलंकु मोर पछिताऊ। मुएहुँ न मिटहि न जाइहि काऊ ॥  
अब तोहि नीक लाग करु सोई। लोचन ओट बैठु मुहु गोई ॥  
जब लगि जिऔं कहउँ कर जोरी। तब लगि जनि कछु कहसि बहोरी ॥  
फिरि पछितैहसि अंत अभागी। मारसि गाइ नहारु लागी ॥

दो. परेउ राउ कहि कोटि विधि काहे करसि निदानु।

कपट सयानि न कहति कछु जागति मनहुँ मसानु ॥ ३६ ॥

राम राम रट बिकल भुआलू। जनु बिनु पंख बिहंग बेहालू ॥  
हृदयँ मनाव भोरु जनि होई। रामहि जाइ कहै जनि कोई ॥  
उदउ करहु जनि रवि रघुकुल गुर। अवध विलोकि सूल होइहि उर ॥  
भूप प्रीति कैकइ कठिनाई। उभय अवधि विधि रची बनाई ॥  
बिलपत नृपहि भयउ भिनुसारा। बीना बेनु संख धुनि द्वारा ॥

पढ़हिं भाट गुन गावहिं गायक। सुनत नृपहिं जनु लागहिं सायक ॥  
मंगल सकल सोहाहिं न कैसें। सहगामिनिहिं बिभूषन जैसें ॥  
तेहिं निसि नीद परी नहिं काहू। राम दरस लालसा उछाहू ॥

दो. द्वार भीर सेवक सचिव कहहिं उदित रबि देखि।

जागेउ अजहूँ न अवधपति कारनु कवनु बिसेषि ॥ ३७ ॥

पछिले पहर भूपु नित जागा। आजु हमहि बड अचरजु लागा ॥  
जाहु सुमंत्र जगावहु जाई। कीजिअ काजु रजायसु पाई ॥  
गए सुमंत्रु तब राउर माहीं। देखि भयावन जात डेराहीं ॥  
धाइ खाइ जनु जाइ न हेरा। मानहूँ बिपति बिषाद बसेरा ॥  
पूछें कोउ न ऊतरु देई। गए जेहिं भवन भूप कैकैई ॥  
कहि जयजीव बैठ सिरु नाई। देखि भूप गति गयउ सुखाई ॥  
सोच बिकल विवरन महि परेऊ। मानहूँ कमल मूलु परिहरेऊ ॥  
सचिउ सभित सकइ नहिं पूँछी। बोली असुभ भरी सुभ छूछी ॥

दो. परी न राजहि नीद निसि हेतु जान जगदीसु।

रामु रामु रटि भोरु किय कहइ न मरमु महीसु ॥ ३८ ॥

आनहु रामहि बेगि बोलाई। समाचार तब पूँछेहु आई ॥  
चलेउ सुमंत्र राय रूख जानी। लखी कुचालि कीन्हि कछु रानी ॥  
सोच बिकल मग परइ न पाऊ। रामहि बोलि कहिहि का राऊ ॥  
उर धरि धीरजु गयउ दुआरें। पूँछहिं सकल देखि मनु मारें ॥  
समाधानु करि सो सबही का। गयउ जहाँ दिनकर कुल टीका ॥  
रामु सुमंत्रहि आवत देखा। आदरु कीन्हि पिता सम लेखा ॥  
निरखि बदनु कहि भूप रजाई। रघुकुलदीपहि चलेउ लेवाई ॥  
रामु कुभाँति सचिव सँग जाहीं। देखि लोग जहँ तहँ बिलखाहीं ॥

दो. जाइ दीख रघुबंसमनि नरपति निपट कुसाजु ॥

सहमि परेउ लखि सिंधिनिहि मनहूँ वृद्ध गजराजु ॥ ३९ ॥

सूखहिं अधर जरइ सबु अंगू। मनहूँ दीन मनिहीन भुअंगू ॥  
सरुष समीप दीखि कैकेई। मानहूँ मीचु घरी गनि लेई ॥  
करुनामय मृदु राम सुभाऊ। प्रथम दीख दुखु सुना न काऊ ॥  
तदपि धीर धरि समउ बिचारी। पूँछी मधुर बचन महतारी ॥  
मोहि कहु मातु तात दुख कारन। करिअ जतन जेहिं होइ निवारन ॥

सुनहु राम सबु कारन एहू। राजहि तुम पर बहुत सनेहू ॥  
 देन कहेन्हि मोहि दुइ बरदाना। मागेउँ जो कछु मोहि सोहाना।  
 सो सुनि भयउ भूप उर सोचू। छाडि न सकहि तुम्हार सँकोचू ॥

दो. सुत सनेह इत बचनु उत संकट परेउ नरेसु।

सकहु न आयसु धरहु सिर मेटहु कठिन कलेसु ॥ ४० ॥

निधरक बैठि कहइ कटु बानी। सुनत कठिनता अति अकुलानी ॥  
 जीभ कमान बचन सर नाना। मनहुँ महिप मृदु लच्छ समाना ॥  
 जनु कठोरपनु धरें सरीरू। सिखइ धनुषविद्या बर वीरू ॥  
 सब प्रसंगु रघुपतिहि सुनाई। बैठि मनहुँ तनु धरि निठुराई ॥  
 मन मुसकाइ भानुकुल भानु। रामु सहज आनंद निधानू ॥  
 बोले बचन बिगत सब दूषन। मृदु मंजुल जनु बाग बिभूषन ॥  
 सुनु जननी सोइ सुतु बडभागी। जो पितु मातु बचन अनुरागी ॥  
 तनय मातु पितु तोषनिहारा। दुर्लभ जननि सकल संसारा ॥

दो. मुनिगन मिलनु बिसेषि बन सबहि भाँति हित मोर।

तेहि महँ पितु आयसु बहुरि संमत जननी तोर ॥ ४१ ॥

भरत प्रानप्रिय पावहिं राजू। बिधि सब बिधि मोहि सनमुख आजु।  
 जों न जाउँ बन ऐसेहु काजा। प्रथम गनिअ मोहि मूढ समाजा ॥  
 सेवहिं अरँडु कलपतरु त्यागी। परिहरि अमृत लेहिं विषु मागी ॥  
 तेउ न पाइ अस समउ चुकाहीं। देखु बिचारि मातु मन माहीं ॥  
 अंब एक दुखु मोहि बिसेषी। निपट विकल नरनायकु देखी ॥  
 थोरिहिं बात पितहि दुख भारी। होति प्रतीति न मोहि महतारी ॥  
 राउ धीर गुन उदधि अगाधू। भा मोहि ते कछु बड अपराधू ॥  
 जातें मोहि न कहत कछु राऊ। मोरि सपथ तोहि कहु सतिभाऊ ॥

दो. सहज सरल रघुवर बचन कुमति कुटिल करि जान।

चलइ जोंक जल बक्रगति जद्यपि सलिलु समान ॥ ४२ ॥

रहसी रानि राम रुख पाई। बोली कपट सनेहु जनाई ॥  
 सपथ तुम्हार भरत कै आना। हेतु न दूसर मै कछु जाना ॥  
 तुम्ह अपराध जोगु नहिं ताता। जननी जनक बंधु सुखदाता ॥  
 राम सत्य सबु जो कछु कहहू। तुम्ह पितु मातु बचन रत अहहू ॥  
 पितहि बुझाइ कहहु बलि सोई। चौथेंपन जेहिं अजसु न होई ॥

तुम्ह सम सुअन सुकृत जेहि दीन्हे। उचित न तासु निरादरु कीन्हे ॥  
लागहिं कुमुख बचन सुभ कैसे। मगहँ गयादिक तीरथ जैसे ॥  
रामहि मातु बचन सब भाए। जिमि सुरसरि गत सलिल सुहाए ॥

दो. गइ मुरुछा रामहि सुमिरि नृप फिरि करवट लीन्ह।

सचिव राम आगमन कहि बिनय समय सम कीन्ह ॥ ४३ ॥

अवनिप अकनि रामु पगु धारे। धरि धीरजु तब नयन उधारे ॥  
सचिवँ सँभारि राउ बैठारे। चरन परत नृप रामु निहारे ॥  
लिए सनेह विकल उर लाई। गै मनि मनहुँ फनिक फिरि पाई ॥  
रामहि चितइ रहेउ नरनाहू। चला बिलोचन बारि प्रबाहू ॥  
सोक बिबस कछु कहै न पारा। हृदयँ लगावत बारहि बारा ॥  
बिधिहि मनाव राउ मन माहीं। जेहि रघुनाथ न कानन जाहीं ॥  
सुमिरि महेसहि कहइ निहोरी। बिनती सुनहु सदासिव मोरी ॥  
आसुतोष तुम्ह अवढर दानी। आरति हरहु दीन जनु जानी ॥

दो. तुम्ह प्रेरक सब के हृदयँ सो मति रामहि देहु।

बचनु मोर तजि रहहि घर परिहरि सीलु सनेहु ॥ ४४ ॥

अजसु होउ जग सुजसु नसाऊ। नरक परौ बरु सुरपुरु जाऊ ॥  
सब दुख दुसह सहावहु मोही। लोचन ओट रामु जनि होंही ॥  
अस मन गुनइ राउ नहि बोला। पीपर पात सरिस मनु डोला ॥  
रघुपति पितहि प्रेमबस जानी। पुनि कछु कहिहि मातु अनुमानी ॥  
देस काल अवसर अनुसारी। बोले बचन विनीत विचारी ॥  
तात कहउँ कछु करउँ डिठाई। अनुचितु छमब जानि लरिकाई ॥  
अति लघु बात लागि दुखु पावा। काहुँ न मोहि कहि प्रथम जनावा ॥  
देखि गोसाईंहि पूँछिउँ माता। सुनि प्रसंगु भए सीतल गाता ॥

दो. मंगल समय सनेह बस सोच परिहरिअ तात।

आयसु देइअ हरषि हियँ कहि पुलके प्रभु गात ॥ ४५ ॥

धन्य जनमु जगतीतल तासू। पितहि प्रमोदु चरित सुनि जासू ॥  
चारि पदारथ करतल ताकें। प्रिय पितु मातु प्रान सम जाकें ॥  
आयसु पालि जनम फलु पाई। ऐहउँ बेगिहि होउ रजाई ॥  
बिदा मातु सन आवउँ मागी। चलिहउँ बनहि बहुरि पग लागी ॥  
अस कहि राम गवनु तब कीन्हा। भूप सोक बसु उतरु न दीन्हा ॥

नगर व्यापि गइ बात सुतीछी। छुअत चढी जनु सब तन बीछी ॥  
सुनि भए बिकल सकल नर नारी। बेलि बिटप जिमि देखि दवारी ॥  
जो जहँ सुनइ धुनइ सिरु सोई। बड विषादु नहिं धीरजु होई ॥

दो. मुख सुखाहिं लोचन खवहि सोकु न हृदयँ समाइ।

मनहुँ करुन रस कटकई उतरी अवध बजाइ ॥ ४६ ॥

मिलेहि माझ बिधि बात बेगारी। जहँ तहँ देहिं कैकेइहि गारी ॥  
एहि पापिनिहि बूझि का परेऊ। छाइ भवन पर पावकु धरेऊ ॥  
निज कर नयन काटि चह दीखा। डारि सुधा विषु चाहत चीखा ॥  
कुटिल कठोर कुबुद्धि अभागी। भइ रघुवंस बेनु बन आगी ॥  
पालव बैठि पेडु एहिं काटा। सुख महुँ सोक ठाटु धरि ठाटा ॥  
सदा रामु एहिं प्रान समाना। कारन कवन कुटिलपनु ठाना ॥  
सत्य कहहिं कवि नारि सुभाऊ। सब बिधि अगहु अगाध दुराऊ ॥  
निज प्रतिबिंबु बरुकु गहि जाई। जानि न जाइ नारि गति भाई ॥

दो. काह न पावकु जारि सक का न समुद्र समाइ।

का न करै अबला प्रबल केहि जग कालु न खाइ ॥ ४७ ॥

का सुनाइ बिधि काह सुनावा। का देखाइ चह काह देखावा ॥  
एक कहहिं भल भूप न कीन्हा। बरु बिचारि नहिं कुमतिहि दीन्हा ॥  
जो हठि भयउ सकल दुख भाजनु। अबला बिबस ग्यानु गुनु गा जनु ॥  
एक धरम परमिति पहिचाने। नृपहि दोसु नहिं देहिं सयाने ॥  
सिवि दधीचि हरिचंद कहानी। एक एक सन कहहिं बखानी ॥  
एक भरत कर संमत कहहीं। एक उदास भायँ सुनि रहहीं ॥  
कान मूदि कर रद गहि जीहा। एक कहहिं यह बात अलीहा ॥  
सुकृत जाहिं अस कहत तुम्हारे। रामु भरत कहूँ प्रानपिआरे ॥

दो. चंदु चवै बरु अनल कन सुधा होइ विषतूल।

सपनेहुँ कबहुँ न करहिं किल्लु भरतु राम प्रतिकूल ॥ ४८ ॥

एक बिधातहिं दूषनु देंहीं। सुधा देखाइ दीन्ह विषु जेहीं ॥  
खरभरु नगर सोचु सब काहू। दुसह दाहु उर मिटा उछाहू ॥  
बिप्रबधू कुलमान्य जठेरी। जे प्रिय परम कैकेई केरी ॥  
लगीं देन सिख सीलु सराही। बचन बानसम लागहिं ताही ॥  
भरतु न मोहि प्रिय राम समाना। सदा कहहु यहु सबु जगु जाना ॥

करहु राम पर सहज सनेहू। केहि अपराध आजु बनु देहू ॥  
कबहुँ न कियहु सवति आरेसू। प्रीति प्रतीति जान सबु देसू ॥  
कौसल्याँ अब काह बिगारा। तुम्ह जेहि लागि बज्र पुर पारा ॥

दो. सीय कि पिय सँगु परिहरिहि लखनु कि रहिहहि धाम।  
राजु कि भूजब भरत पुर नपु कि जीहि बिनु राम ॥ ४९ ॥

अस बिचारि उर छाडहु कोहू। सोक कलंक कोठि जनि होहू ॥  
भरतहि अवसि देहु जुबराजू। कानन काह राम कर काजू ॥  
नाहिन रामु राज के भूखे। धरम धुरीन विषय रस रूखे ॥  
गुर गृह बसहुँ रामु तजि गेहू। नृप सन अस बरु दूसर लेहू ॥  
जौं नहिं लगिहहु कहें हमारे। नहिं लागिहि कछु हाथ तुम्हारे ॥  
जौं परिहास कीन्हि कछु होई। तौ कहि प्रगट जनावहु सोई ॥  
राम सरिस सुत कानन जोगू। काह कहिहि सुनि तुम्ह कहूँ लोगू ॥  
उठहु बेगि सोइ करहु उपाई। जेहि बिधि सोकु कलंकु नसाई ॥

छं. जेहि भाँति सोकु कलंकु जाइ उपाय करि कुल पालही।  
हठि फेरु रामहि जात बन जनि बात दूसरि चालही ॥  
जिमि भानु बिनु दिनु प्रान बिनु तनु चंद बिनु जिमि जामिनी।  
तिमि अवध तुलसीदास प्रभु बिनु समुझि धौं जियँ भामिनी ॥

सो. सखिन्ह सिखावनु दीन्ह सुनत मधुर परिनाम हित।  
तेई कछु कान न कीन्ह कुटिल प्रबोधी कूबरी ॥ ५० ॥

उतरु न देइ दुसह रिस रूखी। मृगिन्ह चितव जनु बाधिनि भूखी ॥  
ब्याधि असाधि जानि तिन्ह त्यागी। चलीं कहत मतिमंद अभागी ॥  
राजु करत यह दैअँ बिगोई। कीन्हेसि अस जस करइ न कोई ॥  
एहि बिधि बिलपहिं पुर नर नारीं। देहिं कुचालिहि कोटिक गारीं ॥  
जरहिं बिषम जर लेहिं उसासा। कवनि राम बिनु जीवन आसा ॥  
बिपुल बियोग प्रजा अकुलानी। जनु जलचर गन सूखत पानी ॥  
अति बिषाद बस लोग लोगार्ई। गए मातु पहिं रामु गोसाई ॥  
मुख प्रसन्न चित चौगुन चाऊ। मिटा सोचु जनि राखै राऊ ॥  
दो. नव गयंदु रघुवीर मनु राजु अलान समान।

छूट जानि बन गवनु सुनि उर अनंदु अधिकान ॥ ५१ ॥

रघुकुलतिलक जोरि दोउ हाथा। मुदित मातु पद नायउ माथा ॥

दीन्हि असीस लाइ उर लीन्हे। भूषन बसन निछावरि कीन्हे ॥  
 बार बार मुख चुंबति माता। नयन नेह जलु पुलकित गाता ॥  
 गोद राखि पुनि हृदयँ लगाए। स्रवत प्रेनरस पयद सुहाए ॥  
 प्रेमु प्रमोदु न कछु कहि जाई। रंक धनद पदवी जनु पाई ॥  
 सादर सुंदर बदनु निहारी। बोली मधुर बचन महतारी ॥  
 कहहु तात जननी बलिहारी। कबहिँ लगन मुद मंगलकारी ॥  
 सुकृत सील सुख सीवँ सुहाई। जनम लाभ कइ अवधि अघाई ॥

दो. जेहि चाहत नर नारि सब अति आरत एहि भाँति।

जिमि चातक चातकि तृषित बृष्टि सरद रिनु स्वाति ॥ ५२ ॥

तात जाउँ बलि बेगि नहाहू। जो मन भाव मधुर कछु खाहू ॥  
 पितु समीप तब जाएहु भैया। भइ बडि बार जाइ बलि मैआ ॥  
 मातु बचन सुनि अति अनुकूला। जनु सनेह सुरतरु के फूला ॥  
 सुख मकरंद भरे श्रियमूला। निरखि राम मनु भवरुँ न भूला ॥  
 धरम धुरीन धरम गति जानी। कहेउ मातु सन अति मृदु बानी ॥  
 पिताँ दीन्ह मोहि कानन राजू। जहँ सब भाँति मोर बड काजू ॥  
 आयसु देहि मुदित मन माता। जेहिँ मुद मंगल कानन जाता ॥  
 जनि सनेह बस डरपसि भोरें। आनँदु अंब अनुग्रह तोरें ॥

दो. बरष चारिदस बिपिन बसि करि पितु बचन प्रमान।

आइ पाय पुनि देखिहउँ मनु जनि करसि मलान ॥ ५३ ॥

बचन विनीत मधुर रघुबर के। सर सम लगे मातु उर करके ॥  
 सहमि सूखि सुनि सीतलि बानी। जिमि जवास परें पावस पानी ॥  
 कहि न जाइ कछु हृदय बिषादू। मनहुँ मृगी सुनि केहरि नादू ॥  
 नयन सजल तन थर थर काँपी। माजहि खाइ मीन जनु मापी ॥  
 धरि धीरजु सुत बदनु निहारी। गदगद बचन कहति महतारी ॥  
 तात पितहि तुम्ह प्रानपिआरे। देखि मुदित नित चरित तुम्हारे ॥  
 राजु देन कहँ सुभ दिन साधा। कहेउ जान बन केहिँ अपराधा ॥  
 तात सुनावहु मोहि निदानू। को दिनकर कुल भयउ कृसानू ॥

दो. निरखि राम रुख सचिवसुत कारनु कहेउ बुझाइ।

सुनि प्रसंगु रहि मूक जिमि दसा बरनि नहिँ जाइ ॥ ५४ ॥

राखि न सकइ न कहि सक जाहू। दुहँ भाँति उर दारुन दाहू ॥

लिखत सुधाकर गा लिखि राहू। विधि गति बाम सदा सब काहू ॥  
 धरम सनेह उभयँ मति घेरी। भइ गति साँप छुछुंदरि केरी ॥  
 राखउँ सुतहि करउँ अनुरोधू। धरमु जाइ अरु बंधु विरोधू ॥  
 कहउँ जान बन तौ बडि हानी। संकट सोच विवस भइ रानी ॥  
 बहुरि समुझि तिय धरमु सयानी। रामु भरतु दोउ सुत सम जानी ॥  
 सरल सुभाउ राम महतारी। बोली बचन धीर धरि भारी ॥  
 तात जाउँ बलि कीन्हेहु नीका। पितु आयसु सब धरमक टीका ॥

दो. राजु देन कहि दीन्ह बन मोहि न सो दुख लेसु।

तुम्ह बिनु भरतहि भूपतिहि प्रजहि प्रचंड कलेसु ॥ ५५ ॥

जौं केवल पितु आयसु ताता। तौ जनि जाहु जानि बडि माता ॥  
 जौं पितु मातु कहेउ बन जाना। तौं कानन सत अवध समाना ॥  
 पितु बनदेव मातु बनदेवी। खग मृग चरन सरोरुह सेवी ॥  
 अंतहुँ उचित नृपहि बनवासू। बय बिलोकि हियँ होइ हरँसू ॥  
 बडभागी बनू अवध अभागी। जो रघुवंसतिलक तुम्ह त्यागी ॥  
 जौं सुत कहौ संग मोहि लेहू। तुम्हरे हृदयँ होइ संदेहू ॥  
 पूत परम प्रिय तुम्ह सबही के। प्रान प्रान के जीवन जी के ॥  
 ते तुम्ह कहहु मातु बन जाऊँ। मै सुनि बचन बैठि पछिताऊँ ॥

दो. यह विचारि नहिं करउँ हठ झूठ सनेहु बढाइ।

मानि मातु कर नात बलि सुरति बिसरि जनि जाइ ॥ ५६ ॥

देव पितर सब तुन्हहि गोसाई। राखहुँ पलक नयन की नाई ॥  
 अवधि अंबु प्रिय परिजन मीना। तुम्ह करुनाकर धरम धुरीना ॥  
 अस विचारि सोइ करहु उपाई। सबहि जिअत जेहि भेंटहु आई ॥  
 जाहु सुखेन बनहि बलि जाऊँ। करि अनाथ जन परिजन गाऊँ ॥  
 सब कर आजु सुकृत फल बीता। भयउ कराल कालु बिपरीता ॥  
 बहुविधि बिलपि चरन लपटानी। परम अभागिनि आपुहि जानी ॥  
 दारुन दुसह दाहु उर ब्यापा। बरनि न जाहिं बिलाप कलापा ॥  
 राम उठाइ मातु उर लाई। कहि मृदु बचन बहुरि समुझाई ॥

दो. समाचार तेहि समय सुनि सीय उठी अकुलाइ।

जाइ सासु पद कमल जुग बंदि बैठि सिरु नाइ ॥ ५७ ॥

दीन्हि असीस सासु मृदु बानी। अति सुकुमारि देखि अकुलानी ॥

बैठि नमितमुख सोचति सीता। रूप रासि पति प्रेम पुनीता ॥  
 चलन चहत बन जीवननाथू। केहि सुकृती सन होइहि साथू ॥  
 की तनु प्रान कि केवल प्राना। विधि करतबु कछु जाइ न जाना ॥  
 चारु चरन नख लेखति धरनी। नूपुर मुखर मधुर कवि बरनी ॥  
 मनहुँ प्रेम बस बिनती करहीं। हमहि सीय पद जनि परिहरहीं ॥  
 मंजु बिलोचन मोचति बारी। बोली देखि राम महतारी ॥  
 तात सुनहु सिय अति सुकुमारी। सासु ससुर परिजनहि पिआरी ॥

दो. पिता जनक भूपाल मनि ससुर भानुकुल भानु।

पति रविकुल कैरव विपिन विधु गुन रूप निधानु ॥ ५८ ॥

मैं पुनि पुत्रबधू प्रिय पाई। रूप रासि गुन सील सुहाई ॥  
 नयन पुतरि करि प्रीति बढ़ाई। राखेउँ प्रान जानिकिहिं लाई ॥  
 कलपबेलि जिमि बहुविधि लाली। सीचि सनेह सलिल प्रतिपाली ॥  
 फूलत फलत भयउ विधि बामा। जानि न जाइ काह परिनामा ॥  
 पलँग पीठ तजि गोद हिंडोरा। सियँ न दीन्ह पगु अवनि कठोरा ॥  
 जिअनमूरि जिमि जोगवत रहऊँ। दीप बाति नहिं टारन कहऊँ ॥  
 सोइ सिय चलन चहत बन साथ। आयसु काह होइ रघुनाथा।  
 चंद किरन रस रसिक चकोरी। रवि रुख नयन सकइ किमि जोरी ॥

दो. करि केहरि निसिचर चरहिं दुष्ट जंतु बन भूरी।

विष बाटिकाँ कि सोह सुत सुभग सजीवनि मूरि ॥ ५९ ॥

बन हित कोल किरात किसोरी। रचीं बिरंचि विषय सुख भोरी ॥  
 पाइन कृमि जिमि कठिन सुभाऊ। तिन्हहि कलेसु न कानन काऊ ॥  
 कै तापस तिय कानन जोगू। जिन्ह तप हेतु तजा सब भोगू ॥  
 सिय बन बसिहि तात केहि भाँती। चित्रलिखित कपि देखि डेराती ॥  
 सुरसर सुभग बनज बन चारी। डाबर जोगु कि हंसकुमारी ॥  
 अस बिचारि जस आयसु होई। मैं सिख देउँ जानिकिहि सोई ॥  
 जौं सिय भवन रहै कह अंबा। मोहि कहँ होइ बहुत अवलंबा ॥  
 सुनि रघुबीर मातु प्रिय बानी। सील सनेह सुधाँ जनु सानी ॥

दो. कहि प्रिय बचन बिबेकमय कीन्हि मातु परितोष।

लगे प्रबोधन जानिकिहि प्रगटि विपिन गुन दोष ॥ ६० ॥

मासपारायण, चौदहवाँ विश्राम

मातु समीप कहत सकुचाहीं। बोले समउ समुझि मन माहीं ॥  
 राजकुमारि सिखावन सुनहू। आन भाँति जियँ जनि कछु गुनहू ॥  
 आपन मोर नीक जौँ चहहू। बचनु हमार मानि गृह रहहू ॥  
 आयसु मोर सासु सेवकाई। सब बिधि भामिनि भवन भलाई ॥  
 एहि ते अधिक धरमु नहिँ दूजा। सादर सासु ससुर पद पूजा ॥  
 जब जब मातु करिहि सुधि मोरी। होइहि प्रेम विकल मति भोरी ॥  
 तब तब तुम्ह कहि कथा पुरानी। सुंदरि समुझापहु मृदु बानी ॥  
 कहउँ सुभायँ सपथ सत मोही। सुमुखि मातु हित राखउँ तोही ॥

दो. गुर श्रुति संमत धरम फलु पाइअ विनहिँ कलेस।

हठ बस सब संकट सहे गालव नहुष नरेस ॥ ६१ ॥

मैं पुनि करि प्रवान पितु बानी। बेगि फिरव सुनु सुमुखि सयानी ॥  
 दिवस जात नहिँ लागिहि बारा। सुंदरि सिखवनु सुनहु हमारा ॥  
 जौ हठ करहु प्रेम बस बामा। तौ तुम्ह दुखु पाउब परिनामा ॥  
 काननु कठिन भयंकरु भारी। घोर घामु हिम बारि बयारी ॥  
 कुस कंटक मग काँकर नाना। चलव पयादेहिँ विनु पदत्राना ॥  
 चरन कमल मुदु मंजु तुम्हारे। मारग अगम भूमिधर भारे ॥  
 कंदर खोह नदी नद नारे। अगम अगाध न जाहिँ निहारे ॥  
 भालु बाघ बृक केहरि नागा। करहिँ नाद सुनि धीरजु भागा ॥

दो. भूमि सयन बलकल बसन असनु कंद फल मूल।

ते कि सदा सब दिन मिलिहिँ सबुइ समय अनुकूल ॥ ६२ ॥

नर अहार रजनीचर चरहीं। कपट बेष बिधि कोटिक करहीं ॥  
 लागइ अति पहार कर पानी। बिपिन बिपति नहिँ जाइ बखानी ॥  
 ब्याल कराल बिहग बन घोरा। निसिचर निकर नारि नर चोरा ॥  
 डरपहिँ धीर गहन सुधि आएँ। मृगलोचनि तुम्ह भीरु सुभाएँ ॥  
 हंसगवनि तुम्ह नहिँ बन जोगू। सुनि अपजसु मोहि देइहि लोगू ॥  
 मानस सलिल सुधौँ प्रतिपाली। जिअइ कि लवन पयोधि मराली ॥  
 नव रसाल बन बिहरनसीला। सोह कि कोकिल बिपिन करीला ॥  
 रहहु भवन अस हृदयँ बिचारी। चंदबदनि दुखु कानन भारी ॥

दो. सहज सुहृद गुर स्वामि सिख जो न करइ सिर मानि ॥

सो पछिताइ अघाइ उर अवसि होइ हित हानि ॥ ६३ ॥

सुनि मृदु बचन मनोहर पिय के। लोचन ललित भरे जल सिय के ॥  
 सीतल सिख दाहक भइ कैसैं। चकइहि सरद चंद निसि जैसैं ॥  
 उतरु न आव बिकल बैदेही। तजन चहत सुचि स्वामि सनेही ॥  
 बरबस रोकि बिलोचन बारी। धरि धीरजु उर अवनिकुमारी ॥  
 लागि सासु पग कह कर जोरी। छमबि देबि बडि अबिनय मोरी ॥  
 दीन्हि प्रानपति मोहि सिख सोई। जेहि बिधि मोर परम हित होई ॥  
 मैं पुनि समुझि दीखि मन माहीं। पिय बियोग सम दुखु जग नाहीं ॥

दो. प्राननाथ करुनायतन सुंदर सुखद सुजान।

तुम्ह बिनु रघुकुल कुमुद बिधु सुरपुर नरक समान ॥ ६४ ॥

मातु पिता भगिनी प्रिय भाई। प्रिय परिवारु सुहृद समुदाई ॥  
 सासु ससुर गुर सजन सहाई। सुत सुंदर सुसील सुखदाई ॥  
 जहँ लागि नाथ नेह अरु नाते। पिय बिनु तियहि तरनिहु ते ताते ॥  
 तनु धनु धामु धरनि पुर राजू। पति बिहीन सबु सोक समाजू ॥  
 भोग रोगसम भूषन भारू। जम जातना सरिस संसारू ॥  
 प्राननाथ तुम्ह बिनु जग माहीं। मो कहुँ सुखद कतहुँ कछु नाहीं ॥  
 जिय बिनु देह नदी बिनु बारी। तैसिअ नाथ पुरुष बिनु नारी ॥  
 नाथ सकल सुख साथ तुम्हारें। सरद विमल बिधु बदनु निहारें ॥

दो. खग मृग परिजन नगरु बनु बलकल विमल दुकूल।

नाथ साथ सुरसदन सम परनसाल सुख मूल ॥ ६५ ॥

बनदेवी बनदेव उदारा। करिहहिं सासु ससुर सम सारा ॥  
 कुस किसलय साथरी सुहाई। प्रभु सँग मंजु मनोज तुराई ॥  
 कंद मूल फल अमिअ अहारू। अवध सौध सत सरिस पहारू ॥  
 छिनु छिनु प्रभु पद कमल बिलोकि। रहिहउँ मुदित दिवस जिमि कोकी ॥  
 बन दुख नाथ कहे बहुतेरे। भय बिषाद परिताप घनेरे ॥  
 प्रभु बियोग लवलेस समाना। सब मिलि होहि न कृपानिधाना ॥  
 अस जियँ जानि सुजान सिरोमनि। लेइअ संग मोहि छाडिअ जनि ॥  
 विनती बहुत करौं का स्वामी। करुनामय उर अंतरजामी ॥

दो. राखिअ अवध जो अवधि लागि रहत न जनिअहिं प्रान।

दीनबंधु संदर सुखद सील सनेह निधान ॥ ६६ ॥

मोहि मग चलत न होइहि हारी। छिनु छिनु चरन सरोज निहारी ॥

सबहि भाँति पिय सेवा करिहौं। मारग जनित सकल श्रम हरिहौं ॥  
 पाय पखारी बैठि तरु छाहीं। करिहउँ बाउ मुदित मन माहीं ॥  
 श्रम कन सहित स्याम तनु देखें। कहँ दुख समउ प्रानपति पेखें ॥  
 सम महि तृन तरुपल्लव डासी। पाग पलोटिहि सब निसि दासी ॥  
 बारबार मूदु मूरति जोही। लागहि तात बयारि न मोही।  
 को प्रभु सँग मोहि चितवनिहारा। सिंघबधुहि जिमि ससक सिआरा ॥  
 मैं सुकुमारि नाथ बन जोगू। तुम्हहि उचित तप मो कहँ भोगू ॥

दो. ऐसेउ बचन कठोर सुनि जौं न हृदउ बिलगान।

तौ प्रभु विषम बियोग दुख सहिहहिँ पावँर प्रान ॥ ६७ ॥

अस कहि सीय बिकल भइ भारी। बचन बियोगु न सकी सँभारी ॥  
 देखि दसा रघुपति जियँ जाना। हठि राखें नहिँ राखिहि प्राना ॥  
 कहेउ कृपाल भानुकुलनाथा। परिहरि सोचु चलहु बन साथी ॥  
 नहिँ विषाद कर अवसरु आजू। बेगि करहु बन गवन समाजू ॥  
 कहि प्रिय बचन प्रिया समुझाई। लगे मातु पद आसिष पाई ॥  
 बेगि प्रजा दुख मेटव आई। जननी निठुर बिसरि जनि जाई ॥  
 फिरहि दसा विधि बहुरि कि मोरी। देखिहउँ नयन मनोहर जोरी ॥  
 सुदिन सुघरी तात कब होइहि। जननी जिअत बदन बिधु जोइहि ॥

दो. बहुरि बच्छ कहि लालु कहि रघुपति रघुबर तात।

कबहिँ बोलाइ लगाइ हियँ हरषि निरखिहउँ गात ॥ ६८ ॥

लखि सनेह कातरि महतारी। बचनु न आव बिकल भइ भारी ॥  
 राम प्रबोधु कीन्ह विधि नाना। समउ सनेहु न जाइ बखाना ॥  
 तब जानकी सासु पग लागी। सुनिअ माय मैं परम अभागी ॥  
 सेवा समय दैअँ बनू दीन्हा। मोर मनोरथु सफल न कीन्हा ॥  
 तजब छोभु जनि छाडिअ छोहू। करमु कठिन कछु दोसु न मोहू ॥  
 सुनि सिय बचन सासु अकुलानी। दसा कवनि विधि कहौ बखानी ॥  
 बारहि बार लाइ उर लीन्ही। धरि धीरजु सिख आसिष दीन्ही ॥  
 अचल होउ अहिवातु तुम्हारा। जब लगि गंग जमुन जल धारा ॥

दो. सीतहि सासु असीस सिख दीन्हि अनेक प्रकार।

चली नाइ पद पदुम सिरु अति हित बारहिँ बार ॥ ६९ ॥

समाचार जब लछिमन पाए। व्याकुल बिलख बदन उठि धाए ॥

कंप पुलक तन नयन सनीरा। गहे चरन अति प्रेम अधीरा ॥  
 कहि न सकत कछु चितवत ठाढे। मीनु दीन जनु जल तें काढे ॥  
 सोचु हृदयँ बिधि का होनिहारा। सबु सुखु सुकृत सिरान हमारा ॥  
 मो कहँ काह कहब रघुनाथा। रखिहहिं भवन कि लेहहिं साथा ॥  
 राम बिलोकि बंधु कर जोरें। देह गेह सब सन तनु तोरें ॥  
 बोले बचनु राम नय नागर। सील सनेह सरल सुख सागर ॥  
 तात प्रेम बस जनि कदराहू। समुझि हृदयँ परिनाम उछाहू ॥

दो. मातु पिता गुरु स्वामि सिख सिर धरि करहि सुभायँ।  
 लहेउ लाभु तिन्ह जनम कर नतरु जनमु जग जायँ ॥ ७० ॥

अस जियँ जानि सुनहु सिख भाई। करहु मातु पितु पद सेवकाई ॥  
 भवन भरतु रिपुसूदन नाही। राउ वृद्ध मम दुखु मन माहीं ॥  
 मैं बन जाउँ तुम्हहि लेइ साथा। होइ सबहि बिधि अवध अनाथा ॥  
 गुरु पितु मातु प्रजा परिवारू। सब कहँ परइ दुसह दुख भारू ॥  
 रहहु करहु सब कर परितोषू। नतरु तात होइहि बड़ दोषू ॥  
 जासु राज प्रिय प्रजा दुखारी। सो नृपु अवसि नरक अधिकारी ॥  
 रहहु तात असि नीति बिचारी। सुनत लखनु भए ब्याकुल भारी ॥  
 सिअरें बचन सूखि गए कैसैं। परसत तुहिन तामरसु जैसैं ॥

दो. उतरु न आवत प्रेम बस गहे चरन अकुलाइ।  
 नाथ दासु मैं स्वामि तुम्ह तजहु त काह बसाइ ॥ ७१ ॥

दीन्हि मोहि सिख नीकि गोसाई। लागि अगम अपनी कदराई ॥  
 नरबर धीर धरम धुर धारी। निगम नीति कहँ ते अधिकारी ॥  
 मैं सिसु प्रभु सनेहँ प्रतिपाला। मंदरु मेरु कि लेहिं मराला ॥  
 गुर पितु मातु न जानउँ काहू। कहउँ सुभाउ नाथ पतिआहू ॥  
 जहँ लागि जगत सनेह सगाई। प्रीति प्रतीति निगम निजु गाई ॥  
 मोरें सबइ एक तुम्ह स्वामी। दीनबंधु उर अंतरजामी ॥  
 धरम नीति उपदेसिअ ताही। कीरति भूति सुगति प्रिय जाही ॥  
 मन क्रम बचन चरन रत होई। कृपासिंधु परिहरिअ कि सोई ॥

दो. करुनासिंधु सुबंध के सुनि मृदु बचन बिनीत।  
 समुझाए उर लाइ प्रभु जानि सनेहँ सभीत ॥ ७२ ॥

मागहु बिदा मातु सन जाई। आवहु बेगि चलहु बन भाई ॥

मुदित भए सुनि रघुबर बानी। भयउ लाभ बड गइ बडि हानी ॥  
हरषित हृदयँ मातु पहि आए। मनहुँ अंध फिरि लोचन पाए।  
जाइ जननि पग नायउ माथा। मनु रघुनंदन जानकि साथी ॥  
पूँछे मातु मलिन मन देखी। लखन कही सब कथा बिसेषी ॥  
गई सहमि सुनि बचन कठोरा। मृगी देखि दव जनु चहु ओरा ॥  
लखन लखेउ भा अनरथ आजू। एहि सनेह बस करब अकाजू ॥  
मागत विदा सभय सकुचाहीं। जाइ संग विधि कहिहि कि नाही ॥

दो. समुझि सुमित्राँ राम सिय रूप सुसीलु सुभाउ।

नृप सनेहु लखि धुनेउ सिरु पापिनि दीन्ह कुदाउ ॥ ७३ ॥

धीरजु धरेउ कुअवसर जानी। सहज सुहृद बोली मृदु बानी ॥  
तात तुम्हारि मातु बैदेही। पिता रामु सब भाँति सनेही ॥  
अवध तहाँ जहँ राम निवासू। तहँई दिवसु जहँ भानु प्रकासू ॥  
जौ पै सीय रामु बन जाहीं। अवध तुम्हार काजु कछु नाहिँ ॥  
गुर पितु मातु बंधु सुर साई। सेइअहिँ सकल प्रान की नाई ॥  
रामु प्रानप्रिय जीवन जी के। स्वारथ रहित सरखा सबही कै ॥  
पूजनीय प्रिय परम जहाँ तें। सब मानिअहिँ राम के नातें ॥  
अस जियँ जानि संग बन जाहू। लेहु तात जग जीवन लाहू ॥

दो. भूरि भाग भाजनु भयहु मोहि समेत बलि जाउँ।

जौम तुम्हरें मन छाडि छलु कीन्ह राम पद ठाउँ ॥ ७४ ॥

पुत्रवती जुबती जग सोई। रघुपति भगतु जासु सुतु होई ॥  
नतरु बाँझ भलि बादि बिआनी। राम बिमुख सुत तें हित जानी ॥  
तुम्हरेहिँ भाग रामु बन जाहीं। दूसर हेतु तात कछु नाहीं ॥  
सकल सुकृत कर बड फलु एहू। राम सीय पद सहज सनेहू ॥  
राग रोषु इरिषा मदु मोहू। जनि सपनेहुँ इन्ह के बस होहू ॥  
सकल प्रकार बिकार बिहाई। मन क्रम बचन करेहु सेवकाई ॥  
तुम्ह कहुँ बन सब भाँति सुपासू। सँग पितु मातु रामु सिय जासू ॥  
जेहिँ न रामु बन लहहिँ कलेसू। सुत सोइ करेहु इहइ उपदेसू ॥

छं. उपदेसु यहु जेहिँ तात तुम्हरे राम सिय सुख पावहीं।

पितु मातु प्रिय परिवार पुर सुख सुरति बन बिसरावहीं।  
तुलसी प्रभुहि सिख देइ आयसु दीन्ह पुनि आसिष दर्ई।

रति होउ अबिरल अमल सिय रघुबीर पद नित नित नई ॥

सो. मातु चरन सिरु नाइ चले तुरत संकित हृदयँ।

बागुर विषम तोराइ मनहुँ भाग मृगु भाग बस ॥ ७५ ॥

गए लखनु जहँ जानकिनाथू। भे मन मुदित पाइ प्रिय साथू ॥  
 बंदि राम सिय चरन सुहाए। चले संग नृपमंदिर आए ॥  
 कहहिं परसपर पुर नर नारी। भलि बनाइ बिधि बात बिगारी ॥  
 तन कूस दुखु बदन मलीने। बिकल मनहुँ माखी मधु छीने ॥  
 कर मीजहिं सिरु धुनि पछिताहीं। जनु विन पंख बिहग अकुलाहीं ॥  
 भइ बडि भीर भूप दरबारा। बरनि न जाइ विषादु अपारा ॥  
 सचिवँ उठाइ राउ बैठारे। कहि प्रिय बचन रामु पगु धारे ॥  
 सिय समेत दोउ तनय निहारी। ब्याकुल भयउ भूमिपति भारी ॥

दो. सीय सहित सुत सुभग दोउ देखि देखि अकुलाइ।

बारहिं बार सनेह बस राउ लेइ उर लाइ ॥ ७६ ॥

सकइ न बोलि बिकल नरनाहू। सोक जनित उर दारुन दाहू ॥  
 नाइ सीसु पद अति अनुरागा। उठि रघुबीर बिदा तब मागा ॥  
 पितु असीस आयसु मोहि दीजै। हरष समय बिसमउ कत कीजै ॥  
 तात किएँ प्रिय प्रेम प्रमादू। जसु जग जाइ होइ अपवादू ॥  
 सुनि सनेह बस उठि नरनाहाँ। बैठारे रघुपति गहि बाहाँ ॥  
 सुनहु तात तुम्ह कहूँ मुनि कहहीं। रामु चराचर नायक अहहीं ॥  
 सुभ अरु असुभ करम अनुहारी। ईस देइ फल हृदयँ बिचारी ॥  
 करइ जो करम पाव फल सोई। निगम नीति असि कह सबु कोई ॥

दो. -औरु करै अपराधु कोउ और पाव फल भोगु।

अति बिचित्र भगवंत गति को जग जानै जोगु ॥ ७७ ॥

रायँ राम राखन हित लागी। बहुत उपाय किए छलु त्यागी ॥  
 लखी राम रुख रहत न जाने। धरम धुरंधर धीर सयाने ॥  
 तब नृप सीय लाइ उर लीन्ही। अति हित बहुत भाँति सिख दीन्ही ॥  
 कहि बन के दुख दुसह सुनाए। सासु ससुर पितु सुख समुझाए ॥  
 सिय मनु राम चरन अनुरागा। घरु न सुगमु बनु विषम न लागा ॥  
 औरउ सबहिं सीय समुझाई। कहि कहि बिपिन बिपति अधिकाई ॥  
 सचिव नारि गुर नारि सयानी। सहित सनेह कहहिं मृदु बानी ॥

तुम्ह कहूँ तौ न दीन्ह बनबासू। करहु जो कहहि ससुर गुर सासू ॥

दो. -सिख सीतलि हित मधुर मृदु सुनि सीतहि न सोहानि।  
सरद चंद चंदनि लगत जनु चकई अकुलानि ॥ ७८ ॥

सीय सकुच बस उतरु न देई। सो सुनि तमकि उठी कैकेई ॥  
मुनि पट भूषन भाजन आनी। आगे धरि बोली मृदु बानी ॥  
नृपहि प्रान प्रिय तुम्ह रघुबीरा। सील सनेह न छाडिहि भीरा ॥  
सुकृत सुजसु परलोकु नसाऊ। तुम्हहि जान बन कहिहि न काऊ ॥  
अस बिचारि सोइ करहु जो भावा। राम जननि सिख सुनि सुखु पावा ॥  
भूपहि बचन बानसम लागे। करहि न प्रान पयान अभागे ॥  
लोग बिकल मुरुछित नरनाहू। काह करिअ कछु सूझ न काहू ॥  
रामु तुरत मुनि वेषु बनाई। चले जनक जननिहि सिरु नाई ॥

दो. सजि बन साजु समाजु सबु बनिता बंधु समेत।  
बंदि विप्र गुर चरन प्रभु चले करि सबहि अचेत ॥ ७९ ॥

निकसि बसिष्ठ द्वार भए ठाढे। देखे लोग बिरह दव दाढे ॥  
कहि प्रिय बचन सकल समुझाए। विप्र बृंद रघुबीर बोलाए ॥  
गुर सन कहि बरषासन दीन्हे। आदर दान बिनय बस कीन्हे ॥  
जाचक दान मान संतोषे। मीत पुनीत प्रेम परितोषे ॥  
दासीं दास बोलाइ बहोरी। गुरहि सौंपि बोले कर जोरी ॥  
सब कै सार सँभार गोसाईं। करवि जनक जननी की नाई ॥  
बारहिं बार जोरि जुग पानी। कहत रामु सब सन मृदु बानी ॥  
सोइ सब भाँति मोर हितकारी। जेहि तें रहै भुआल सुखारी ॥

दो. मातु सकल मोरे बिरहँ जेहि न होहि दुख दीन।  
सोइ उपाउ तुम्ह करेहु सब पुर जन परम प्रवीन ॥ ८० ॥

एहि विधि राम सबहि समुझावा। गुर पद पदुम हरषि सिरु नावा।  
गनपती गौरि गिरीसु मनाई। चले असीस पाइ रघुराई ॥  
राम चलत अति भयउ विषादू। सुनि न जाइ पुर आरत नादू ॥  
कुसगुन लंक अवध अति सोकू। हहरष बिषाद विवस सुरलोकू ॥  
गइ मुरुछा तब भूपति जागे। बोलि सुमंत्रु कहन अस लागे ॥  
रामु चले बन प्रान न जाहीं। केहि सुख लागि रहत तन माहीं।  
एहि तें कवन व्यथा बलवाना। जो दुखु पाइ तजहिं तनु प्राना ॥

पुनि धरि धीर कहइ नरनाहू। लै रथु संग सखा तुम्ह जाहू ॥

दो. -सुठि सुकुमार कुमार दोउ जनकसुता सुकुमारि।

रथ चढाइ देखराइ बनु फिरेहु गएँ दिन चारि ॥ ८१ ॥

जौ नहिं फिरहिं धीर दोउ भाई। सत्यसंध दृढब्रत रघुराई ॥

तौ तुम्ह बिनय करेहु कर जोरी। फेरिअ प्रभु मिथिलेसकिसोरी ॥

जब सिय कानन देखि डेराई। कहेहु मोरि सिख अवसरु पाई ॥

सासु ससुर अस कहेउ सँदेसू। पुत्रि फिरिअ बन बहुत कलेसू ॥

पितृगृह कबहुँ कबहुँ ससुरारी। रहेहु जहाँ रुचि होइ तुम्हारी ॥

एहि विधि करेहु उपाय कदंबा। फिरइ त होइ प्रान अवलंबा ॥

नाहिं त मोर मरनु परिनामा। कछु न बसाइ भएँ विधि बामा ॥

अस कहि मुरुछि परा महि राऊ। रामु लखनु सिय आनि देखाऊ ॥

दो. -पाइ रजायसु नाइ सिरु रथु अति बेग बनाइ।

गयउ जहाँ बाहेर नगर सीय सहित दोउ भाइ ॥ ८२ ॥

तब सुमंत्र नृप बचन सुनाए। करि बिनती रथ रामु चढाए ॥

चढि रथ सीय सहित दोउ भाई। चले हृदयँ अवधहि सिरु नाई ॥

चलत रामु लखि अवध अनाथा। बिकल लोग सब लागे साथा ॥

कृपासिंधु बहुविधि समुझावहिं। फिरहिं प्रेम बस पुनि फिरि आवहिं ॥

लागति अवध भयावनि भारी। मानहुँ कालराति अँधिआरी ॥

घोर जंतु सम पुर नर नारी। डरपहिं एकहि एक निहारी ॥

घर मसान परिजन जनु भूता। सुत हित मीत मनहुँ जमदूता ॥

बागन्ह बिटप बेलि कुम्हिलाहीं। सरित सरोवर देखि न जाहीं ॥

दो. हय गय कोटिन्ह केलिमृग पुरपसु चातक मोर।

पिक रथांग सुक सारिका सारस हंस चकोर ॥ ८३ ॥

राम बियोग बिकल सब ठाढे। जहँ तहँ मनहुँ चित्र लिखि काढे ॥

नगरु सफल बनु गहबर भारी। खग मृग बिपुल सकल नर नारी ॥

विधि कैकेई किरातिनि कीन्ही। जेंहि दव दुसह दसहुँ दिसि दीन्ही ॥

सहि न सके रघुबर बिरहागी। चले लोग सब ब्याकुल भागी ॥

सबहिं बिचार कीन्ह मन माहीं। राम लखन सिय विनु सुखु नाहीं ॥

जहाँ रामु तहँ सबुइ समाजू। विनु रघुबीर अवध नहिं काजू ॥

चले साथ अस मंत्रु दृढाई। सुर दुर्लभ सुख सदन बिहाई ॥

राम चरन पंकज प्रिय जिन्हही। विषय भोग बस करहिं कि तिन्हही ॥

दो. बालक वृद्ध विहाइ गूँह लगे लोग सब साथ।

तमसा तीर निवासु किय प्रथम दिवस रघुनाथ ॥ ८४ ॥

रघुपति प्रजा प्रेमबस देखी। सद्य हृदयँ दुखु भयउ बिसेषी ॥

करुनामय रघुनाथ गोसाँई। बेगि पाइअहिं पीर पराई ॥

कहि सप्रेम मृदु बचन सुहाए। बहुविधि राम लोग समुझाए ॥

किए धरम उपदेस घनेरे। लोग प्रेम बस फिरहिं न फेरे ॥

सीलु सनेहु छाडि नहिं जाई। असमंजस बस भे रघुराई ॥

लोग सोग श्रम बस गए सोई। कछुक देवमायाँ मति मोई ॥

जबहिं जाम जुग जामिनि बीती। राम सचिव सन कहेउ सप्रीती ॥

खोज मारि रथु हाँकहु ताता। आन उपायँ बनिहि नहिं बाता ॥

दो. राम लखन सुय जान चढि संभु चरन सिरु नाइ ॥

सचिवँ चलायउ तुरत रथु इत उत खोज दुराइ ॥ ८५ ॥

जागे सकल लोग भएँ भोरू। गे रघुनाथ भयउ अति सोरू ॥

रथ कर खोज कतहहुँ नहिं पावहिं। राम राम कहि चहु दिसि धावहिं ॥

मनहुँ बारिनिधि बूड जहाजू। भयउ विकल बड बनिक समाजू ॥

एकहि एक देंहिं उपदेसू। तजे राम हम जानि कलेसू ॥

निंदहिं आपु सराहहिं मीना। धिग जीवनु रघुवीर बिहीना ॥

जौँ पै प्रिय बियोगु बिधि कीन्हा। तौ कस मरनु न मागें दीन्हा ॥

एहि विधि करत प्रलाप कलापा। आए अवध भरे परितापा ॥

बिषम बियोगु न जाइ बखाना। अवधि आस सब राखहिं प्राना ॥

दो. राम दरस हित नेम ब्रत लगे करन नर नारि।

मनहुँ कोक कोकी कमल दीन बिहीन तमारि ॥ ८६ ॥

सीता सचिव सहित दोउ भाई। सुंगबेरपुर पहुँचे जाई ॥

उतरे राम देवसरि देखी। कीन्ह दंडवत हरषु बिसेषी ॥

लखन सचिवँ सियँ किए प्रनामा। सबहि सहित सुखु पायउ रामा ॥

गंग सकल मुद मंगल मूला। सब सुख करनि हरनि सब सूला ॥

कहि कहि कोटिक कथा प्रसंगा। रामु बिलोकहिं गंग तरंगा ॥

सचिवहि अनुजहि प्रियहि सुनाई। बिबुध नदी महिमा अधिकाई ॥

मज्जनु कीन्ह पंथ श्रम गयऊ। सुचि जलु पिअत मुदित मन भयऊ ॥

सुमिरत जाहि मिटइ श्रम भारू। तेहि श्रम यह लौकिक ब्यवहारू ॥

दो. सुध्द सचिदानंदमय कंद भानुकुल केतु।

चरित करत नर अनुहरत संसृति सागर सेतु ॥ ८७ ॥

यह सुधि गुहँ निषाद जब पाई। मुदित लिए प्रिय बंधु बोलाई ॥  
 लिए फल मूल भेंट भरि भारा। मिलन चलेउ हिँयँ हरषु अपारा ॥  
 करि दंडवत भेंट धरि आगें। प्रभुहि बिलोकत अति अनुरागें ॥  
 सहज सनेह बिबस रघुराई। पूँछी कुसल निकट बैठई ॥  
 नाथ कुसल पद पंकज देखें। भयउँ भागभाजन जन लेखें ॥  
 देव धरनि धनु धामु तुम्हारा। मैं जनु नीचु सहित परिवारा ॥  
 कृपा करिअ पुर धारिअ पाऊ। थापिय जनु सबु लोगु सिहाऊ ॥  
 कहेहु सत्य सबु सखा सुजाना। मोहि दीन्ह पितु आयसु आना ॥

दो. बरष चारिदस बासु बन मुनि व्रत बेषु अहारू।

ग्राम बासु नहिँ उचित सुनि गुहहि भयउ दुखु भारू ॥ ८८ ॥

राम लखन सिय रूप निहारी। कहहिँ सप्रेम ग्राम नर नारी ॥  
 ते पितु मातु कहहु सखि कैसे। जिन्ह पठए बन बालक ऐसे ॥  
 एक कहहिँ भल भूपति कीन्हा। लोयन लाहु हमहि बिधि दीन्हा ॥  
 तब निषादपति उर अनुमाना। तरु सिंसुपा मनोहर जाना ॥  
 लै रघुनाथहिँ ठाउँ देखावा। कहेउ राम सब भौँति सुहावा ॥  
 पुरजन करि जोहारू घर आए। रघुवर संध्या करन सिधाए ॥  
 गुहँ सँवारि साँथरी डसाई। कुस किसलयमय मृदुल सुहाई ॥  
 सुचि फल मूल मधुर मृदु जानी। दोना भरि भरि राखेसि पानी ॥

दो. सिय सुमंत्र भ्राता सहित कंद मूल फल खाइ।

सयन कीन्ह रघुबंसमनि पाय पलोटत भाइ ॥ ८९ ॥

उठे लखनु प्रभु सोवत जानी। कहि सचिवहिँ सोवन मृदु बानी ॥  
 कल्लुक दूर सजि बान सरासन। जागन लगे बैठि वीरासन ॥  
 गुँह बोलाइ पाहरू प्रतीती। ठावँ ठाँव राखे अति प्रीती ॥  
 आपु लखन पहिँ बैठेउ जाई। कटि भाथी सर चाप चढाई ॥  
 सोवत प्रभुहिँ निहारि निषादू। भयउ प्रेम बस हृदयँ बिषादू ॥  
 तनु पुलकित जलु लोचन बहई। बचन सप्रेम लखन सन कहई ॥  
 भूपति भवन सुभायँ सुहावा। सुरपति सदनु न पटतर पावा ॥

मनिमय रचित चारु चौबारे। जनु रतिपति निज हाथ सँवारे ॥

दो. सुचि सुविचित्र सुभोगमय सुमन सुगंध सुबास।

पलँग मंजु मनिदीप जहँ सब विधि सकल सुपास ॥ ९० ॥

विविध बसन उपधान तुराई। छीर फेन मृदु बिसद सुहाई ॥

तहँ सिय रामु सयन निसि करहीं। निज छवि रति मनोज महु हरहीं ॥

ते सिय रामु साथरीं सोए। श्रमित बसन बिनु जाहिं न जोए ॥

मातु पिता परिजन पुरबासी। सखा सुसील दास अरु दासी ॥

जोगवहिं जिन्हहि प्रान की नाई। महि सोवत तेइ राम गोसाई ॥

पिता जनक जग बिदित प्रभाऊ। ससुर सुरेस सखा रघुराऊ ॥

रामचंदु पति सो बैदेही। सोवत महि विधि बाम न केही ॥

सिय रघुवीर कि कानन जोगू। करम प्रधान सत्य कह लोगू ॥

दो. कैकयनंदिनि मंदमति कठिन कुटिलपनु कीन्ह।

जेहीं रघुनंदन जानकिहि सुख अवसर दुखु दीन्ह ॥ ९१ ॥

भइ दिनकर कुल बिटप कुठारी। कुमति कीन्ह सब बिस्व दुखारी ॥

भयउ विषादु निषादहि भारी। राम सीय महि सयन निहारी ॥

बोले लखन मधुर मृदु बानी। ग्यान बिराग भगति रस सानी ॥

काहु न कोउ सुख दुख कर दाता। निज कृत करम भोग सबु भ्राता ॥

जोग बियोग भोग भल मंदा। हित अनहित मध्यम भ्रम फंदा ॥

जनमु मरनु जहँ लगि जग जालू। संपती बिपति करमु अरु कालू ॥

धरनि धामु धनु पुर परिवारू। सरगु नरकु जहँ लगि व्यवहारू ॥

देखिअ सुनिअ गुनिअ मन माहीं। मोह मूल परमारथु नाहीं ॥

दो. सपनें होइ भिखारि नृप रंकु नाकपति होइ।

जागें लाभु न हानि कछु तिमि प्रपंच जियँ जोइ ॥ ९२ ॥

अस बिचारि नहिं कीजा रोसू। काहुहि बादि न देइअ दोसू ॥

मोह निसाँ सबु सोवनिहारा। देखिअ सपन अनेक प्रकारा ॥

एहिं जग जामिनि जागहिं जोगी। परमारथी प्रपंच बियोगी ॥

जानिअ तबहिं जीव जग जागा। जब जब बिषय बिलास बिरागा ॥

होइ विवेकु मोह भ्रम भागा। तब रघुनाथ चरन अनुरागा ॥

सखा परम परमारथु एहू। मन क्रम बचन राम पद नेहू ॥

राम ब्रह्म परमारथ रूपा। अबिगत अलख अनादि अनूपा ॥

सकल बिकार रहित गतभेदा। कहि नित नेति निरूपहिं बेदा।

दो. भगत भूमि भूसुर सुरभि सुर हित लागि कृपाल।

करत चरित धरि मनुज तनु सुनत मिटहि जग जाल ॥ ९३ ॥

मासपारायण, पंद्रहवा विश्राम

सखा समुझि अस परिहरि मोहु। सिय रघुबीर चरन रत होहु ॥  
कहत राम गुन भा भिनुसारा। जागे जग मंगल सुखदारा ॥  
सकल सोच करि राम नहावा। सुचि सुजान बट छीर मगावा ॥  
अनुज सहित सिर जटा बनाए। देखि सुमंत्र नयन जल छाए ॥  
हृदयँ दाहु अति बदन मलीना। कह कर जोरि बचन अति दीना ॥  
नाथ कहेउ अस कोसलनाथा। लै रथु जाहु राम कें साथी ॥  
बनु देखाइ सुरसरि अन्हवाई। आनेहु फेरि बेगि दोउ भाई ॥  
लखनु रामु सिय आनेहु फेरी। संसय सकल संकोच निबेरी ॥

दो. नृप अस कहेउ गोसाईं जस कहइ करौं बलि सोइ।

करि बिनती पायन्ह परेउ दीन्ह बाल जिमि रोइ ॥ ९४ ॥

तात कृपा करि कीजिअ सोई। जातें अवध अनाथ न होई ॥  
मंत्रहि राम उठाइ प्रबोधा। तात धरम मतु तुम्ह सबु सोधा ॥  
सिबि दधीचि हरिचंद नरेसा। सहे धरम हित कोटि कलेसा ॥  
रंतिदेव बलि भूप सुजाना। धरमु धरेउ सहि संकट नाना ॥  
धरमु न दूसर सत्य समाना। आगम निगम पुरान बखाना ॥  
मैं सोइ धरमु सुलभ करि पावा। तजें तिहूँ पुर अपजसु छावा ॥  
संभावित कहूँ अपजस लाहू। मरन कोटि सम दारुन दाहू ॥  
तुम्ह सन तात बहुत का कहऊँ। दिहँ उतरु फिरि पातकु लहऊँ ॥

दो. पितु पद गहि कहि कोटि नति बिनय करब कर जोरि।

चिंता कवनिहु बात कै तात करिअ जनि मोरि ॥ ९५ ॥

तुम्ह पुनि पितु सम अति हित मोरें। बिनती करउँ तात कर जोरें ॥  
सब बिधि सोइ करतब्य तुम्हारें। दुख न पाव पितु सोच हमारें ॥  
सुनि रघुनाथ सचिव संबादू। भयउ सपरिजन बिकल निषादू ॥  
पुनि कछु लखन कही कटु बानी। प्रभु बरजे बड अनुचित जानी ॥  
सकुचि राम निज सपथ देवाई। लखन सँदेसु कहिअ जनि जाई ॥  
कह सुमंत्रु पुनि भूप सँदेसू। सहि न सकिहि सिय बिपिन कलेसू ॥

जेहि बिधि अवध आव फिरि सीया। सोइ रघुबरहि तुम्हहि करनीया ॥  
नतरु निपट अवलंब बिहीना। मैं न जिअब जिमि जल बिनु मीना ॥

दो. मइकें ससरें सकल सुख जबहिं जहाँ मनु मान ॥

तँह तब रहिहि सुखेन सिय जब लगि बिपति बिहान ॥ ९६ ॥

बिनती भूप कीन्ह जेहि भाँती। आरति प्रीति न सो कहि जाती ॥  
पितु सँदसु सुनि कृपानिधाना। सियहि दीन्ह सिख कोटि बिधाना ॥  
सासु ससुर गुर प्रिय परिवारू। फिरतु त सब कर मिटै खभारू ॥  
सुनि पति बचन कहति बैदेही। सुनहु प्रानपति परम सनेही ॥  
प्रभु करुनामय परम बिबेकी। तनु तजि रहति छाँह किमि छेंकी ॥  
प्रभा जाइ कहँ भानु बिहाई। कहँ चंद्रिका चंदु तजि जाई ॥  
पतिहि प्रेममय बिनय सुनाई। कहति सचिव सन गिरा सुहाई ॥  
तुम्ह पितु ससुर सरिस हितकारी। उतरु देउँ फिरि अनुचित भारी ॥

दो. आरति बस सनमुख भइउँ बिलगु न मानव तात।

आरजसुत पद कमल बिनु बादि जहाँ लगि नात ॥ ९७ ॥

पितु बैभव बिलास मैं डीठा। नृप मनि मुकुट मिलित पद पीठा ॥  
सुखनिधान अस पितु गृह मोरें। पिय बिहीन मन भाव न भोरें ॥  
ससुर चक्रवइ कोसलराऊ। भुवन चारिदस प्रगट प्रभाऊ ॥  
आगें होइ जेहि सुरपति लेई। अरध सिंघासन आसनु देई ॥  
ससुरु एतादस अवध निवासू। प्रिय परिवारु मातु सम सासू ॥  
बिनु रघुपति पद पदुम परागा। मोहि केउ सपनेहुँ सुखद न लागा ॥  
अगम पंथ बनभूमि पहारा। करि केहरि सर सरित अपारा ॥  
कोल किरात कुरंग बिहंगा। मोहि सब सुखद प्रानपति संग्गा ॥

दो. सासु ससुर सन मोरि हुँति बिनय करबि परि पायँ ॥

मोर सोचु जनि करिअ कछु मैं बन सुखी सुभायँ ॥ ९८ ॥

प्राननाथ प्रिय देवर साथा। वीर धुरीन धरें धनु भाथा ॥  
नहिं मग श्रमु भ्रमु दुख मन मोरें। मोहि लगि सोचु करिअ जनि भोरें ॥  
सुनि सुमंत्रु सिय सीतलि बानी। भयउ बिकल जनु फनि मनि हानी ॥  
नयन सूझ नहिं सुनइ न काना। कहि न सकइ कछु अति अकुलाना ॥  
राम प्रबोधु कीन्ह बहु भाँति। तदपि होति नहिं सीतलि छाती ॥  
जतन अनेक साथ हित कीन्हे। उचित उतर रघुनंदन दीन्हे ॥

मेटि जाइ नहिं राम रजाई। कठिन करम गति कछु न बसाई ॥  
राम लखन सिय पद सिरु नाई। फिरेउ बनिक जिमि मूर गवाँई ॥

दो. -रथ हाँकैउ हय राम तन हेरि हेरि हिहिनाहिं।

देखि निषाद बिषादबस धुनहिं सीस पछिताहिं ॥ ९९ ॥

जासु बियोग बिकल पसु ऐसे। प्रजा मातु पितु जीहहिं कैसें ॥  
बरबस राम सुमंत्रु पठाए। सुरसरि तीर आपु तब आए ॥  
मागी नाव न केवटु आना। कहइ तुम्हार मरमु मैं जाना ॥  
चरन कमल रज कहुँ सबु कहई। मानुष करनि मूरि कछु अहई ॥  
छुअत सिला भइ नारि सुहाई। पाहन तें न काठ कठिनाई ॥  
तरनिउ मुनि घरिनि होइ जाई। बाट परइ मोरि नाव उडाई ॥  
एहिं प्रतिपालउँ सबु परिवारू। नहिं जानउँ कछु अउर कबारू ॥  
जौ प्रभु पार अवसि गा चहहू। मोहि पद पदुम पखारन कहहू ॥

छं. पद कमल धोइ चढाइ नाव न नाथ उतराई चहाँ।

मोहि राम राउरि आन दसरथ सपथ सब साची कहौं ॥

बरु तीर मारहुँ लखनु पै जब लागि न पाय पखारिहौं।

तब लागि न तुलसीदास नाथ कृपाल पारु उतारिहौं ॥

सो. सुनि केवट के बैन प्रेम लपेटे अटपटे।

विहसे करुनाएन चितइ जानकी लखन तन ॥ १०० ॥

कृपासिंधु बोले मुसुकाई। सोइ करु जेहि तव नाव न जाई ॥  
वेगि आनु जल पाय पखारू। होत बिलंबु उतारहि पारू ॥  
जासु नाम सुमरत एक बारा। उतरहिं नर भवसिंधु अपारा ॥  
सोइ कृपालु केवटहि निहोरा। जेहिं जगु किय तिहु पगहु ते थोरा ॥  
पद नख निरखि देवसरि हरषी। सुनि प्रभु बचन मोहँ मति करषी ॥  
केवट राम रजायसु पावा। पानि कठवता भरि लेइ आवा ॥  
अति आनंद उमगि अनुरागा। चरन सरोज पखारन लागा ॥  
बरषि सुमन सुर सकल सिहाहीं। एहि सम पुन्यपुंज कोउ नाहीं ॥

दो. पद पखारि जलु पान करि आपु सहित परिवार।

पितर पारु करि प्रभुहि पुनि मुदित गयउ लेइ पार ॥ १०१ ॥

उतरि ठाड भए सुरसरि रेता। सीयराम गुह लखन समेता ॥  
केवट उतरि दंडवत कीन्हा। प्रभुहि सकुच एहि नहिं कछु दीन्हा ॥

पिय हिय की सिय जाननिहारी। मनि मुदरी मन मुदित उतारी ॥  
 कहेउ कृपाल लेहि उतराई। केवट चरन गहे अकुलाई ॥  
 नाथ आजु मैं काह न पावा। मिटे दोष दुख दारिद दावा ॥  
 बहुत काल मैं कीन्ह मजूरी। आजु दीन्ह बिधि बनि भलि भूरी ॥  
 अब कछु नाथ न चाहिअ मोरें। दीनदयाल अनुग्रह तोरें ॥  
 फिरती बार मोहि जे देवा। सो प्रसादु मैं सिर धरि लेवा ॥

दो. बहुत कीन्ह प्रभु लखन सियँ नहिं कछु केवटु लेइ।  
 बिदा कीन्ह करुनायतन भगति बिमल बरु देइ ॥ १०२ ॥

तब मज्जनु करि रघुकुलनाथा। पूजि पारथिव नायउ माथा ॥  
 सियँ सुरसरिहि कहेउ कर जोरी। मातु मनोरथ पुरउवि मोरी ॥  
 पति देवर संग कुसल बहोरी। आइ करौं जेहि पूजा तोरी ॥  
 सुनि सिय बिनय प्रेम रस सानी। भइ तब बिमल बारि बर बानी ॥  
 सुनु रघुबीर प्रिया बैदेही। तव प्रभाउ जग बिदित न केही ॥  
 लोकप होहि बिलोकत तोरें। तोहि सेवहिं सब सिधि कर जोरें ॥  
 तुम्ह जो हमहि बडि बिनय सुनाई। कृपा कीन्ह मोहि दीन्ह बडाई ॥  
 तदपि देवि मैं देवि असीसा। सफल होपन हित निज बागीसा ॥

दो. प्राननाथ देवर सहित कुसल कोसला आइ।  
 पूजहि सब मनकामना सुजसु रहिहि जग छाइ ॥ १०३ ॥

गंग बचन सुनि मंगल मूला। मुदित सीय सुरसरि अनुकुला ॥  
 तब प्रभु गुहहि कहेउ घर जाहू। सुनत सूख मुखु भा उर दाहू ॥  
 दीन बचन गुह कह कर जोरी। बिनय सुनहु रघुकुलमनि मोरी ॥  
 नाथ साथ रहि पंथु देखवाई। करि दिन चारि चरन सेवकाई ॥  
 जेहि बन जाइ रहब रघुराई। परनकुटी मैं करवि सुहाई ॥  
 तब मोहि कहँ जसि देव रजाई। सोइ करिहउँ रघुबीर दोहाई ॥  
 सहज सनेह राम लखि तासु। संग लीन्ह गुह हृदय हुलासू ॥  
 पुनि गुहँ ग्याति बोलि सब लीन्हे। करि परितोषु बिदा तब कीन्हे ॥

दो. तब गनपति सिव सुमिरि प्रभु नाइ सुरसरिहि माथ।  
 सखा अनुज सिया सहित बन गवनु कीन्ह रघुनाथ ॥ १०४ ॥

तेहि दिन भयउ विटप तर बासू। लखन सखाँ सब कीन्ह सुपासू ॥  
 प्रात प्रातकृत करि रघुसाई। तीरथराजु दीख प्रभु जाई ॥

सचिव सत्य श्रद्धा प्रिय नारी। माधव सरिस मीतु हितकारी ॥  
 चारि पदारथ भरा भँडारु। पुन्य प्रदेश देस अति चारु ॥  
 छेत्र अगम गढु गाढ सुहावा। सपनेहुँ नहिँ प्रतिपच्छिन्ह पावा ॥  
 सेन सकल तीरथ बर वीरा। कलुष अनीक दलन रनधीरा ॥  
 संगमु सिंहासन सुठि सोहा। छत्रु अखयबटु मुनि मनु मोहा ॥  
 चवैर जमुन अरु गंग तरंगा। देखि होहिँ दुख दारिद भंगा ॥

दो. सेवहिँ सुकृति साधु सुचि पावहिँ सब मनकाम।

बंदी बेद पुरान गन कहहिँ बिमल गुन ग्राम ॥ १०५ ॥

को कहि सकइ प्रयाग प्रभाऊ। कलुष पुंज कुंजर मृगराऊ ॥  
 अस तीरथपति देखि सुहावा। सुख सागर रघुबर सुखु पावा ॥  
 कहि सिय लखनहि सखहि सुनाई। श्रीमुख तीरथराज बडाई ॥  
 करि प्रनामु देखत बन बागा। कहत महातम अति अनुरागा ॥  
 एहि विधि आइ बिलोकी बेनी। सुमिरत सकल सुमंगल देनी ॥  
 मुदित नहाइ कीन्हि सिय सेवा। पुजि जथाविधि तीरथ देवा ॥  
 तब प्रभु भरद्वाज पहिँ आए। करत दंडवत मुनि उर लाए ॥  
 मुनि मन मोद न कछु कहि जाइ। ब्रह्मानंद रासि जनु पाई ॥

दो. दीन्हि असीस मुनीस उर अति अनंदु अस जानि।

लोचन गोचर सुकृत फल मनहुँ किए विधि आनि ॥ १०६ ॥

कुसल प्रसन्न करि आसन दीन्हे। पूजि प्रेम परिपूरन कीन्हे ॥  
 कंद मूल फल अंकुर नीके। दिए आनि मुनि मनहुँ अमी के ॥  
 सीय लखन जन सहित सुहाए। अति रुचि राम मूल फल खाए ॥  
 भए बिगतश्रम रामु सुखारे। भरद्वाज मूढु बचन उचारे ॥  
 आजु सुफल तपु तीरथ त्यागू। आजु सुफल जप जोग विरागू ॥  
 सफल सकल सुभ साधन साजू। राम तुम्हहि अवलोकत आजू ॥  
 लाभ अवधि सुख अवधि न दूजी। तुम्हारेँ दरस आस सब पूजी ॥  
 अब करि कृपा देहु बर एहू। निज पद सरसिज सहज सनेहू ॥

दो. करम बचन मन छाडि छलु जब लगि जनु न तुम्हार।

तब लगि सुखु सपनेहुँ नहीं किएँ कोटि उपचार ॥

सुनि मुनि बचन रामु सकुचाने। भाव भगति आनंद अधाने ॥  
 तब रघुबर मुनि सुजसु सुहावा। कोटि भाँति कहि सबहि सुनावा ॥

सो बड सो सब गुन गन गेहू। जेहि मुनीस तुम्ह आदर देहू ॥  
 मुनि रघुबीर परसपर नवहीं। बचन अगोचर सुखु अनुभवहीं ॥  
 यह सुधि पाइ प्रयाग निवासी। बटु तापस मुनि सिद्ध उदासी ॥  
 भरद्वाज आश्रम सब आए। देखन दसरथ सुअन सुहाए ॥  
 राम प्रनाम कीन्ह सब काहू। मुदित भए लहि लोयन लाहू ॥  
 देहिं असीस परम सुखु पाई। फिरे सराहत सुंदरताई ॥

दो. राम कीन्ह विश्राम निसि प्रात प्रयाग नहाइ।

चले सहित सिय लखन जन मुददित मुनिहि सिरु नाइ ॥ १०८ ॥

राम सप्रेम कहेउ मुनि पाहीं। नाथ कहिअ हम केहि मग जाहीं ॥  
 मुनि मन बिहसि राम सन कहहीं। सुगम सकल मग तुम्ह कहूँ अहहीं ॥  
 साथ लागि मुनि सिष्य बोलाए। सुनि मन मुदित पचासक आए ॥  
 सबन्हि राम पर प्रेम अपारा। सकल कहहि मगु दीख हमारा ॥  
 मुनि बटु चारि संग तब दीन्हे। जिन्ह बहु जनम सुकृत सब कीन्हे ॥  
 करि प्रनामु रिषि आयसु पाई। प्रमुदित हृदयँ चले रघुराई ॥  
 ग्राम निकट जब निकसहि जाई। देखहि दरसु नारि नर धाई ॥  
 होहि सनाथ जनम फलु पाई। फिरहि दुखित मनु संग पठाई ॥

दो. बिदा किए बटु विनय करि फिरे पाइ मन काम।

उतरि नहाए जमुन जल जो सरीर सम स्याम ॥ १०९ ॥

सुनत तीरवासी नर नारी। धाए निज निज काज बिसारी ॥  
 लखन राम सिय सुन्दरताई। देखि करहिं निज भाग्य बडाई ॥  
 अति लालसा बसहिं मन माहीं। नाउँ गाउँ बूझत सकुचाहीं ॥  
 जे तिन्ह महुँ बयबिरीध सयाने। तिन्ह करि जुगुति रामु पहिचाने ॥  
 सकल कथा तिन्ह सबहि सुनाई। बनहि चले पितु आयसु पाई ॥  
 सुनि सबिषाद सकल पछिताहीं। रानी रायँ कीन्ह भल नाही ॥  
 तेहि अवसर एक तापसु आवा। तेजपुंज लघुबयस सुहावा ॥  
 कवि अलखित गति बेषु बिरागी। मन क्रम बचन राम अनुरागी ॥

दो. सजल नयन तन पुलकि निज इष्टदेउ पहिचानि।

परेउ दंड जिमि धरनितल दसा न जाइ बखानि ॥ ११० ॥

राम सप्रेम पुलकि उर लावा। परम रंक जनु पारसु पावा ॥  
 मनहुँ प्रेमु परमारथु दोऊ। मिलत धरे तन कह सबु कोऊ ॥

बहुरि लखन पायन्ह सोइ लागा। लीन्ह उठाइ उमगि अनुरागा ॥  
 पुनि सिय चरन धूरि धरि सीसा। जननि जानि सिसु दीन्हि असीसा ॥  
 कीन्ह निषाद दंडवत तेही। मिलेउ मुदित लखि राम सनेही ॥  
 पिअत नयन पुट रूपु पियूषा। मुदित सुअसनु पाइ जिमि भूखा ॥  
 ते पितु मातु कहहु सखि कैसे। जिन्ह पठए बन बालक ऐसे ॥  
 राम लखन सिय रूपु निहारी। होहि सनेह बिकल नर नारी ॥

दो. तब रघुबीर अनेक बिधि सखहि सिखावनु दीन्ह।

राम रजायसु सीस धरि भवन गवनु तैँ कीन्ह ॥ १११ ॥

पुनि सियँ राम लखन कर जोरी। जमुनिहि कीन्ह प्रनामु बहोरी ॥  
 चले ससीय मुदित दोउ भाई। रबितनुजा कइ करत बडाई ॥  
 पथिक अनेक मिलहि मग जाता। कहहि सप्रेम देखि दोउ भ्राता ॥  
 राज लखन सब अंग तुम्हारें। देखि सोचु अति हृदय हमारें ॥  
 मारग चलहु पयादेहि पाएँ। ज्योतिषु झूठ हमारें भाएँ ॥  
 अगमु पंथ गिरि कानन भारी। तेहि महुँ साथ नारि सुकुमारी ॥  
 करि केहरि बन जाइ न जोई। हम सँग चलहि जो आयसु होई ॥  
 जाब जहाँ लागि तहँ पहुँचाई। फिरब बहोरि तुम्हहि सिरु नाई ॥

दो. एहि बिधि पूँछहि प्रेम बस पुलक गात जलु नैन।

कृपासिंधु फेरहि तिन्हहि कहि बिनीत मृदु बैन ॥ ११२ ॥

जे पुर गाँव बसहि मग माहीं। तिन्हहि नाग सुर नगर सिहाहीं ॥  
 केहि सुकृतीं केहि घरीं बसाए। धन्य पुन्यमय परम सुहाए ॥  
 जहँ जहँ राम चरन चलि जाहीं। तिन्ह समान अमरावति नाहीं ॥  
 पुन्यपुंज मग निकट निवासी। तिन्हहि सराहहि सुरपुरवासी ॥  
 जे भरि नयन बिलोकहि रामहि। सीता लखन सहित घनस्यामहि ॥  
 जे सर सरित राम अवगाहहि। तिन्हहि देव सर सरित सराहहि ॥  
 जेहि तरु तर प्रभु बैठहि जाई। करहि कलपतरु तासु बडाई ॥  
 परसि राम पद पदुम परागा। मानति भूमि भूरि निज भागा ॥

दो. छाँह करहि घन बिबुधगन बरषहि सुमन सिहाहिं।

देखत गिरि बन बिहग मृग रामु चले मग जाहिं ॥ ११३ ॥

सीता लखन सहित रघुराई। गाँव निकट जब निकसहि जाई ॥  
 सुनि सब बाल बृद्ध नर नारी। चलहिं तुरत गृहकाजु बिसारी ॥

राम लखन सिय रूप निहारी। पाइ नयनफलु होहि सुखारी ॥  
 सजल बिलोचन पुलक सरीरा। सब भए मगन देखि दोउ बीरा ॥  
 बरनि न जाइ दसा तिन्ह केरी। लहि जनु रंकन्ह सुरमनि ढेरी ॥  
 एकन्ह एक बोलि सिख देहीं। लोचन लाहु लेहु छन एहीं ॥  
 रामहि देखि एक अनुरागे। चितवत चले जाहिँ सँग लागे ॥  
 एक नयन मग छवि उर आनी। होहिँ सिथिल तन मन बर बानी ॥

दो. एक देखिं बट छाँह भलि डसि मृदुल तृन पात।

कहहिँ गवाँइअ छिनुकु श्रमु गवनब अबहिँ कि प्रात ॥ ११४ ॥

एक कलस भरि आनहिँ पानी। अँचइअ नाथ कहहिँ मृदु बानी ॥  
 सुनि प्रिय बचन प्रीति अति देखी। राम कृपाल सुसील बिसेषी ॥  
 जानी श्रमित सीय मन माहीं। घरिक बिलंबु कीन्ह बट छाहीं ॥  
 मुदित नारि नर देखहिँ सोभा। रूप अनूप नयन मनु लोभा ॥  
 एकटक सब सोहहिँ चहुँ ओरा। रामचंद्र मुख चंद चकोरा ॥  
 तरुन तमाल बरन तनु सोहा। देखत कोटि मदन मनु मोहा ॥  
 दामिनि बरन लखन सुठि नीके। नख सिख सुभग भावते जी के ॥  
 मुनिपट कटिन्ह कसैं तूनीरा। सोहहिँ कर कमलिनि धनु तीरा ॥

दो. जटा मुकुट सीसनि सुभग उर भुज नयन विसाल।

सरद परब विधु बदन बर लसत स्वेद कन जाल ॥ ११५ ॥

बरनि न जाइ मनोहर जोरी। सोभा बहुत थोरि मति मोरी ॥  
 राम लखन सिय सुंदरताई। सब चितवहिँ चित मन मति लाई ॥  
 थके नारि नर प्रेम पिआसे। मनहुँ मृगी मृग देखि दिआ से ॥  
 सीय समीप ग्रामतिय जाहीं। पूँछत अति सनेहँ सकुचाहीं ॥  
 बार बार सब लागहिँ पाएँ। कहहिँ बचन मृदु सरल सुभाएँ ॥  
 राजकुमारि बिनय हम करहीं। तिय सुभायँ कछु पूँछत डरहीं।  
 स्वामिनि अबिनय छमबि हमारी। बिलगु न मानब जानि गवाँरी ॥  
 राजकुअँर दोउ सहज सलोने। इन्ह तैं लही दुति मरकत सोने ॥

दो. स्यामल गौर किसोर बर सुंदर सुषमा ऐन।

सरद सर्वरीनाथ मुखु सरद सरोरुह नैन ॥ ११६ ॥

मासपारायण, सोलहवाँ विश्राम

नवान्हपारायण, चौथा विश्राम

कोटि मनोज लजावनिहारे। सुमुखि कहहु को आहिं तुम्हारे ॥  
 सुनि सनेहमय मंजुल बानी। सकुची सिय मन महुँ मुसुकानी ॥  
 तिन्हहि बिलोकि बिलोकति धरनी। दुहुँ सकोच सकुचित बरबरनी ॥  
 सकुचि सप्रेम बाल मृग नयनी। बोली मधुर बचन पिकबयनी ॥  
 सहज सुभाय सुभग तन गोरे। नामु लखनु लघु देवर मोरे ॥  
 बहुरि बदनु बिधु अंचल ढाँकी। पिय तन चितइ भौह करि बाँकी ॥  
 खंजन मंजु तिरिछे नयननि। निज पति कहेउ तिन्हहि सियँ सयननि ॥  
 भइ मुदित सब ग्रामबधूटीं। रंकन्ह राय रासि जनु लूटीं ॥

दो. अति सप्रेम सिय पायँ परि बहुबिधि देहिं असीस।

सदा सोहागिनि होहु तुम्ह जब लागि महि अहि सीस ॥ ११७ ॥

पारवती सम पतिप्रिय होहू। देवि न हम पर छाडव छोहू ॥  
 पुनि पुनि बिनय करिअ कर जोरी। जौँ एहि मारग फिरिअ बहोरी ॥  
 दरसनु देव जानि निज दासी। लखीं सीयँ सब प्रेम पिआसी ॥  
 मधुर बचन कहि कहि परितोषीं। जनु कुमुदिनीं कौमुदीं पोषीं ॥  
 तबहिं लखन रघुवर रुख जानी। पूँछेउ मगु लोगन्हि मृदु बानी ॥  
 सुनत नारि नर भए दुखारी। पुलकित गात बिलोचन बारी ॥  
 मिटा मोहु मन भए मलीने। बिधि निधि दीन्ह लेत जनु छीने ॥  
 समुझि करम गति धीरजु कीन्हा। सोधि सुगम मगु तिन्ह कहि दीन्हा ॥

दो. लखन जानकी सहित तब गवनु कीन्ह रघुनाथ।

फेरे सब प्रिय बचन कहि लिए लाइ मन साथ ॥ ११८ ॥ ५

फिरत नारि नर अति पछिताहीं। देअहि दोषु देहिं मन माहीं ॥  
 सहित बिषाद परसपर कहहीं। बिधि करतब उलटे सब अहहीं ॥  
 निपट निरंकुस निठुर निसंकू। जेहिं ससि कीन्ह सरुज सकलंकू ॥  
 रूख कलपतरु सागरु खारा। तेहिं पठए बन राजकुमारा ॥  
 जौँ पे इन्हहि दीन्ह बनबासू। कीन्ह बादि बिधि भोग बिलासू ॥  
 ए बिचरहिं मगु विनु पदत्राना। रचे बादि बिधि बाहन नाना ॥  
 ए महि परहिं डसि कुस पाता। सुभग सेज कत सृजत बिधाता ॥  
 तरुवर बास इन्हहि बिधि दीन्हा। धवल धाम रचि रचि श्रमु कीन्हा ॥

दो. जौँ ए मुनि पट धर जटिल सुंदर सुठि सुकुमार।

बिबिध भाँति भूषन बसन बादि किए करतार ॥ ११९ ॥

जौं ए कंद मूल फल खाहीं। बादि सुधादि असन जग माहीं ॥  
 एक कहहिं ए सहज सुहाए। आपु प्रगट भए विधि न बनाए ॥  
 जहँ लगि वेद कही विधि करनी। श्रवन नयन मन गोचर बरनी ॥  
 देखहु खोजि भुअन दस चारी। कहँ अस पुरुष कहाँ असि नारी ॥  
 इन्हहि देखि विधि मनु अनुरागा। पटतर जोग बनावै लागा ॥  
 कीन्ह बहुत श्रम ऐक न आए। तेहिं इरिषा बन आनि दुराए ॥  
 एक कहहिं हम बहुत न जानहिं। आपुहि परम धन्य करि मानहिं ॥  
 ते पुनि पुन्यपुंज हम लेखे। जे देखहिं देखिहहिं जिन्ह देखे ॥

दो. एहि विधि कहि कहि बचन प्रिय लेहिं नयन भरि नीर।

किमि चलिहहि मारग अगम सुठि सुकुमार सरीर ॥ १२० ॥

नारि सनेह विकल बस होहीं। चकई साँझ समय जनु सोहीं ॥  
 मृदु पद कमल कठिन मगु जानी। गहबरी हृदयँ कहहिं बर बानी ॥  
 परसत मृदुल चरन अरुनारे। सकुचति महि जिमि हृदय हमारे ॥  
 जौं जगदीस इन्हहि बनु दीन्हा। कस न सुमनमय मारगु कीन्हा ॥  
 जौं मागा पाइअ विधि पाहीं। ए रखिअहिं सखि आँखिन्ह माहीं ॥  
 जे नर नारि न अवसर आए। तिन्ह सिय रामु न देखन पाए ॥  
 सुनि सुरुप बूझहिं अकुलाई। अब लगि गए कहाँ लागि भाई ॥  
 समरथ धाइ बिलोकहिं जाई। प्रमुदित फिरहिं जनमफलु पाई ॥

दो. अबला बालक वृद्ध जन कर मीजहिं पछिताहि ॥

होहिं प्रेमबस लोग इमि रामु जहाँ जहँ जाहिं ॥ १२१ ॥

गाँव गाँव अस होइ अनंदू। देखि भानुकुल कैरव चंदू ॥  
 जे कछु समाचार सुनि पावहिं। ते नृप रानिहि दोसु लगावहिं ॥  
 कहहिं एक अति भल नरनाहू। दीन्ह हमहि जोइ लोचन लाहू ॥  
 कहहिं परस्पर लोग लोगार्ई। बातें सरल सनेह सुहाई ॥  
 ते पितु मातु धन्य जिन्ह जाए। धन्य सो नगरु जहाँ तें आए ॥  
 धन्य सो देसु सैलु बन गाऊँ। जहँ जहँ जाहिं धन्य सोइ ठाऊँ ॥  
 सुख पायउ बिरंचि रचि तेही। ए जेहि के सब भाँति सनेही ॥  
 राम लखन पथि कथा सुहाई। रही सकल मग कानन छाई ॥

दो. एहि विधि रघुकुल कमल रवि मग लोगन्ह सुख देत।

जाहिं चले देखत बिपिन सिय सौमित्रि समेत ॥ १२२ ॥

आगे रामु लखनु बने पाछें। तापस बेष बिराजत काछें ॥  
 उभय बीच सिय सोहति कैसे। ब्रह्म जीव बिच माया जैसे ॥  
 बहुरि कहउँ छवि जसि मन बसई। जनु मधु मदन मध्य रति लसई ॥  
 उपमा बहुरि कहउँ जियँ जोही। जनु बुध विधु बिच रोहिनि सोही ॥  
 प्रभु पद रेख बीच बिच सीता। धरति चरन मग चलति समीता ॥  
 सीय राम पद अंक बराएँ। लखन चलहि मगु दाहिन लाएँ ॥  
 राम लखन सिय प्रीति सुहाई। बचन अगोचर किमि कहि जाई ॥  
 खग मृग मगन देखि छवि होहीं। लिए चोरि चित राम बटोहीं ॥  
 दो. जिन्ह जिन्ह देखे पथिक प्रिय सिय समेत दोउ भाइ।

भव मगु अगमु अनंदु तेइ विनु श्रम रहे सिराइ ॥ १२३ ॥

अजहुँ जासु उर सपनेहुँ काऊ। बसहुँ लखनु सिय रामु बटाऊ ॥  
 राम धाम पथ पाइहि सोई। जो पथ पाव कबहुँ मुनि कोई ॥  
 तब रघुबीर श्रमित सिय जानी। देखि निकट बटु सीतल पानी ॥  
 तहँ बसि कंद मूल फल खाई। प्रात नहाइ चले रघुराई ॥  
 देखत बन सर सैल सुहाए। बालमीकि आश्रम प्रभु आए ॥  
 राम दीख मुनि बासु सुहावन। सुंदर गिरि काननु जलु पावन ॥  
 सरनि सरोज बिटप बन फूले। गुंजत मंजु मधुप रस भूले ॥  
 खग मृग विपुल कोलाहल करहीं। बिरहित वैर मुदित मन चरहीं ॥

दो. सुचि सुंदर आश्रमु निरखि हरषे राजिवनेन।

सुनि रघुवर आगमनु मुनि आगें आयउ लेन ॥ १२४ ॥

मुनि कहुँ राम दंडवत कीन्हा। आसिरबादु विप्रवर दीन्हा ॥  
 देखि राम छवि नयन जुडाने। करि सनमानु आश्रमहिं आने ॥  
 मुनिवर अतिथि प्रानप्रिय पाए। कंद मूल फल मधुर मगाए ॥  
 सिय सौमित्रि राम फल खाए। तब मुनि आश्रम दिए सुहाए ॥  
 बालमीकि मन आनँदु भारी। मंगल मूर्ति नयन निहारी ॥  
 तब कर कमल जोरि रघुराई। बोले बचन श्रवन सुखदाई ॥  
 तुम्ह त्रिकाल दरसी मुनिनाथा। बिस्व बदर जिमि तुम्हरें हाथा ॥  
 अस कहि प्रभु सब कथा बखानी। जेहि जेहि भौंति दीन्ह बनु रानी ॥

दो. तात बचन पुनि मातु हित भाइ भरत अस राउ।

मो कहुँ दरस तुम्हार प्रभु सबु मम पुन्य प्रभाउ ॥ १२५ ॥

देखि पाय मुनिराय तुम्हारे। भए सुकृत सब सुफल हमारे ॥  
 अब जहँ राउर आयसु होई। मुनि उदबेगु न पावै कोई ॥  
 मुनि तापस जिन्ह तें दुखु लहहीं। ते नरेस बिनु पावक दहहीं ॥  
 मंगल मूल बिप्र परितोषू। दहइ कोटि कुल भूसुर रोषू ॥  
 अस जियँ जानि कहिअ सोइ ठाऊँ। सिय सौमित्रि सहित जहँ जाऊँ ॥  
 तहँ रचि रुचिर परन तन साला। बासु करौ कछु काल कृपाला ॥  
 सहज सरल सुनि रघुबर बानी। साधु साधु बोले मुनि ग्यानी ॥  
 कस न कहहु अस रघुकुलकेतू। तुम्ह पालक संतत श्रुति सेतू ॥

छं. श्रुति सेतु पालक राम तुम्ह जगदीस माया जानकी।  
 जो सृजति जगु पालति हरति रूख पाइ कृपानिधान की ॥  
 जो सहससीसु अहीसु महिधरु लखनु सचराचर धनी।  
 सुर काज धरि नरराज तनु चले दलन खल निसिचर अनी ॥

सो. राम सरुप तुम्हार बचन अगोचर बुद्धिपर।  
 अबिगत अकथ अपार नेति नित निगम कह ॥ १२६ ॥

जगु पेखन तुम्ह देखनिहारे। विधि हरि संभु नचावनिहारे ॥  
 तेउ न जानहिं मरमु तुम्हारा। औरु तुम्हहि को जाननिहारा ॥  
 सोइ जानइ जेहि देहु जनाई। जानत तुम्हहि तुम्हइ होइ जाई ॥  
 तुम्हरिहि कृपाँ तुम्हहि रघुनंदन। जानहिं भगत भगत उर चंदन ॥  
 चिदानंदमय देह तुम्हारी। बिगत बिकार जान अधिकारी ॥  
 नर तनु धरेहु संत सुर काजा। कहहु करहु जस प्राकृत राजा ॥  
 राम देखि सुनि चरित तुम्हारे। जड मोहहिं बुध होहिं सुखारे ॥  
 तुम्ह जो कहहु करहु सबु साँचा। जस काछिअ तस चाहिअ नाचा ॥

दो. पूँछेहु मोहि कि रहौं कहँ मैं पूँछत सकुचाउँ।  
 जहँ न होहु तहँ देहु कहि तुम्हहि देखावौं ठाउँ ॥ १२७ ॥

सुनि मुनि बचन प्रेम रस साने। सकुचि राम मन महँ मुसुकाने ॥  
 बालमीकि हँसि कहहिं बहोरी। बानी मधुर अमिअ रस बोरी ॥  
 सुनहु राम अब कहउँ निकेता। जहाँ बसहु सिय लखन समेता ॥  
 जिन्ह के श्रवन समुद्र समाना। कथा तुम्हारि सुभग सरि नाना ॥  
 भरहिं निरंतर होहिं न पूरे। तिन्ह के हिय तुम्ह कहँ गृह रूरे ॥  
 लोचन चातक जिन्ह करि राखे। रहहिं दरस जलधर अभिलाषे ॥

निदरहिं सरित सिंधु सर भारी। रूप बिंदु जल होहिं सुखारी ॥  
तिन्ह के हृदय सदन सुखदायक। बसहु बंधु सिय सह रघुनायक ॥

दो. जसु तुम्हार मानस बिमल हंसिनि जीहा जासु।

मुकुताहल गुन गन चुनइ राम बसहु हियँ तासु ॥ १२८ ॥

प्रभु प्रसाद सुचि सुभग सुबासा। सादर जासु लहइ नित नासा ॥  
तुम्हहि निबेदित भोजन करहीं। प्रभु प्रसाद पट भूषन धरहीं ॥  
सीस नवहिं सुर गुरु द्विज देखी। प्रीति सहित करि बिनय बिसेषी ॥  
कर नित करहिं राम पद पूजा। राम भरोस हृदयँ नहि दूजा ॥  
चरन राम तीरथ चलि जाहीं। राम बसहु तिन्ह के मन माहीं ॥  
मंत्रराजु नित जपहिं तुम्हारा। पूजहिं तुम्हहि सहित परिवारा ॥  
तरपन होम करहिं बिधि नाना। बिप्र जेवाँइ देहिं बहु दाना ॥  
तुम्ह तें अधिक गुरहिं जियँ जानी। सकल भायँ सेवहिं सनमानी ॥

दो. सबु करि मागहिं एक फलु राम चरन रति होउ।

तिन्ह के मन मंदिर बसहु सिय रघुनंदन दोउ ॥ १२९ ॥

काम कोह मद मान न मोहा। लोभ न छोभ न राग न द्रोहा ॥  
जिन्ह के कपट दंभ नहिं माया। तिन्ह के हृदय बसहु रघुराया ॥  
सब के प्रिय सब के हितकारी। दुख सुख सरिस प्रसंसा गारी ॥  
कहहिं सत्य प्रिय बचन बिचारी। जागत सोवत सरन तुम्हारी ॥  
तुम्हहि छाडि गति दूसरि नाहीं। राम बसहु तिन्ह के मन माहीं ॥  
जननी सम जानहिं परनारी। धनु पराव बिष तें बिष भारी ॥  
जे हरषहिं पर संपति देखी। दुखित होहिं पर बिपति बिसेषी ॥  
जिन्हहि राम तुम्ह प्रानपिआरे। तिन्ह के मन सुभ सदन तुम्हारे ॥

दो. स्वामि सखा पितु मातु गुर जिन्ह के सब तुम्ह तात।

मन मंदिर तिन्ह के बसहु सीय सहित दोउ भ्रात ॥ १३० ॥

अवगुन तजि सब के गुन गहहीं। बिप्र धेनु हित संकट सहहीं ॥  
नीति निपुन जिन्ह कइ जग लीका। घर तुम्हार तिन्ह कर मनु नीका ॥  
गुन तुम्हार समुझइ निज दोसा। जेहि सब भाँति तुम्हार भरोसा ॥  
राम भगत प्रिय लागहिं जेही। तेहि उर बसहु सहित बैदेही ॥  
जाति पाँति धनु धरम बडाई। प्रिय परिवार सदन सुखदाई ॥  
सब तजि तुम्हहि रहइ उर लाई। तेहि के हृदयँ रहहु रघुराई ॥

सरगु नरकु अपवरगु समाना। जहँ तहँ देख धरें धनु बाना ॥  
करम बचन मन राउर चेरा। राम करहु तेहि कें उर डेरा ॥

दो. जाहि न चाहिअ कबहुँ कछु तुम्ह सन सहज सनेहु।  
बसहु निरंतर तासु मन सो राउर निज गेहु ॥ १३१ ॥

एहि विधि मुनिवर भवन देखाए। बचन सप्रेम राम मन भाए ॥  
कह मुनि सुनहु भानुकुलनायक। आश्रम कहउँ समय सुखदायक ॥  
चित्रकूट गिरि करहु निवासू। तहँ तुम्हार सब भाँति सुपासू ॥  
सैलु सुहावन कानन चारू। करि केहरि मृग बिहग बिहारू ॥  
नदी पुनीत पुरान बखानी। अत्रिप्रिया निज तपबल आनी ॥  
सुरसरि धार नाउँ मंदाकिनि। जो सब पातक पोतक डाकिनि ॥  
अत्रि आदि मुनिवर बहु बसहीं। करहिं जोग जप तप तन कसहीं ॥  
चलहु सफल श्रम सब कर करहु। राम देहु गौरव गिरिवरहु ॥

दो. चित्रकूट महिमा अमित कहीं महामुनि गाइ।  
आए नहाए सरित बर सिय समेत दोउ भाइ ॥ १३२ ॥

रघुवर कहेउ लखन भल घाटू। करहु कतहुँ अब ठाहर ठाटू ॥  
लखन दीख पय उतर करारा। चहुँ दिसि फिरेउ धनुष जिमि नारा ॥  
नदी पनच सर सम दम दाना। सकल कलुष कलि साउज नाना ॥  
चित्रकूट जनु अचल अहेरी। चुकइ न घात मार मुठभेरी ॥  
अस कहि लखन ठाउँ देखरावा। थलु बिलोकि रघुवर सुखु पावा ॥  
रमेउ राम मनु देवन्ह जाना। चले सहित सुर थपति प्रधाना ॥  
कोल किरात बेष सब आए। रचे परन तृन सदन सुहाए ॥  
बरनि न जाहि मंजु दुइ साला। एक ललित लघु एक बिसाला ॥

दो. लखन जानकी सहित प्रभु राजत रुचिर निकेत।  
सोह मदनु मुनि बेष जनु रति रितुराज समेत ॥ १३३ ॥

मासपारायण, सत्रहँवा विश्राम

अमर नाग किंनर दिसिपाला। चित्रकूट आए तेहि काला ॥  
राम प्रनामु कीन्ह सब काहू। मुदित देव लहि लोचन लाहू ॥  
बरषि सुमन कह देव समाजू। नाथ सनाथ भए हम आजू ॥  
करि बिनती दुख दुसह सुनाए। हरषित निज निज सदन सिधाए ॥  
चित्रकूट रघुनंदनु छाए। समाचार सुनि सुनि मुनि आए ॥

आवत देखि मुदित मुनिबृंदा। कीन्ह दंडवत रघुकुल चंदा ॥  
मुनि रघुवरहि लाइ उर लेहीं। सुफल होन हित आसिष देहीं ॥  
सिय सौमित्र राम छवि देखहिं। साधन सकल सफल करि लेखहिं ॥

दो. जथाजोग सनमानि प्रभु बिदा किए मुनिबृंद।

करहि जोग जप जाग तप निज आश्रमन्हि सुछंद ॥ १३४ ॥

यह सुधि कोल किरातन्ह पाई। हरषे जनु नव निधि घर आई ॥  
कंद मूल फल भरि भरि दोना। चले रंक जनु लूटन सोना ॥  
तिन्ह महुँ जिन्ह देखे दोउ भ्राता। अपर तिन्हहि पूँछहि मगु जाता ॥  
कहत सुनत रघुवीर निकार्ई। आइ सबन्हि देखे रघुआई ॥  
करहिं जोहारु भेंट धरि आगे। प्रभुहि बिलोकहि अति अनुरागे ॥  
चित्र लिखे जनु जहुँ तहुँ ठाढे। पुलक सरीर नयन जल बाढे ॥  
राम सनेह मगन सब जाने। कहि प्रिय बचन सकल सनमाने ॥  
प्रभुहि जोहारि बहोरि बहोरी। बचन बिनीत कहहिं कर जोरी ॥

दो. अब हम नाथ सनाथ सब भए देखि प्रभु पाय।

भाग हमारे आगमनु राउर कोसलराय ॥ १३५ ॥

धन्य भूमि बन पंथ पहारा। जहुँ जहुँ नाथ पाउ तुम्ह धारा ॥  
धन्य बिहग मृग काननचारी। सफल जनम भए तुम्हहि निहारी ॥  
हम सब धन्य सहित परिवारा। दीख दरसु भरि नयन तुम्हारा ॥  
कीन्ह वासु भल ठाउँ बिचारी। इहाँ सकल रितु रहब सुखारी ॥  
हम सब भाँति करब सेवकाई। करि केहरि अहि बाघ बराई ॥  
बन बेहड गिरि कंदर खोहा। सब हमार प्रभु पग पग जोहा ॥  
तहुँ तहुँ तुम्हहि अहेर खेलाउब। सर निरझर जलठाउँ देखाउब ॥  
हम सेवक परिवार समेता। नाथ न सकुचब आयसु देता ॥

दो. बेद बचन मुनि मन अगम ते प्रभु करुना ऐन।

बचन किरातन्ह के सुनत जिमि पितु बालक बैन ॥ १३६ ॥

रामहि केवल प्रेम पिआरा। जानि लेउ जो जाननिहारा ॥  
राम सकल बनचर तब तोषे। कहि मृदु बचन प्रेम परिपोषे ॥  
बिदा किए सिर नाइ सिधाए। प्रभु गुन कहत सुनत घर आए ॥  
एहि विधि सिय समेत दोउ भाई। बसहिं विपिन सुर मुनि सुखदाई ॥  
जब ते आइ रहे रघुनायकु। तब तें भयउ बन मंगलदायकु ॥

फूलहिं फलहिं बिटप बिधि नाना ॥ मंजु बलित बर बेलि बिताना ॥  
सुरतरु सरिस सुभायँ सुहाए। मनहुँ बिबुध बन परिहरि आए ॥  
गंज मंजुतर मधुकर श्रेनी। त्रिविध बयारि बहइ सुख देनी ॥

दो. नीलकंठ कलकंठ सुक चातक चक्र चकोर।

भाँति भाँति बोलहिं बिहग श्रवन सुखद चित चोर ॥ १३७ ॥

केरि केहरि कपि कोल कुरंगा। बिगतबैर बिचरहिं सब संग्गा ॥  
फिरत अहेर राम छवि देखी। होहिं मुदित मृगबंद बिसेषी ॥  
बिबुध बिपिन जहँ लगि जग माहीं। देखि राम बन सकल सिहाहीं ॥  
सुरसरि सरसइ दिनकर कन्या। मेकलसुता गोदावरि धन्या ॥  
सब सर सिंधु नदी नद नाना। मंदाकिनि कर करहिं बखाना ॥  
उदय अस्त गिरि अरु कैलासू। मंदर मेरु सकल सुरबासू ॥  
सैल हिमाचल आदिक जेते। चित्रकूट जसु गावहिं तेते ॥  
बिधि मुदित मन सुखु न समाई। श्रम बिनु बिपुल बडाई पाई ॥

दो. चित्रकूट के बिहग मृग बेलि बिटप तून जाति।

पुन्य पुंज सब धन्य अस कहहिं देव दिन राति ॥ १३८ ॥

नयनवंत रघुबरहि बिलोकी। पाइ जनम फल होहिं बिसोकी ॥  
परसि चरन रज अचर सुखारी। भए परम पद के अधिकारी ॥  
सो बन सैल सुभायँ सुहावन। मंगलमय अति पावन पावन ॥  
महिमा कहिअ कवनि बिधि तासू। सुखसागर जहँ कीन्ह निवासू ॥  
पय पयोधि तजि अवध बिहाई। जहँ सिय लखनु रामु रहे आई ॥  
कहि न सकहिं सुषमा जसि कानन। जौं सत सहस होंहिं सहसानन ॥  
सो मैं बरनि कहौं बिधि केहीं। डाबर कमठ कि मंदर लेहीं ॥  
सेवहिं लखनु करम मन बानी। जाइ न सीलु सनेहु बखानी ॥

दो. छिनु छिनु लखि सिय राम पद जानि आपु पर नेहु।

करत न सपनेहुँ लखनु चितु बंधु मातु पितु गेहु ॥ १३९ ॥

राम संग्ग सिय रहति सुखारी। पुर परिजन गृह सुरति बिसारी ॥  
छिनु छिनु पिय बिधु बदनु निहारी। प्रमुदित मनहुँ चकोरकुमारी ॥  
नाह नेहु नित बढत बिलोकी। हरषित रहति दिवस जिमि कोकी ॥  
सिय मनु राम चरन अनुरागा। अवध सहस सम बनु प्रिय लागा ॥  
परनकुटी प्रिय प्रियतम संग्गा। प्रिय परिवारु कुरंग बिहंगा ॥

सासु ससुर सम मुनितिय मुनिबर। असनु अमिअ सम कंद मूल फर ॥  
नाथ साथ साँथरी सुहाई। मयन सयन सय सम सुखदाई ॥  
लोकप होहिं बिलोकत जासू। तेहि कि मोहि सक बिषय बिलासू ॥

दो. -सुमिरत रामहि तजहि जन तृन सम बिषय बिलासु।

रामप्रिया जग जननि सिय कछु न आचरजु तासु ॥ १४० ॥

सीय लखन जेहि विधि सुखु लहहीं। सोइ रघुनाथ करहि सोइ कहहीं ॥  
कहहिं पुरातन कथा कहानी। सुनहिं लखनु सिय अति सुखु मानी।  
जब जब रामु अवध सुधि करहीं। तब तब बारि बिलोचन भरहीं ॥  
सुमिरि मातु पितु परिजन भाई। भरत सनेहु सीलु सेवकाई ॥  
कृपासिंधु प्रभु होहिं दुखारी। धीरजु धरहिं कुसमउ बिचारी ॥  
लखि सिय लखनु बिकल होइ जाहीं। जिमि पुरुषहि अनुसर परिछाहीं ॥  
प्रिया बंधु गति लखि रघुनंदनु। धीर कृपाल भगत उर चंदनु ॥  
लगे कहन कछु कथा पुनीता। सुनि सुखु लहहिं लखनु अरु सीता ॥

दो. रामु लखन सीता सहित सोहत परन निकेत।

जिमि बासव बस अमरपुर सची जयंत समेत ॥ १४१ ॥

जोगवहिं प्रभु सिय लखनहिं कैसें। पलक बिलोचन गोलक जैसें ॥  
सेवहिं लखनु सीय रघुबीरहि। जिमि अबिवेकी पुरुष सरीरहि ॥  
एहि विधि प्रभु बन बसहिं सुखारी। खग मृग सुर तापस हितकारी ॥  
कहेउँ राम बन गवन सुहावा। सुनहु सुमंत्र अवध जिमि आवा ॥  
फिरेउ निषादु प्रभुहि पहुँचाई। सचिव सहित रथ देखेसि आई ॥  
मंत्री बिकल बिलोकि निषादू। कहि न जाइ जस भयउ विषादू ॥  
राम राम सिय लखन पुकारी। परेउ धरनितल ब्याकुल भारी ॥  
देखि दरिखन दिसि हय हिहिनाहीं। जनु विनु पंख विहग अकुलाहीं ॥

दो. नहिं तृन चरहिं पिअहिं जलु मोचहिं लोचन बारि।

ब्याकुल भए निषाद सब रघुबर बाजि निहारि ॥ १४२ ॥

धरि धीरज तब कहइ निषादू। अब सुमंत्र परिहरहु विषादू ॥  
तुम्ह पंडित परमारथ गयाता। धरहु धीर लखि बिमुख विधाता  
बिबिध कथा कहि कहि मृदु बानी। रथ बैठारेउ बरबस आनी ॥  
सोक सिथिल रथ सकइ न हाँकी। रघुबर बिरह पीर उर बाँकी ॥  
चरफराहिं मग चलहिं न घोरे। बन मृग मनहुँ आनि रथ जोरे ॥

अढुकि परहिं फिरि हेरहिं पीछें। राम बियोगि बिकल दुख तीछें ॥  
जो कह रामु लखनु बैदेही। हिंकरि हिंकरि हित हेरहिं तेही ॥  
बाजि विरह गति कहि किमि जाती। विनु मनि फनिक बिकल जेहि भाँती ॥

दो. भयउ निषाद बिषादबस देखत सचिव तुरंग।

बोलि सुसेवक चारि तब दिए सारथी संग ॥ १४३ ॥

गुह सारथिहि फिरेउ पहुँचाई। विरहु बिषादु बरनि नहिं जाई ॥  
चले अवध लेइ रथहि निषादा। होहि छनहिं छन मगन बिषादा ॥  
सोच सुमंत्र बिकल दुख दीना। धिग जीवन रघुबीर बिहीना ॥  
रहिहि न अंतहुँ अधम सरीरू। जसु न लहेउ बिछुरत रघुबीरू ॥  
भए अजस अघ भाजन प्राना। कवन हेतु नहिं करत पयाना ॥  
अहह मंद मनु अवसर चूका। अजहुँ न हृदय होत दुइ टूका ॥  
मीजि हाथ सिरु धुनि पछिताई। मनहँ कृपन धन रासि गवाँई ॥  
बिरिद बाँधि बर बीरु कहाई। चलेउ समर जनु सुभट पराई ॥

दो. बिप्र बिबेकी बेदविद संमत साधु सुजाति।

जिमि धोखें मदपान कर सचिव सोच तेहि भाँति ॥ १४४ ॥

जिमि कुलीन तिय साधु सयानी। पतिदेवता करम मन बानी ॥  
रहै करम बस परिहरि नाहू। सचिव हृदयँ तिमि दारुन दाहु ॥  
लोचन सजल डीठि भइ थोरी। सुनइ न श्रवन बिकल मति भोरी ॥  
सूखहि अधर लागि मुहँ लाटी। जिउ न जाइ उर अवधि कपाटी ॥  
बिबरन भयउ न जाइ निहारी। मारोसि मनहुँ पिता महतारी ॥  
हानि गलानि बिपुल मन व्यापी। जमपुर पंथ सोच जिमि पापी ॥  
बचनु न आव हृदयँ पछिताई। अवध काह मैं देखब जाई ॥  
राम रहित रथ देखिहि जोई। सकुचिहि मोहि विलोकत सोई ॥

दो. -धाइ पूँछिहहिं मोहि जब बिकल नगर नर नारि।

उतरु देव मैं सबहि तब हृदयँ बज्रु बैठारि ॥ १४५ ॥

पुछिहहिं दीन दुखित सब माता। कहब काह मैं तिन्हहि बिधाता ॥  
पूँछिहि जबहिं लखन महतारी। कहिहउँ कवन सँदेस सुखारी ॥  
राम जननि जब आइहि धाई। सुमिरि बच्छु जिमि धेनु लवाई ॥  
पूँछत उतरु देव मैं तेही। गो बनु राम लखनु बैदेही ॥  
जोइ पूँछिहि तेहि ऊतरु देवा। जाइ अवध अब यहु सुखु लेवा ॥

पूँछिहि जबहिं राउ दुख दीना। जिवनु जासु रघुनाथ अधीना ॥  
देहउँ उतरु कौनु मुहु लाई। आयउँ कुसल कुअँर पहुँचाई ॥  
सुनत लखन सिय राम सँदैसू। तून जिमि तनु परिहरिहि नरेसू ॥

दो. -हृदउ न बिदरेउ पंक जिमि बिछुरत प्रीतमु नीरु ॥

जानत हौं मोहि दीन्ह बिधि यहु जातना सरीरु ॥ १४६ ॥

एहि बिधि करत पंथ पछितावा। तमसा तीर तुरत रथु आवा ॥  
बिदा किए करि बिनय निषादा। फिरे पायँ परि बिकल विषादा ॥  
पैठत नगर सचिव सकुचाई। जनु मारेसि गुर बाँभन गाई ॥  
बैठि बिटप तर दिवसु गवाँवा। साँझ समय तब अवसरु पावा ॥  
अवध प्रबेसु कीन्ह अँधिआरें। पैठ भवन रथु राखि दुआरें ॥  
जिन्ह जिन्ह समाचार सुनि पाए। भूप द्वार रथु देखन आए ॥  
रथु पहिचानि बिकल लखि घोरे। गरहिं गात जिमि आतप ओरे ॥  
नगर नारि नर ब्याकुल कैसैं। निघटत नीर मीनगन जैसैं ॥

दो. -सचिव आगमनु सुनत सबु बिकल भयउ रनिवासु।

भवन भयंकरु लाग तेहि मानहुँ प्रेत निवासु ॥ १४७ ॥

अति आरति सब पूँछहिं रानी। उतरु न आव बिकल भइ बानी ॥  
सुनइ न श्रवन नयन नहिं सूझा। कहहु कहाँ नृप तेहि तेहि बूझा ॥  
दासिन्ह दीख सचिव बिकलाई। कौसल्या गृहँ गई लवाई ॥  
जाइ सुमंत्र दीख कस राजा। अमिअ रहित जनु चंदु बिराजा ॥  
आसन सयन बिभूषन हीना। परेउ भूमितल निपट मलीना ॥  
लेइ उसासु सोच एहि भाँती। सुरपुर तें जनु खँसेउ जजाती ॥  
लेत सोच भरि छिनु छिनु छाती। जनु जरि पंख परेउ संपाती ॥  
राम राम कह राम सनेही। पुनि कह राम लखन बैदेही ॥

दो. देखि सचिवँ जय जीव कहि कीन्हेउ दंड प्रनामु।

सुनत उठेउ ब्याकुल नृपति कहु सुमंत्र कहँ रामु ॥ १४८ ॥

भूप सुमंत्रु लीन्ह उर लाई। बूडत कछु अधार जनु पाई ॥  
सहित सनेह निकट बैठारी। पूँछत राउ नयन भरि बारी ॥  
राम कुसल कहु सखा सनेही। कहँ रघुनाथु लखनु बैदेही ॥  
आने फेरि कि बनहि सिधाए। सुनत सचिव लोचन जल छाए ॥  
सोक बिकल पुनि पूँछ नरेसू। कहु सिय राम लखन सँदैसू ॥

राम रूप गुन सील सुभाऊ। सुमिरि सुमिरि उर सोचत राऊ ॥  
राउ सुनाइ दीन्ह बनबासू। सुनि मन भयउ न हरषु हर्राँसू ॥  
सो सुत विछुरत गए न प्राना। को पापी बड मोहि समाना ॥

दो. सखा रामु सिय लखनु जहँ तहाँ मोहि पहुँचाउ।

नाहिँ त चाहत चलन अब प्रान कहउँ सतिभाउ ॥ १४९ ॥

पुनि पुनि पूँछत मंत्रहि राऊ। प्रियतम सुअन सँदेस सुनाऊ ॥  
करहि सखा सोइ बेगि उपाऊ। रामु लखनु सिय नयन देखाऊ ॥  
सचिव धीर धरि कह मुदु बानी। महाराज तुम्ह पंडित ग्यानी ॥  
बीर सुधीर धुरंधर देवा। साधु समाजु सदा तुम्ह सेवा ॥  
जनम मरन सब दुख भोगा। हानि लाभ प्रिय मिलन बियोगा ॥  
काल करम बस हौहिँ गोसाईं। बरबस राति दिवस की नाई ॥  
सुख हरषहिँ जड दुख बिलखाहीं। दोउ सम धीर धरहिँ मन माहीं ॥  
धीरज धरहु बिबेकु बिचारी। छाडिअ सोच सकल हितकारी ॥

दो. प्रथम बासु तमसा भयउ दूसर सुरसरि तीर।

न्हाई रहे जलपानु करि सिय समेत दोउ बीर ॥ १५० ॥

केवट कीन्हि बहुत सेवकाई। सो जामिनि सिंगरौर गवाँई ॥  
होत प्रात बट छीरु मगावा। जटा मुकुट निज सीस बनावा ॥  
राम सखाँ तब नाव मगाई। प्रिया चढाइ चढे रघुराई ॥  
लखन बान धनु धरे बनाई। आपु चढे प्रभु आयसु पाई ॥  
बिकल बिलोकि मोहि रघुबीरा। बोले मधुर बचन धरि धीरा ॥  
तात प्रनामु तात सन कहेहु। बार बार पद पंकज गहेहु ॥  
करबि पायँ परि बिनय बहोरी। तात करिअ जनि चिंता मोरी ॥  
बन मग मंगल कुसल हमारें। कृपा अनुग्रह पुन्य तुम्हारें ॥

छं. तुम्हरे अनुग्रह तात कानन जात सब सुखु पाइहौं।

प्रतिपालि आयसु कुसल देखन पाय पुनि फिरि आइहौं ॥

जननीं सकल परितोषि परि परि पायँ करि बिनती घनी।

तुलसी करेहु सोइ जतनु जेहिँ कुसली रहहिँ कोसल धनी ॥

सो. गुर सन कहब सँदेसु बार बार पद पदुम गहि।

करब सोइ उपदेसु जेहिँ न सोच मोहि अवधपति ॥ १५१ ॥

पुरजन परिजन सकल निहोरी। तात सुनाएहु बिनती मोरी ॥

सोइ सब भाँति मोर हितकारी। जातें रह नरनाहु सुखारी ॥  
 कहब सँदेसु भरत के आएँ। नीति न तजिअ राजपदु पाएँ ॥  
 पालेहु प्रजहि करम मन बानी। सीहु मातु सकल सम जानी ॥  
 ओर निबाहेहु भायप भाई। करि पितु मातु सुजन सेवकाई ॥  
 तात भाँति तेहि राखब राऊ। सोच मोर जेहिँ करै न काऊ ॥  
 लखन कहे कछु बचन कठोरा। बरजि राम पुनि मोहि निहोरा ॥  
 बार बार निज सपथ देवाई। कहबि न तात लखन लरिकाई ॥

दो. कहि प्रनाम कछु कहन लिय सिय भइ सिथिल सनेह।

थकित बचन लोचन सजल पुलक पल्लवित देह ॥ १५२ ॥

तेहि अवसर रघुबर रूख पाई। केवट पारहि नाव चलाई ॥  
 रघुकुलतिलक चले एहि भाँती। देखउँ ठाढ़ कुलिस धरि छाती ॥  
 मैं आपन किमि कहौं कलेसू। जिअत फिरेउँ लेइ राम सँदेसू ॥  
 अस कहि सचिव बचन रहि गयऊ। हानि गलानि सोच बस भयऊ ॥  
 सुत बचन सुनतहिँ नरनाहू। परेउ धरनि उर दारुन दाहू ॥  
 तलफत बिषम मोह मन मापा। माजा मनहुँ मीन कहूँ व्यापा ॥  
 करि बिलाप सब रोवहिँ रानी। महा बिपति किमि जाइ बखानी ॥  
 सुनि बिलाप दुखहू दुखु लागा। धीरजहू कर धीरजु भागा ॥

दो. भयउ कोलाहलु अवध अति सुनि नृप राउर सोरु।

बिपुल बिहग बन परेउ निसि मानहुँ कुलिस कठोरु ॥ १५३ ॥

प्राण कंठगत भयउ भुआलू। मनि बिहीन जनु व्याकुल व्यालू ॥  
 इद्रीँ सकल बिकल भइँ भारी। जनु सर सरसिज बनु विनु बारी ॥  
 कौसल्याँ नृपु दीख मलाना। रबिकुल रवि अँथयउ जियँ जाना।  
 उर धरि धीर राम महतारी। बोली बचन समय अनुसारी ॥  
 नाथ समुझि मन करिअ बिचारू। राम वियोग पयोधि अपारू ॥  
 करनधार तुम्ह अवध जहाजू। चढेउ सकल प्रिय पथिक समाजू ॥  
 धीरजु धरिअ त पाइअ पारू। नाहिँ त बूडिहि सबु परिवारू ॥  
 जौँ जियँ धरिअ विनय पिय मोरी। रामु लखनु सिय मिलहिँ बहोरी ॥

दो. -प्रिया बचन मृदु सुनत नृपु चितयउ आँखि उघारि।

तलफत मीन मलीन जनु सींचत सीतल बारि ॥ १५४ ॥

धरि धीरजु उठी बैठ भुआलू। कहु सुमंत्र कहँ राम कृपालू ॥

कहाँ लखनु कहँ रामु सनेही। कहँ प्रिय पुत्रबधू बैदेही ॥  
 बिलपत राउ बिकल बहु भाँती। भइ जुग सरिस सिराति न राती ॥  
 तापस अंध साप सुधि आई। कौसल्यहि सब कथा सुनाई ॥  
 भयउ बिकल बरनत इतिहासा। राम रहित धिग जीवन आसा ॥  
 सो तनु राखि करब मैं काहा। जेंहि न प्रेम पनु मोर निबाहा ॥  
 हा रघुनंदन प्रान पिरीते। तुम्ह बिनु जिअत बहुत दिन बीते ॥  
 हा जानकी लखन हा रघुवर। हा पितु हित चित चातक जलधर।

दो. राम राम कहि राम कहि राम राम कहि राम।

तनु परिहरि रघुवर विरहँ राउ गयउ सुरधाम ॥ १५५ ॥

जिअन मरन फलु दसरथ पावा। अंड अनेक अमल जसु छावा ॥  
 जिअत राम बिधु बदनु निहारा। राम विरह करि मरनु सँवारा ॥  
 सोक बिकल सब रोवहि रानी। रूपु सील बलु तेजु बखानी ॥  
 करहि बिलाप अनेक प्रकारा। परहीं भूमितल बारहि बारा ॥  
 बिलपहि बिकल दास अरु दासी। घर घर रुदनु करहि पुरवासी ॥  
 अँथयउ आजु भानुकुल भानू। धरम अवधि गुन रूपु निधानू ॥  
 गारी सकल कैकइहि देहीं। नयन बिहीन कीन्ह जग जेहीं ॥  
 एहि विधि बिलपत रैनि बिहानी। आए सकल महामुनि ग्यानी ॥

दो. तब बसिष्ठ मुनि समय सम कहि अनेक इतिहास।

सोक नेवारेउ सबहि कर निज बिग्यान प्रकास ॥ १५६ ॥

तेल नाँव भरि नृप तनु राखा। दूत बोलाइ बहुरि अस भाषा ॥  
 धावहु बेगि भरत पहि जाहू। नृप सुधि कतहुँ कहहु जानि काहू ॥  
 एतनेइ कहेहु भरत सन जाई। गुरु बोलाई पठयउ दोउ भाई ॥  
 सुनि मुनि आयसु धावन धाए। चले बेग बर बाजि लजाए ॥  
 अनरथु अवध अरंभेउ जब तें। कुसगुन होहि भरत कहुँ तब तें ॥  
 देखहि राति भयानक सपना। जागि करहि कटु कोटि कलपना ॥  
 विप्र जेवाँइ देहि दिन दाना। सिव अभिषेक करहि विधि नाना ॥  
 मागहि हृदयँ महेस मनाई। कुसल मातु पितु परिजन भाई ॥

दो. एहि विधि सोचत भरत मन धावन पहुँचे आइ।

गुरु अनुसासन श्रवन सुनि चले गनेसु मनाइ ॥ १५७ ॥

चले समीर बेग हय हाँके। नाघत सरित सैल बन बाँके ॥

हृदयँ सोचु बड कछु न सोहाई। अस जानहिं जियँ जाउँ उडाई ॥  
 एक निमेष बरस सम जाई। एहि बिधि भरत नगर निअराई ॥  
 असगुन होहिं नगर पैठारा। रटहिं कुभाँति कुखेत करारा ॥  
 खर सिआर बोलहिं प्रतिकूला। सुनि सुनि होइ भरत मन सूला ॥  
 श्रीहत सर सरिता बन बागा। नगरु बिसेषि भयावनु लागा ॥  
 खग मृग हय गय जाहिं न जोए। राम बियोग कुरोग विगोए ॥  
 नगर नारि नर निपट दुखारी। मनहुँ सबन्हि सब संपति हारी ॥

दो. पुरजन मिलिहिं न कहहिं कछु गवँहिं जोहारहिं जाहिं।

भरत कुसल पूँछि न सकहिं भय विषाद मन माहिं ॥ १५८ ॥

हाट बाट नहिं जाइ निहारी। जनु पुर दहँ दिसि लागि दवारी ॥  
 आवत सुत सुनि कैकयनंदिनि। हरषी रबिकुल जलरुह चंदिनि ॥  
 सजि आरती मुदित उठि धाई। द्वारेहिं भेंटि भवन लेइ आई ॥  
 भरत दुखित परिवारु निहारा। मानहुँ तुहिन बनज वनु मारा ॥  
 कैकेई हरषित एहि भाँति। मनहुँ मुदित दव लाइ किराती ॥  
 सुताहि ससोच देखि मनु मारें। पूँछति नैहर कुसल हमारें ॥  
 सकल कुसल कहि भरत सुनाई। पूँछी निज कुल कुसल भलाई ॥  
 कहु कहँ तात कहाँ सब माता। कहँ सिय राम लखन प्रिय आता ॥

दो. सुनि सुत बचन सनेहमय कपट नीर भरि नैन।

भरत श्रवन मन सूल सम पापिनि बोली बैन ॥ १५९ ॥

तात बात मैं सकल सँवारी। भै मंथरा सहाय बिचारी ॥  
 कछुक काज बिधि बीच बिगारेउ। भूपति सुरपति पुर पगु धारेउ ॥  
 सुनत भरतु भए बिबस बिषादा। जनु सहमेउ करि केहरि नादा ॥  
 तात तात हा तात पुकारी। परे भूमितल ब्याकुल भारी ॥  
 चलत न देखन पायउँ तोही। तात न रामहि सौँपेहु मोही ॥  
 बहुरि धीर धरि उठे सँभारी। कहु पितु मरन हेतु महतारी ॥  
 सुनि सुत बचन कहति कैकेई। मरमु पाँछि जनु माहुर देई ॥  
 आदिहु तें सब आपनि करनी। कुटिल कठोर मुदित मन बरनी ॥

दो. भरतहि बिसरेउ पितु मरन सुनत राम बन गौनु।

हेतु अपनपउ जानि जियँ थकित रहे धरि मौनु ॥ १६० ॥

बिकल बिलोकि सुताहि समुझावति। मनहुँ जरे पर लोनु लगावति ॥

तात राउ नहिं सोचे जोगू। बिढइ सुकृत जसु कीन्हेउ भोगू ॥  
जीवत सकल जनम फल पाए। अंत अमरपति सदन सिधाए ॥  
अस अनुमानि सोच परिहरहू। सहित समाज राज पुर करहू ॥  
सुनि सुठि सहमेउ राजकुमारू। पाकें छत जनु लाग अँगारू ॥  
धीरज धरि भरि लेहिं उसासा। पापनि सबहि भाँति कुल नासा ॥  
जौं पै कुरुचि रही अति तोही। जनमत काहे न मारे मोही ॥  
पेड काटि तैं पालउ सींचा। मीन जिअन निति बारि उलीचा ॥

दो. हंसवंसु दसरथु जनकु राम लखन से भाइ।

जननी तूँ जननी भई विधि सन कछु न बसाइ ॥ १६१ ॥

जब तैं कुमति कुमत जियँ ठयऊ। खंड खंड होइ हृदउ न गयऊ ॥  
बर मागत मन भइ नहिं पीरा। गरि न जीह मुहँ परेउ न कीरा ॥  
भूपँ प्रतीत तोरि किमि कीन्ही। मरन काल विधि मति हरि लीन्ही ॥  
विधिहुँ न नारि हृदय गति जानी। सकल कपट अघ अवगुन खानी ॥  
सरल सुसील धरम रत राऊ। सो किमि जानै तीय सुभाऊ ॥  
अस को जीव जंतु जग माहीं। जेहि रघुनाथ प्रानप्रिय नाहीं ॥  
भे अति अहित रामु तेउ तोही। को तू अहसि सत्य कहु मोही ॥  
जो हसि सो हसि मुहँ मसि लाई। आँखि ओट उठि बैठहि जाई ॥

दो. राम बिरोधी हृदय तैं प्रगट कीन्ह विधि मोहि।

मो समान को पातकी बादि कहउँ कछु तोहि ॥ १६२ ॥

सुनि सत्रुघुन मातु कुटिलाई। जरहिं गात रिस कछु न बसाई ॥  
तेहि अवसर कुबरी तहँ आई। बसन बिभूषन बिबिध बनाई ॥  
लखि रिस भरेउ लखन लघु भाई। बरत अनल घृत आहुति पाई ॥  
हुमागि लात तकि कूबर मारा। परि मुह भर महि करत पुकारा ॥  
कूबर टूटेउ फूट कपारू। दलित दसन मुख रुधिर प्रचारू ॥  
आह दइअ मैं काह नसावा। करत नीक फलु अनइस पावा ॥  
सुनि रिपुहन लखि नख सिख खोटी। लगे घसीटन धरि धरि झोंटी ॥  
भरत दयानिधि दीन्हि छडाई। कौसल्या पहिं गे दोउ भाई ॥

दो. मलिन बसन विवरन बिकल कूस सरीर दुख भार।

कनक कल्प बर बेलि बन मानहुँ हनी तुसार ॥ १६३ ॥

भरतहि देखि मातु उठि धाई। मुरुछित अवनि परी झइँ आई ॥

देखत भरतु बिकल भए भारी। परे चरन तन दसा बिसारी ॥  
 मातु तात कहँ देहि देखार्ई। कहँ सिय रामु लखनु दोउ भाई ॥  
 कैकइ कत जनमी जग माझा। जौँ जनमि त भइ काहे न बाँझा ॥  
 कुल कलंकु जेहिँ जनमेउ मोही। अपजस भाजन प्रियजन द्रोही ॥  
 को तिभुवन मोहि सरिस अभागी। गति असि तोरि मातु जेहि लागी ॥  
 पितु सुरपुर बन रघुबर केतू। मैँ केवल सब अनरथ हेतु ॥  
 धिग मोहि भयउँ बेनु बन आगी। दुसह दाह दुख दूषन भागी ॥

दो. मातु भरत के बचन मृदु सुनि सुनि उठी सँभारि ॥

लिए उठाइ लगाइ उर लोचन मोचति बारि ॥ १६४ ॥

सरल सुभाय मायँ हियँ लाए। अति हित मनहुँ राम फिरि आए ॥  
 भँटेउ बहुरि लखन लघु भाई। सोकु सनेहु न हृदयँ समाई ॥  
 देखि सुभाउ कहत सबु कोई। राम मातु अस काहे न होई ॥  
 माताँ भरतु गोद बैठारे। आँसु पौँछि मृदु बचन उचारे ॥  
 अजहुँ बच्छ बलि धीरज धरहू। कुसमउ समुझि सोक परिहरहू ॥  
 जनि मानहु हियँ हानि गलानी। काल करम गति अघटित जानि ॥  
 काहुहि दोसु देहु जनि ताता। भा मोहि सब बिधि बाम बिधाता ॥  
 जो एतेहुँ दुख मोहि जिआवा। अजहुँ को जानइ का तेहि भावा ॥

दो. पितु आयस भूषन बसन तात तजे रघुवीर।

विसमउ हरषु न हृदयँ कछु पहिरे बलकल चीर। १६५ ॥

मुख प्रसन्न मन रंग न रोषू। सब कर सब बिधि करि परितोषू ॥  
 चले बिपिन सुनि सिय सँग लागी। रहइ न राम चरन अनुरागी ॥  
 सुनतहिँ लखनु चले उठि साथा। रहहिँ न जतन किए रघुनाथा ॥  
 तब रघुपति सबही सिरु नाई। चले संग सिय अरु लघु भाई ॥  
 रामु लखनु सिय बनहि सिधाए। गइउँ न संग न प्रान पठाए ॥  
 यहु सबु भा इन्ह आँखिन्ह आगें। तउ न तजा तनु जीव अभागें ॥  
 मोहि न लाज निज नेहु निहारी। राम सरिस सुत मैँ महतारी ॥  
 जिऐ मरै भल भूपति जाना। मोर हृदय सत कुलिस समाना ॥

दो. कौसल्या के बचन सुनि भरत सहित रनिवास।

व्याकुल बिलपत राजगृह मानहुँ सोक नेवासु ॥ १६६ ॥

बिलपहिँ बिकल भरत दोउ भाई। कौसल्याँ लिए हृदयँ लगाई ॥

भाँति अनेक भरतु समुझाए। कहि बिबेकमय बचन सुनाए ॥  
 भरतहुँ मातु सकल समुझाई। कहि पुरान श्रुति कथा सुहाई ॥  
 छल बिहीन सुचि सरल सुबानी। बोले भरत जोरि जुग पानी ॥  
 जे अघ मातु पिता सुत मारें। गाइ गोठ महिसुर पुर जारें ॥  
 जे अघ तिय बालक बध कीन्हें। मीत महीपति माहुर दीन्हें ॥  
 जे पातक उपपातक अहहीं। करम बचन मन भव कवि कहहीं ॥  
 ते पातक मोहि होहुँ बिधाता। जौँ यहु होइ मोर मत माता ॥

दो. जे परिहरि हरि हर चरन भजहिं भूतगन घोर।

तेहि कइ गति मोहि देउ विधि जौँ जननी मत मोर ॥ १६७ ॥

बेचहिं बेदु धरमु दुहि लेहीं। पिसुन पराय पाप कहि देहीं ॥  
 कपटी कुटिल कलहप्रिय क्रोधी। बेद बिदूषक विस्व विरोधी ॥  
 लोभी लंपट लोलुपचारा। जे ताकहिं परधनु परदारा ॥  
 पावौँ मैं तिन्ह के गति घोरा। जौँ जननी यहु संमत मोरा ॥  
 जे नहिं साधुसंग अनुरागे। परमारथ पथ बिमुख अभागे ॥  
 जे न भजहिं हरि नरतनु पाई। जिन्हहि न हरि हर सुजसु सोहाई ॥  
 तजि श्रुतिपंथु बाम पथ चलहीं। बंचक विरचि बेष जगु छलहीं ॥  
 तिन्ह के गति मोहि संकर देऊ। जननी जौँ यहु जानौँ भेऊ ॥

दो. मातु भरत के बचन सुनि साँचे सरल सुभायँ।

कहति राम प्रिय तात तुम्ह सदा बचन मन कायँ ॥ १६८ ॥

राम प्रानहु तें प्रान तुम्हारे। तुम्ह रघुपतिहि प्रानहु तें प्यारे ॥  
 बिधु बिष चवै खवै हिमु आगी। होइ बारिचर बारि बिरागी ॥  
 भाँ ग्यानु बरु मिटै न मोहू। तुम्ह रामहि प्रतिकूल न होहू ॥  
 मत तुम्हार यहु जो जग कहहीं। सो सपनेहुँ सुख सुगति न लहहीं ॥  
 अस कहि मातु भरतु हियँ लाए। थन पय खवहिं नयन जल छाए ॥  
 करत बिलाप बहुत यहि भाँती। बैठेहिं बीति गइ सब राती ॥  
 बामदेउ बसिष्ठ तब आए। सचिव महाजन सकल बोलाए ॥  
 मुनि बहु भाँति भरत उपदेसे। कहि परमारथ बचन सुदेसे ॥

दो. तात हृदयँ धीरजु धरहु करहु जो अवसर आजु।

उठे भरत गुर बचन सुनि करन कहेउ सबु साजु ॥ १६९ ॥

नृपतनु बेद बिदित अन्हवावा। परम बिचित्र बिमानु बनावा ॥

गहि पद भरत मातु सब राखी। रहीं रानि दरसन अभिलाषी ॥  
 चंदन अगर भार बहु आए। अमित अनेक सुगंध सुहाए ॥  
 सरजु तीर रचि चिता बनाई। जनु सुरपुर सोपान सुहाई ॥  
 एहि विधि दाह क्रिया सब कीन्ही। विधिवत न्हाइ तिलांजुलि दीन्ही ॥  
 सोधि सुमृति सब बेद पुराना। कीन्ह भरत दसगात बिधाना ॥  
 जहँ जस मुनिबर आयसु दीन्हा। तहँ तस सहस भाँति सबु कीन्हा ॥  
 भए बिसुद्ध दिए सब दाना। धेनु बाजि गज बाहन नाना ॥

दो. सिंघासन भूषन बसन अन्न धरनि धन धाम।

दिए भरत लहि भूमिसुर भे परिपूरन काम ॥ १७० ॥

पितु हित भरत कीन्हि जसि करनी। सो मुख लाख जाइ नहि बरनी ॥  
 सुदिनु सोधि मुनिबर तब आए। सचिव महाजन सकल बोलाए ॥  
 बैठे राजसभाँ सब जाई। पठए बोलि भरत दोउ भाई ॥  
 भरतु बसिष्ठ निकट बैठारे। नीति धरममय बचन उचारे ॥  
 प्रथम कथा सब मुनिबर बरनी। कैकइ कुटिल कीन्हि जसि करनी ॥  
 भूप धरमब्रतु सत्य सराहा। जेहि तनु परिहरि प्रेम निबाहा ॥  
 कहत राम गुन सील सुभाऊ। सजल नयन पुलकेउ मुनिराऊ ॥  
 बहुरि लखन सिय प्रीति बखानी। सोक सनेह मगन मुनि ग्यानी ॥

दो. सुनहु भरत भावी प्रबल बिलखि कहेउ मुनिनाथ।

हानि लाभु जीवन मरनु जसु अपजसु बिधि हाथ ॥ १७१ ॥

अस बिचारि केहि देइअ दोसू। व्यरथ काहि पर कीजिअ रोसू ॥  
 तात बिचारु केहि करहु मन माहीं। सोच जोगु दसरथु नृपु नाहीं ॥  
 सोचिअ बिप्र जो बेद बिहीना। तजि निज धरमु बिषय लयलीना ॥  
 सोचिअ नृपति जो नीति न जाना। जेहि न प्रजा प्रिय प्रान समाना ॥  
 सोचिअ बयसु कृपन धनवानू। जो न अतिथि सिव भगति सुजानू ॥  
 सोचिअ सद्धु बिप्र अवमानी। मुखर मानप्रिय ग्यान गुमानी ॥  
 सोचिअ पुनि पति बंचक नारी। कुटिल कलहप्रिय इच्छाचारी ॥  
 सोचिअ बटु निज ब्रतु परिहरई। जो नहिं गुर आयसु अनुसरई ॥

दो. सोचिअ गृही जो मोह बस करइ करम पथ त्याग।

सोचिअ जति प्रंपच रत विगत बिबेक बिराग ॥ १७२ ॥

बैखानस सोइ सोचै जोगु। तपु बिहाइ जेहि भावइ भोगू ॥

सोचिअ पिसुन अकारन क्रोधी। जननि जनक गुर बंधु बिरोधी ॥  
 सब बिधि सोचिअ पर अपकारी। निज तनु पोषक निरदय भारी ॥  
 सोचनीय सबहि बिधि सोई। जो न छाडि छलु हरि जन होई ॥  
 सोचनीय नहिं कोसलराऊ। भुवन चारिदस प्रगट प्रभाऊ ॥  
 भयउ न अहइ न अब होनिहारा। भूप भरत जस पिता तुम्हारा ॥  
 बिधि हरि हरू सुरपति दिसिनाथा। बरनहिं सब दसरथ गुन गाथा ॥

दो. कहहु तात केहि भाँति कोउ करिहि बडाई तासु।

राम लखन तुम्ह सत्रुहन सरिस सुअन सुचि जासु ॥ १७३ ॥

सब प्रकार भूपति बडभागी। बादि बिषादु करिअ तेहि लागी ॥  
 यहु सुनि समुझि सोचु परिहरहू। सिर धरि राज रजायसु करहू ॥  
 राँय राजपदु तुम्ह कहूँ दीन्हा। पिता बचनु फुर चाहिअ कीन्हा ॥  
 तजे रामु जेहिं बचनहि लागी। तनु परिहरेउ राम बिरहागी ॥  
 नृपहि बचन प्रिय नहिं प्रिय प्राना। करहु तात पितु बचन प्रवाना ॥  
 करहु सीस धरि भूप रजाई। हइ तुम्ह कहूँ सब भाँति भलाई ॥  
 परसुराम पितु अग्या राखी। मारी मातु लोक सब साखी ॥  
 तनय जजातिहि जौबनु दयऊ। पितु अग्याँ अघ अजसु न भयऊ ॥

दो. अनुचित उचित बिचारु तजि जे पालहिं पितु बैन।

ते भाजन सुख सुजस के बसहिं अमरपति ऐन ॥ १७४ ॥

अवसि नरेस बचन फुर करहू। पालहु प्रजा सोकु परिहरहू ॥  
 सुरपुर नृप पाइहि परितोषू। तुम्ह कहूँ सुकृत सुजसु नहिं दोषू ॥  
 बेद बिदित संमत सबही का। जेहि पितु देइ सो पावइ टीका ॥  
 करहु राजु परिहरहु गलानी। मानहु मोर बचन हित जानी ॥  
 सुनि सुखु लहब राम बैदेहीं। अनुचित कहब न पंडित केहीं ॥  
 कौसल्यादि सकल महतारीं। तेउ प्रजा सुख होहिं सुखारीं ॥  
 परम तुम्हार राम कर जानिहि। सो सब बिधि तुम्ह सन भल मानिहि ॥  
 सौपेहु राजु राम कै आएँ। सेवा करेहु सनेह सुहाएँ ॥

दो. कीजिअ गुर आयसु अवसि कहहिं सचिव कर जोरि।

रघुपति आएँ उचित जस तस तब करब बहोरि ॥ १७५ ॥

कौसल्या धरि धीरजु कहई। पूत पथ्य गुर आयसु अहई ॥  
 सो आदरिअ करिअ हित मानी। तजिअ बिषादु काल गति जानी ॥

बन रघुपति सुरपति नरनाहू। तुम्ह एहि भाँति तात कदराहू ॥  
 परिजन प्रजा सचिव सब अंबा। तुम्हही सुत सब कहँ अवलंबा ॥  
 लखि विधि वाम कालु कठिनाई। धीरजु धरहु मातु बलि जाई ॥  
 सिर धरि गुर आयसु अनुसरहू। प्रजा पालि परिजन दुखु हरहू ॥  
 गुर के बचन सचिव अभिनंदनु। सुने भरत हिय हित जनु चंदनु ॥  
 सुनी बहोरि मातु मृदु बानी। सील सनेह सरल रस सानी ॥

छं. सानी सरल रस मातु बानी सुनि भरत ब्याकुल भए।  
 लोचन सरोरुह खवत सींचत बिरह उर अंकुर नए ॥  
 सो दसा देखत समय तेहि बिसरी सबहि सुधि देह की।  
 तुलसी सराहत सकल सादर सीवँ सहज सनेह की ॥

सो. भरतु कमल कर जोरि धीर धुरंधर धीर धरि।  
 बचन अमिअँ जनु बोरि देत उचित उत्तर सबहि ॥ १७६ ॥

मासपारायण, अठारहवाँ विश्राम

मोहि उपदेसु दीन्ह गुर नीका। प्रजा सचिव संमत सबही का ॥  
 मातु उचित धरि आयसु दीन्हा। अवसि सीस धरि चाहउँ कीन्हा ॥  
 गुर पितु मातु स्वामि हित बानी। सुनि मन मुदित करिअ भलि जानी ॥  
 उचित कि अनुचित किएँ विचारू। धरमु जाइ सिर पातक भारू ॥  
 तुम्ह तौ देहु सरल सिख सोई। जो आचरत मोर भल होई ॥  
 जद्यपि यह समुझत हउँ नीकें। तदपि होत परितोषु न जी कें ॥  
 अब तुम्ह बिनय मोरि सुनि लेहू। मोहि अनुहरत सिखावनु देहू ॥  
 उतरु देउँ छमब अपराधू। दुखित दोष गुन गनहिं न साधू ॥

दो. पितु सुरपुर सिय रामु बन करन कहहु मोहि राजु।  
 एहि तें जानहु मोर हित कै आपन बड काजु ॥ १७७ ॥

हित हमार सियपति सेवकाई। सो हरि लीन्ह मातु कुटिलाई ॥  
 मैं अनुमानि दीख मन माहीं। आन उपायँ मोर हित नाहीं ॥  
 सोक समाजु राजु केहि लेखें। लखन राम सिय विनु पद देखें ॥  
 बादि बसन विनु भूषन भारू। बादि बिरति विनु ब्रह्म विचारू ॥  
 सरुज सरीर बादि बहु भोगा। विनु हरिभगति जायँ जप जोगा ॥  
 जायँ जीव विनु देह सुहाई। बादि मोर सबु विनु रघुराई ॥  
 जाउँ राम पहिं आयसु देहू। एकहिं आँक मोर हित एहू ॥

मोहि नृप करि भल आपन चहहू। सोउ सनेह जडता बस कहहू ॥

दो. कैकेई सुअ कुटिलमति राम बिमुख गतलाज।

तुम्ह चाहत सुखु मोहबस मोहि से अधम कें राज ॥ १७८ ॥

कहउँ साँचु सब सुनि पतिआहू। चाहिअ धरमसील नरनाहू ॥  
मोहि राजु हठि देइहहु जबहीं। रसा रसातल जाइहि तबहीं ॥  
मोहि समान को पाप निवासू। जेहि लागि सीय राम बनवासू ॥  
रायँ राम कहूँ काननु दीन्हा। बिछुरत गमनु अमरपुर कीन्हा ॥  
मैं सठु सब अनरथ कर हेतू। बैठ बात सब सुनउँ सचेतू ॥  
बिनु रघुबीर बिलोकि अवासू। रहे प्रान सहि जग उपहासू ॥  
राम पुनीत विषय रस रूखे। लोलुप भूमि भोग के भूखे ॥  
कहँ लागि कहौँ हृदय कठिनाई। निदरि कुलिसु जेहिँ लही बडाई ॥

दो. कारन तें कारजु कठिन होइ दोसु नहि मोर।

कुलिस अस्थि तें उपल तें लोह कराल कठोर ॥ १७९ ॥

कैकेई भव तनु अनुरागे। पाँवर प्रान अघाइ अभागे ॥  
जौँ प्रिय बिरहँ प्रान प्रिय लागे। देखब सुनब बहुत अब आगे ॥  
लखन राम सिय कहूँ बनू दीन्हा। पठइ अमरपुर पति हित कीन्हा ॥  
लीन्ह बिधवपन अपजसु आपू। दीन्हेउ प्रजहि सोकु संतापू ॥  
मोहि दीन्ह सुखु सुजसु सुराजू। कीन्ह कैकेई सब कर काजू ॥  
एहि तें मोर काह अब नीका। तेहि पर देन कहहु तुम्ह टीका ॥  
कैकेई जठर जनमि जग माहीं। यह मोहि कहँ कछु अनुचित नाहीं ॥  
मोरि बात सब बिधिहिँ बनाई। प्रजा पाँच कत करहु सहाई ॥

दो. ग्रह ग्रहीत पुनि बात बस तेहि पुनि बीछी मार।

तेहि पिआइअ बारुनी कहहु काह उपचार ॥ १८० ॥

कैकइ सुअन जोगु जग जोई। चतुर बिरंचि दीन्ह मोहि सोई ॥  
दसरथ तनय राम लघु भाई। दीन्ह मोहि बिधि वादि बडाई ॥  
तुम्ह सब कहहु कढावन टीका। राय रजायसु सब कहँ नीका ॥  
उतरु देउँ केहि बिधि केहि केही। कहहु सुखेन जथा रुचि जेही ॥  
मोहि कुमातु समेत बिहाई। कहहु कहिहि के कीन्ह भलाई ॥  
मो बिनु को सचराचर माहीं। जेहि सिय रामु प्रानप्रिय नाहीं ॥  
परम हानि सब कहँ बड लाहू। अदिनु मोर नहि दूषन काहू ॥

संसय सील प्रेम बस अहहू। सबुइ उचित सब जो कछु कहहू ॥

दो. राम मातु सुठि सरलचित मो पर प्रेमु बिसेषि।

कहइ सुभाय सनेह बस मोरि दीनता देखि ॥ १८१ ॥

गुर बिबेक सागर जगु जाना। जिन्हहि बिस्व कर बदर समाना ॥  
मो कहँ तिलक साज सज सोऊ। भएँ बिधि विमुख विमुख सबु कोऊ ॥  
परिहरि रामु सीय जग माहीं। कोउ न कहिहि मोर मत नाहीं ॥  
सो मैं सुनब सहब सुखु मानी। अंतहुँ कीच तहाँ जहँ पानी ॥  
डरु न मोहि जग कहिहि कि पोचू। परलोकहु कर नाहिन सोचू ॥  
एकइ उर बस दुसह दवारी। मोहि लागि भे सिय रामु दुखारी ॥  
जीवन लाहु लखन भल पावा। सबु तजि राम चरन मनु लावा ॥  
मोर जनम रघुवर बन लागी। झूठ काह पछिताउँ अभागी ॥

दो. आपनि दारुन दीनता कहउँ सबहि सिरु नाइ।

देखें विनु रघुनाथ पद जिय कै जरनि न जाइ ॥ १८२ ॥

आन उपाउ मोहि नहि सूझा। को जिय कै रघुवर विनु बूझा ॥  
एकहिं आँक इहइ मन माहीं। प्रातकाल चलिहउँ प्रभु पाहीं ॥  
जद्यपि मैं अनभल अपराधी। भै मोहि कारन सकल उपाधी ॥  
तदपि सरन सनमुख मोहि देखी। छमि सब करिहहि कृपा बिसेषी ॥  
सील सकुच सुठि सरल सुभाऊ। कृपा सनेह सदन रघुराऊ ॥  
अरिहुक अनभल कीन्ह न रामा। मैं सिसु सेवक जद्यपि बामा ॥  
तुम्ह पै पाँच मोर भल मानी। आयसु आसिष देहु सुबानी ॥  
जेहिं सुनि बिनय मोहि जनु जानी। आवहिं बहुरि रामु रजधानी ॥

दो. जद्यपि जनमु कुमातु तें मैं सठु सदा सदोस।

आपन जानि न त्यागिहहि मोहि रघुबीर भरोस ॥ १८३ ॥

भरत बचन सब कहँ प्रिय लागे। राम सनेह सुधाँ जनु पागे ॥  
लोग बियोग बिषम बिष दागे। मंत्र सबीज सुनत जनु जागे ॥  
मातु सचिव गुर पुर नर नारी। सकल सनेहँ बिकल भए भारी ॥  
भरतहि कहहि सराहि सराही। राम प्रेम मूरति तनु आही ॥  
तात भरत अस काहे न कहहू। प्रान समान राम प्रिय अहहू ॥  
जो पावरू अपनी जडताई। तुम्हहि सुगाइ मातु कुटिलाई ॥  
सो सठु कोटिक पुरुष समेता। बसिहि कल्प सत नरक निकेता ॥

अहि अघ अवगुन नहि मनि गहई। हरइ गरल दुख दारिद दहई ॥

दो. अवसि चलिअ बन रामु जहँ भरत मंत्रु भल कीन्ह।

सोक सिंधु बूडत सबहि तुम्ह अवलंबनु दीन्ह ॥ १८४ ॥

भा सब कें मन मोहु न थोरा। जनु घन धुनि सुनि चातक मोरा ॥

चलत प्रात लखि निरनउ नीके। भरतु प्रानप्रिय भे सबही के ॥

मुनिहि बंदि भरतहि सिरु नाई। चले सकल घर बिदा कराई ॥

धन्य भरत जीवनु जग माहीं। सीलु सनेहु सराहत जाहीं ॥

कहहि परसपर भा बड काजू। सकल चलै कर साजहिं साजू ॥

जेहि राखहिं रहु घर रखवारी। सो जानइ जनु गरदनि मारी ॥

कोउ कह रहन कहिअ नहिं काहू। को न चहइ जग जीवन लाहू ॥

दो. जरउ सो संपति सदन सुखु सुहद मातु पितु भाइ।

सनमुख होत जो राम पद करै न सहस सहाइ ॥ १८५ ॥

घर घर साजहिं बाहन नाना। हरषु हृदयँ परभात पयाना ॥

भरत जाइ घर कीन्ह बिचारू। नगरु बाजि गज भवन भँडारू ॥

संपति सब रघुपति कै आही। जौ बिनु जतन चलों तजि ताही ॥

तौ परिनाम न मोरि भलाई। पाप सिरोमनि साइँ दोहाई ॥

करइ स्वामि हित सेवकु सोई। दूषन कोटि देइ किन कोई ॥

अस बिचारि सुचि सेवक बोले। जे सपनेहुँ निज धरम न डोले ॥

कहि सबु मरमु धरमु भल भाषा। जो जेहि लायक सो तेहिं राखा ॥

करि सबु जतनु राखि रखवारे। राम मातु पहिं भरतु सिधारे ॥

दो. आरत जननी जानि सब भरत सनेह सुजान।

कहेउ बनावन पालकीं सजन सुखासन जान ॥ १८६ ॥

चक्क चक्कि जिमि पुर नर नारी। चहत प्रात उर आरत भारी ॥

जागत सब निसि भयउ बिहाना। भरत बोलाए सचिव सुजाना ॥

कहेउ लेहु सबु तिलक समाजू। बनहिं देव मुनि रामहिं राजू ॥

बेगि चलहु सुनि सचिव जोहारे। तुरत तुरग रथ नाग सँवारे ॥

अरुंधती अरु अग्नि समाऊ। रथ चढि चले प्रथम मुनिराऊ ॥

बिप्र बृंद चढि बाहन नाना। चले सकल तप तेज निधाना ॥

नगर लोग सब सजि सजि जाना। चित्रकूट कहँ कीन्ह पयाना ॥

सिबिका सुभग न जाहिं बखानी। चढि चढि चलत भई सब रानी ॥

दो. सौंपि नगर सुचि सेवकनि सादर सकल चलाइ।

सुभिरि राम सिय चरन तब चले भरत दोउ भाइ ॥ १८७ ॥

राम दरस बस सब नर नारी। जनु करि करिनि चले तकि बारी ॥  
 बन सिय रामु समुझि मन माहीं। सानुज भरत पयादेहिं जाहीं ॥  
 देखि सनेहु लोग अनुरागे। उतरि चले हय गय रथ त्यागे ॥  
 जाइ समीप राखि निज डोली। राम मातु मृदु बानी बोली ॥  
 तात चढ़हु रथ बलि महतारी। होइहि प्रिय परिवारु दुखारी ॥  
 तुम्हरेँ चलत चलिहि सबु लोगू। सकल सोक कृस नहिं मग जोगू ॥  
 सिर धरि बचन चरन सिरु नाई। रथ चढ़ि चलत भए दोउ भाई ॥  
 तमसा प्रथम दिवस करि बासू। दूसर गोमति तीर निवासू ॥

दो. पय अहार फल असन एक निसि भोजन एक लोग।

करत राम हित नेम व्रत परिहरि भूषन भोग ॥ १८८ ॥

सई तीर बसि चले बिहाने। संगबेरपुर सब निअराने ॥  
 समाचार सब सुने निषादा। हृदयँ बिचार करइ सविषादा ॥  
 कारन कवन भरतु बन जाहीं। है कछु कपट भाउ मन माहीं ॥  
 जौ पै जियँ न होति कुटिलाई। तौ कत लीन्ह संग कटकई ॥  
 जानहिँ सानुज रामहि मारी। करउँ अकंटक राजु सुखारी ॥  
 भरत न राजनीति उर आनी। तब कलंकु अब जीवन हानी ॥  
 सकल सुरासुर जुरहिं जुझारा। रामहि समर न जीतनिहारा ॥  
 का आचरजु भरतु अस करहीं। नहिं विष बेलि अमिअ फल फरहीं ॥

दो. अस बिचारि गुहँ ग्याति सन कहेउ सजग सब होहु।

हथवाँसहु बोरहु तरनि कीजिअ घाटारोहु ॥ १८९ ॥

होहु सँजोइल रोकहु घाटा। ठाटहु सकल मरै के ठाटा ॥  
 सनमुख लोह भरत सन लेऊँ। जिअत न सुरसरि उतरन देऊँ ॥  
 समर मरनु पुनि सुरसरि तीरा। राम काजु छनभंगु सरीरा ॥  
 भरत भाइ नृपु मै जन नीचू। बड़ें भाग असि पाइअ मीचू ॥  
 स्वामि काज करिहउँ रन रारी। जस धवलिहउँ भुवन दस चारी ॥  
 तजउँ प्रान रघुनाथ निहोरें। दुहँ हाथ मुद मोदक मोरें ॥  
 साधु समाज न जाकर लेखा। राम भगत मुहँ जासु न रेखा ॥  
 जायँ जिअत जग सो महि भारू। जननी जौबन बिटप कुठारू ॥

दो. बिगत बिषाद निषादपति सबहि बढाइ उछाहु।

सुमिरि राम मागेउ तुरत तरकस धनुष सनाहु ॥ १९० ॥

बेगहु भाइहु सजहु सँजोऊ। सुनि रजाइ कदराइ न कोऊ ॥  
 भलेहि नाथ सब कहहि सहरषा। एकहि एक बढावइ करषा ॥  
 चले निषाद जोहारि जोहारी। सूर सकल रन रूचइ रारी ॥  
 सुमिरि राम पद पंकज पनहीं। भार्थी बाँधि चढाइन्हि धनहीं ॥  
 अँगरी पहिरि कूँडि सिर धरहीं। फरसा बाँस सेल सम करहीं ॥  
 एक कुसल अति ओडन खाँडे। कूदहि गगन मनहुँ छिति छाँडे ॥  
 निज निज साजु समाजु बनाई। गुह राउतहि जोहारे जाई ॥  
 देखि सुभट सब लायक जाने। लै लै नाम सकल सनमाने ॥

दो. भाइहु लावहु धोरख जनि आजु काज बड मोहि।

सुनि सरोष बोले सुभट वीर अधीर न होहि ॥ १९१ ॥

राम प्रताप नाथ बल तोरे। करहि कटकु बिनु भट बिनु घोरे ॥  
 जीवत पाउ न पाछें धरहीं। रुंड मुंडमय मेदिनि करहीं ॥  
 दीख निषादनाथ भल टोलू। कहेउ बजाउ जुझाऊ ढोलू ॥  
 एतना कहत छींक भइ बाँए। कहेउ सगुनिअन्ह खेत सुहाए ॥  
 बूढु एकु कह सगुन विचारी। भरतहि मिलिअ न होइहि रारी ॥  
 रामहि भरतु मनावन जाहीं। सगुन कहइ अस बिग्रहु नाही ॥  
 सुनि गुह कहइ नीक कह बूढा। सहसा करि पछिताहिं बिमूढा ॥  
 भरत सुभाउ सीलु बिनु बूझें। बडि हित हानि जानि बिनु जूझें ॥

दो. गहहु घाट भट समिटि सब लेउँ मरम मिलि जाइ।

बूझि मित्र अरि मध्य गति तस तब करिहउँ आइ ॥ १९२ ॥

लखन सनेहु सुभायँ सुहाएँ। बैरु प्रीति नहिं दुरइँ दुराएँ ॥  
 अस कहि भेंट सँजोवन लागे। कंद मूल फल खग मृग मागे ॥  
 मीन पीन पाठीन पुराने। भरि भरि भार कहारन्ह आने ॥  
 मिलन साजु सजि मिलन सिधाए। मंगल मूल सगुन सुभ पाए ॥  
 देखि दूरि तें कहि निज नामू। कीन्ह मुनीसहि दंड प्रनामू ॥  
 जानि रामप्रिय दीन्हि असीसा। भरतहि कहेउ बुझाइ मुनीसा ॥  
 राम सखा सुनि संदनु त्यागा। चले उतरि उमगत अनुरागा ॥  
 गाउँ जाति गुहँ नाउँ सुनाई। कीन्ह जोहारु माथ महि लाई ॥

दो. करत दंडवत देखि तेहि भरत लीन्ह उर लाइ।

मनहुँ लखन सन भेंट भइ प्रेम न हृदयँ समाइ ॥ १९३ ॥

भेंटत भरतु ताहि अति प्रीती। लोग सिहाहिं प्रेम कै रीती ॥  
 धन्य धन्य धुनि मंगल मूला। सुर सराहि तेहि बरिसहिं फूला ॥  
 लोक बेद सब भाँतिहिं नीचा। जासु छाँह छुइ लेइअ सींचा ॥  
 तेहि भरि अंक राम लघु भ्राता। मिलत पुलक परिपूरित गाता ॥  
 राम राम कहि जे जमुहाहीं। तिन्हहि न पाप पुंज समुहाहीं ॥  
 यह तौ राम लाइ उर लीन्हा। कुल समेत जगु पावन कीन्हा ॥  
 करमनास जलु सुरसरि परई। तेहि को कहहु सीस नहिं धरई ॥  
 उलटा नामु जपत जगु जाना। बालमीकि भए ब्रह्म समाना ॥

दो. स्वपच सबर खस जमन जड पावँर कोल किरात।

रामु कहत पावन परम होत भुवन बिख्यात ॥ १९४ ॥

नहिं अचिरजु जुग जुग चलि आई। केहि न दीन्हि रघुबीर बडाई ॥  
 राम नाम महिमा सुर कहहीं। सुनि सुनि अवधलोग सुखु लहहीं ॥  
 रामसखहि मिलि भरत सप्रेमा। पूँछी कुसल सुमंगल खेमा ॥  
 देखि भरत कर सील सनेहू। भा निषाद तेहि समय बिदेहू ॥  
 सकुच सनेहु मोदु मन बाढा। भरतहि चितवत एकटक ठाढा ॥  
 धरि धीरजु पद बाँदि बहोरी। बिनय सप्रेम करत कर जोरी ॥  
 कुसल मूल पद पंकज पेखी। मैं तिहुँ काल कुसल निज लेखी ॥  
 अब प्रभु परम अनुग्रह तोरें। सहित कोटि कुल मंगल मोरें ॥

दो. समुझि मोरि करतूति कुलु प्रभु महिमा जियँ जोइ।

जो न भजइ रघुबीर पद जग बिधि बंचित सोइ ॥ १९५ ॥

कपटी कायर कुमति कुजाती। लोक बेद बाहेर सब भाँती ॥  
 राम कीन्ह आपन जबही तें। भयउँ भुवन भूषन तबही तें ॥  
 देखि प्रीति सुनि बिनय सुहाई। मिलेउ बहोरि भरत लघु भाई ॥  
 कहि निषाद निज नाम सुबानीं। सादर सकल जोहारी रानीं ॥  
 जानि लखन सम देहिं असीसा। जिअहु सुखी सय लाख बरीसा ॥  
 निरखि निषादु नगर नर नारी। भए सुखी जनु लखनु निहारी ॥  
 कहहिं लहेउ एहिं जीवन लाहू। भेंटैउ रामभद्र भरि बाहू ॥  
 सुनि निषादु निज भाग बडाई। प्रमुदित मन लइ चलेउ लेवाई ॥

दो. सनकारे सेवक सकल चले स्वामि रुख पाइ।

घर तरु तर सर बाग बन बास बनाएन्हि जाइ ॥ १९६ ॥

सृंगवेरपुर भरत दीख जब। भे सनेहँ सब अंग सिथिल तब ॥  
सोहत दिएँ निषादहि लागू। जनु तनु धरें बिनय अनुरागू ॥  
एहि विधि भरत सेनु सबु संग्गा। दीखि जाइ जग पावनि गंगा ॥  
रामघाट कहँ कीन्ह प्रनामू। भा मनु मगनु मिले जनु रामू ॥  
करहिँ प्रनाम नगर नर नारी। मुदित ब्रह्ममय बारि निहारी ॥  
करि मज्जनु मागहिँ कर जोरी। रामचंद्र पद प्रीति न थोरी ॥  
भरत कहेउ सुरसरि तव रेनू। सकल सुखद सेवक सुरधेनू ॥  
जोरि पानि बर मागउँ एहू। सीय राम पद सहज सनेहू ॥

दो. एहि विधि मज्जनु भरतु करि गुर अनुसासन पाइ।

मातु नहानीं जानि सब डेरा चले लवाइ ॥ १९७ ॥

जहँ तहँ लोगन्ह डेरा कीन्हा। भरत सोधु सबही कर लीन्हा ॥  
सुर सेवा करि आयसु पाई। राम मातु पहिँ गे दोउ भाई ॥  
चरन चाँपि कहि कहि मृदु बानी। जननीं सकल भरत सनमानी ॥  
भाइहि सौँपि मातु सेवकाई। आपु निषादहि लीन्ह बोलाई ॥  
चले सखा कर सों कर जोरें। सिथिल सरीर सनेह न थोरें ॥  
पूँछत सखाहि सो ठाउँ देखाऊ। नेकु नयन मन जरनि जुडाऊ ॥  
जहँ सिय रामु लखनु निसि सोए। कहत भरे जल लोचन कोए ॥  
भरत बचन सुनि भयउ बिषादू। तुरत तहाँ लइ गयउ निषादू ॥

दो. जहँ सिंसुपा पुनीत तर रघुबर किय विश्रामु।

अति सनेहँ सादर भरत कीन्हेउ दंड प्रनामु ॥ १९८ ॥

कुस साँथरीनिहारि सुहाई। कीन्ह प्रनामु प्रदच्छिन जाई ॥  
चरन रेख रज आँखिन्ह लाई। बनइ न कहत प्रीति अधिकारी ॥  
कनक बिंदु दुइ चारिक देखे। राखे सीस सीय सम लेखे ॥  
सजल बिलोचन हृदयँ गलानी। कहत सखा सन बचन सुबानी ॥  
श्रीहत सीय बिरहँ दुतिहीना। जथा अवध नर नारि बिलीना ॥  
पिता जनक देउँ पटतर केही। करतल भोगु जोगु जग जेही ॥  
ससुर भानुकुल भानु भुआलू। जेहि सिहात अमरावतिपालू ॥  
प्राननाथु रघुनाथ गोसाई। जो बड होत सो राम बडाई ॥

दो. पति देवता सुतीय मनि सीय साँथरी देखि।

बिहरत हृदउ न हहरि हर पवि तें कठिन बिसेषि ॥ १९९ ॥

लालन जोगु लखन लघु लोने। भे न भाइ अस अहहिं न होने ॥  
 पुरजन प्रिय पितु मातु दुलारे। सिय रघुबरहि प्रानपिआरे ॥  
 मृदु मूरति सुकुमार सुभाऊ। तात बाउ तन लाग न काऊ ॥  
 ते बन सहहिं बिपति सब भाँती। निदरे कोटि कुलिस एहिं छाती ॥  
 राम जनमि जगु कीन्ह उजागर। रूप सील सुख सब गुन सागर ॥  
 पुरजन परिजन गुर पितु माता। राम सुभाउ सबहि सुखदाता ॥  
 बैरिउ राम बडाई करहीं। बोलनि मिलनि बिनय मन हरहीं ॥  
 सारद कोटि कोटि सत सेवा। करि न सकहिं प्रभु गुन गन लेखा ॥

दो. सुखस्वरुप रघुवंसमनि मंगल मोद निधान।

ते सोवत कुस ड़ासि महि बिधि गति अति बलवान ॥ २०० ॥

राम सुना दुखु कान न काऊ। जीवनतरु जिमि जोगवइ राऊ ॥  
 पलक नयन फनि मनि जेहि भाँती। जोगवहिं जननि सकल दिन राती ॥  
 ते अब फिरत बिपिन पदचारी। कंद मूल फल फूल अहारी ॥  
 धिग कैकेई अमंगल मूला। भइसि प्रान प्रियतम प्रतिकूला ॥  
 मैं धिग धिग अघ उदधि अभागी। सबु उतपातु भयउ जेहि लागी ॥  
 कुल कलंकु करि सृजेउ विधाताँ। साइँदोह मोहि कीन्ह कुमाताँ ॥  
 सुनि सप्रेम समुझाव निषादू। नाथ करिअ कत बादि विषादू ॥  
 राम तुम्हहि प्रिय तुम्ह प्रिय रामहि। यह निरजोसु दोसु बिधि बामहि ॥

छं. बिधि बाम की करनी कठिन जेहिं मातु कीन्ही बावरी।

तेहि राति पुनि पुनि करहिं प्रभु सादर सरहना रावरी ॥

तुलसी न तुम्ह सो राम प्रीतमु कहतु हौं सौहें किऐँ।

परिनाम मंगल जानि अपने आनिए धीरजु हिऐँ ॥

सो. अंतरजामी रामु सकुच सप्रेम कृपायतन।

चलिअ करिअ विश्रामु यह बिचारि दृढ आनि मन ॥ २०१ ॥

सखा बचन सुनि उर धरि धीरा। बास चले सुमिरत रघुबीरा ॥  
 यह सुधि पाइ नगर नर नारी। चले बिलोकन आरत भारी ॥  
 परदखिना करि करहिं प्रनामा। देहिं कैकइहि खोरि निकामा ॥  
 भरी भरि बारि बिलोचन लेंहीं। बाम बिधाताहि दूषन देहीं ॥

एक सराहहिं भरत सनेहू। कोउ कह नृपति निबाहेउ नेहू ॥  
निंदहिं आपु सराहि निषादहि। को कहि सकइ बिमोह विषादहि ॥  
एहि विधि राति लोगु सबु जागा। भा भिनुसार गुदारा लागा ॥  
गुरहि सुनावँ चढाइ सुहाई। नई नाव सब मातु चढाई ॥  
दंड चारि महाँ भा सबु पारा। उतरि भरत तब सबहि सँभारा ॥

दो. प्रातक्रिया करि मातु पद बंदि गुरहि सिरु नाइ।

आगें किए निषाद गन दीन्हेउ कटकु चलाइ ॥ २०२ ॥

कियउ निषादनाथु अगुआई। मातु पालकीं सकल चलाई ॥  
साथ बोलाइ भाइ लघु दीन्हा। विप्रन्ह सहित गवनु गुर कीन्हा ॥  
आपु सुरसरिहि कीन्ह प्रनामू। सुमिरे लखन सहित सिय रामू ॥  
गवने भरत पयोदेहिं पाए। कीतल संग जाहिं डोरिआए ॥  
कहहिं सुसेवक बारहिं बारा। होइअ नाथ अस्व असवारा ॥  
रामु पयोदेहि पायँ सिधाए। हम कहँ रथ गज बाजि बनाए ॥  
सिर भर जाउँ उचित अस मोरा। सब तें सेवक धरमु कठोरा ॥  
देखि भरत गति सुनि मृदु बानी। सब सेवक गन गरहिं गलानी ॥

दो. भरत तीसरे पहर कहँ कीन्ह प्रबेसु प्रयाग।

कहत राम सिय राम सिय उमगि उमगि अनुराग ॥ २०३ ॥

झलका झलकत पायन्ह कैसैं। पंकज कोस ओस कन जैसें ॥  
भरत पयादेहिं आए आजू। भयउ दुखित सुनि सकल समाजू ॥  
खबरि लीन्ह सब लोग नहाए। कीन्ह प्रनामु त्रिबेनिहिं आए ॥  
सबिधि सितासित नीर नहाने। दिए दान महिसुर सनमाने ॥  
देखत स्यामल धवल हलोरे। पुलकि सरीर भरत कर जोरे ॥  
सकल काम प्रद तीरथराऊ। वेद विदित जग प्रगट प्रभाऊ ॥  
मागउँ भीख त्यागि निज धरमू। आरत काह न करइ कुकरमू ॥  
अस जियँ जानि सुजान सुदानी। सफल करहिं जग जाचक बानी ॥

दो. अरथ न धरम न काम रुचि गति न चहउँ निरवान।

जनम जनम रति राम पद यह बरदानु न आन ॥ २०४ ॥

जानहुँ रामु कुटिल करि मोही। लोग कहउ गुर साहिब द्रोही ॥  
सीता राम चरन रति मोरें। अनुदिन बढउ अनुग्रह तोरें ॥  
जलदु जनम भरि सुरति बिसारउ। जाचत जलु पबि पाहन डारउ ॥

चातकु रटनि घटें घटि जाई। बढे प्रेमु सब भाँति भलाई ॥  
 कनकहि बान चढइ जिमि दाहें। तिमि प्रियतम पद नेम निबाहें ॥  
 भरत बचन सुनि माझ त्रिबेनी। भइ मृदु बानि सुमंगल देनी ॥  
 तात भरत तुम्ह सब विधि साधू। राम चरन अनुराग अगाधू ॥  
 बाद गलानि करहु मन माहीं। तुम्ह सम रामहि कोउ प्रिय नाही ॥

दो. तनु पुलकेउ हियँ हरषु सुनि बेनि बचन अनुकूल।

भरत धन्य कहि धन्य सुर हरषित वरषहिं फूल ॥ २०५ ॥

प्रमुदित तीरथराज निवासी। बैखानस बटु गृही उदासी ॥  
 कहहिं परसपर मिलि दस पाँचा। भरत सनेह सीलु सुचि साँचा ॥  
 सुनत राम गुन ग्राम सुहाए। भरद्वाज मुनिबर पहिं आए ॥  
 दंड प्रनामु करत मुनि देखे। मूरतिमंत भाग्य निज लेखे ॥  
 धाइ उठाइ लाइ उर लीन्हे। दीन्हि असीस कृतारथ कीन्हे ॥  
 आसनु दीन्हे नाइ सिरु बैठे। चहत सकुच गृहँ जनु भजि पैठे ॥  
 मुनि पूँछब कछु यह बड सोचू। बोले रिषि लखि सीलु सँकोचू ॥  
 सुनहु भरत हम सब सुधि पाई। विधि करतव पर किछु न बसाई ॥

दो. तुम्ह गलानि जियँ जनि करहु समुझी मातु करतूति।

तात कैकइहि दोसु नहिं गई गिरा मति धूति ॥ २०६ ॥

यहउ कहत भल कहिहि न कोऊ। लोको बेद बुध संमत दोऊ ॥  
 तात तुम्हार बिमल जसु गाई। पाइहि लोकउ बेदु बडाई ॥  
 लोक बेद संमत सबु कहई। जेहि पितु देइ राजु सो लहई ॥  
 राउ सत्यव्रत तुम्हहि बोलाई। देत राजु सुखु धरमु बडाई ॥  
 राम गवनु बन अनरथ मूला। जो सुनि सकल बिस्व भइ सूला ॥  
 सो भावी बस रानि अयानी। करि कुचालि अंतहुँ पछितानी ॥  
 तहँउँ तुम्हार अलप अपराधू। कहै सो अधम अयान असाधू ॥  
 करतेहु राजु त तुम्हहि न दोषू। रामहि होत सुनत संतोषू ॥

दो. अब अति कीन्हेहु भरत भल तुम्हहि उचित मत एहु।

सकल सुमंगल मूल जग रघुबर चरन सनेहु ॥ २०७ ॥

सो तुम्हार धनु जीवनु प्राना। भूरिभाग को तुम्हहि समाना ॥  
 यह तम्हार आचरजु न ताता। दसरथ सुअन राम प्रिय भ्राता ॥  
 सुनहु भरत रघुबर मन माहीं। पेम पात्रु तुम्ह सम कोउ नाही ॥

लखन राम सीतहि अति प्रीती। निसि सब तुम्हहि सराहत बीती ॥  
जाना मरमु नहात प्रयागा। मगन होहि तुम्हरें अनुरागा ॥  
तुम्ह पर अस सनेहु रघुवर कें। सुख जीवन जग जस जड नर कें ॥  
यह न अधिक रघुबीर बडाई। प्रनत कुटुंब पाल रघुराई ॥  
तुम्ह तौ भरत मोर मत प्हु। धरें देह जनु राम सनेहु ॥

दो. तुम्ह कहँ भरत कलंक यह हम सब कहँ उपदेसु।

राम भगति रस सिद्धि हित भा यह समउ गनेसु ॥ २०८ ॥

नव बिधु बिमल तात जसु तोरा। रघुवर किंकर कुमुद चकोरा ॥  
उदित सदा अँथइहि कबहँ ना। घटिहि न जग नभ दिन दिन दूना ॥  
कोक तिलोक प्रीति अति करिही। प्रभु प्रताप रबि छबिहि न हरिही ॥  
निसि दिन सुखद सदा सब काहू। ग्रसिहि न कैकइ करतबु राहू ॥  
पूरन राम सुपेम पियूषा। गुर अवमान दोष नहिँ दूषा ॥  
राम भगत अब अमिअँ अघाहँ। कीन्हेहु सुलभ सुधा बसुधाहँ ॥  
भूप भगीरथ सुरसरि आनी। सुमिरत सकल सुंमगल खानी ॥  
दसरथ गुन गन बरनि न जाहीं। अधिकु कहा जेहि सम जग नाहीं ॥

दो. जासु सनेह सकोच बस राम प्रगट भए आइ ॥

जे हर हिय नयननि कबहुँ निरखे नहीं अघाइ ॥ २०९ ॥

कीरति बिधु तुम्ह कीन्ह अनूपा। जहँ बस राम पेम मृगरूपा ॥  
तात गलानि करहु जियँ जाएँ। डरहु दरिद्रहि पारसु पाएँ ॥ ॥  
सुनहु भरत हम झूठ न कहहीं। उदासीन तापस बन रहहीं ॥  
सब साधन कर सुफल सुहावा। लखन राम सिय दरसनु पावा ॥  
तेहि फल कर फलु दरस तुम्हारा। सहित पयाग सुभाग हमारा ॥  
भरत धन्य तुम्ह जसु जगु जयऊ। कहि अस पेम मगन पुनि भयऊ ॥  
सुनि मुनि बचन सभासद हरषे। साधु सराहि सुमन सुर बरषे ॥  
धन्य धन्य धुनि गगन पयागा। सुनि सुनि भरतु मगन अनुरागा ॥

दो. पुलक गात हियँ रामु सिय सजल सरोरुह नैन।

करि प्रनामु मुनि मंडलिहि बोले गदगद बैन ॥ २१० ॥

मुनि समाजु अरु तीरथराजू। साँचिहुँ सपथ अघाइ अकाजू ॥  
एहिं थल जौं किछु कहिअ बनाई। एहि सम अधिक न अघ अधमाई ॥  
तुम्ह सर्वग्य कहउँ सतिभाऊ। उर अंतरजामी रघुराऊ ॥

मोहि न मातु करतव कर सोचू। नहिं दुखु जियँ जगु जानिहि पोचू ॥  
 नाहिन डरु बिगरिहि परलोकू। पितहु मरन कर मोहि न सोकू ॥  
 सुकृत सुजस भरि भुअन सुहाए। लछिमन राम सरिस सुत पाए ॥  
 राम बिरहँ तजि तनु छनभंगू। भूप सोच कर कवन प्रसंगू ॥  
 राम लखन सिय बिनु पग पनहीं। करि मुनि बेष फिरहिं बन बनही ॥

दो. अजिन बसन फल असन महि सयन ड़ासि कुस पात।  
 बसि तरु तर नित सहत हिम आतप बरषा बात ॥ २११ ॥

एहि दुख दाहँ दहइ दिन छाती। भूख न बासर नीद न राती ॥  
 एहि कुरोग कर औषधु नाहीं। सोधेउँ सकल बिस्व मन माहीं ॥  
 मातु कुमत बढई अघ मूला। तेहिं हमार हित कीन्ह बँसूला ॥  
 कलि कुकाठ कर कीन्ह कुजंत्रू। गाडि अवधि पढि कठिन कुमंत्रु ॥  
 मोहि लगि यहु कुठाटु तेहिं ठाटा। घालेसि सब जगु बारहवाटा ॥  
 मिटइ कुजोगु राम फिरि आएँ। बसइ अवध नहिं आन उपाएँ ॥  
 भरत बचन सुनि मुनि सुखु पाई। सबहिं कीन्ह बहु भाँति बडाई ॥  
 तात करहु जनि सोचु बिसेषी। सब दुखु मिटहि राम पग देखी ॥

दो. करि प्रबोध मुनिबर कहेउ अतिथि पेमप्रिय होहु।  
 कंद मूल फल फूल हम देहिं लेहु करि छोहु ॥ २१२ ॥

सुनि मुनि बचन भरत हिँय सोचू। भयउ कुअवसर कठिन सँकोचू ॥  
 जानि गरुइ गुर गिरा बहोरी। चरन बंदि बोले कर जोरी ॥  
 सिर धरि आयसु करिअ तुम्हारा। परम धरम यहु नाथ हमारा ॥  
 भरत बचन मुनिबर मन भाए। सुचि सेवक सिष निकट बोलाए ॥  
 चाहिए कीन्ह भरत पहुनाई। कंद मूल फल आनहु जाई ॥  
 भलेहीं नाथ कहि तिन्ह सिर नाए। प्रमुदित निज निज काज सिधाए ॥  
 मुनिहि सोच पाहुन बड नेवता। तसि पूजा चाहिअ जस देवता ॥  
 सुनि रिधि सिधि अनिमादिक आई। आयसु होइ सो करहिं गोसाई ॥

दो. राम बिरह ब्याकुल भरतु सानुज सहित समाज।  
 पहुनाई करि हरहु श्रम कहा मुदित मुनिराज ॥ २१३ ॥

रिधि सिधि सिर धरि मुनिबर बानी। बडभागिनि आपुहि अनुमानी ॥  
 कहहिं परसपर सिधि समुदाई। अतुलित अतिथि राम लघु भाई ॥  
 मुनि पद बंदि करिअ सोइ आजू। होइ सुखी सब राज समाजू ॥

अस कहि रचेउ रुचिर गृह नाना। जेहि बिलोकि बिलखाहिं बिमाना ॥  
भोग बिभूति भूरि भरि राखे। देखत जिन्हहि अमर अभिलाषे ॥  
दासीं दास साजु सब लीन्हें। जोगवत रहहिं मनहि मनु दीन्हें ॥  
सब समाजु सजि सिधि पल माहीं। जे सुख सुरपुर सपनेहुं नाहीं ॥  
प्रथमहिं बास दिए सब केही। सुंदर सुखद जथा रुचि जेही ॥

दो. बहुरि सपरिजन भरत कहूँ रिषि अस आयसु दीन्ह।

विधि बिसमय दायकु बिभव मुनिबर तपबल कीन्ह ॥ २१४ ॥

मुनि प्रभाउ जब भरत बिलोका। सब लघु लगे लोकपति लोका ॥  
सुख समाजु नहिं जाइ बखानी। देखत विरति बिसारहीं ग्यानी ॥  
आसन सयन सुबसन बिताना। बन बाटिका बिहग मृग नाना ॥  
सुरभि फूल फल अमिअ समाना। बिमल जलासय बिबिध बिधाना।  
असन पान सुच अमिअ अमी से। देखि लोग सकुचात जमी से ॥  
सुर सुरभी सुरतरु सबही कें। लखि अभिलाषु सुरेस सची कें ॥  
रितु बसंत बह त्रिविध बयारी। सब कहूँ सुलभ पदारथ चारी ॥  
स्वक चंदन बनितादिक भोगा। देखि हरष बिसमय बस लोगा ॥

दो. संपत चकई भरतु चक मुनि आयस खेलवार ॥

तेहि निसि आश्रम पिंजरौं राखे भा भिनुसार ॥ २१५ ॥

मासपारायण, उन्नीसवाँ विश्राम

कीन्ह निमज्जनु तीरथराजा। नाइ मुनिहि सिरु सहित समाजा ॥  
रिषि आयसु असीस सिर राखी। करि दंडवत बिनय बहु भाषी ॥  
पथ गति कुसल साथ सब लीन्हे। चले चित्रकूटहिं चितु दीन्हें ॥  
रामसखा कर दीन्हें लागू। चलत देह धरि जनु अनुरागू ॥  
नहिं पद त्रान सीस नहिं छाया। पेमु नेमु ब्रतु धरमु अमाया ॥  
लखन राम सिय पंथ कहानी। पूँछत सखहि कहत मृदु बानी ॥  
राम बास थल बिटप बिलोकें। उर अनुराग रहत नहिं रोकैं ॥  
दैखि दसा सुर बरिसहिं फूला। भइ मृदु महि मगु मंगल मूला ॥

दो. किँ जाहिं छाया जलद सुखद बहइ बर बात।

तस मगु भयउ न राम कहूँ जस भा भरतहि जात ॥ २१६ ॥

जड चेतन मग जीव घनेरे। जे चितए प्रभु जिन्ह प्रभु हेरे ॥  
ते सब भए परम पद जोगू। भरत दरस मेटा भव रोगू ॥

यह बडि बात भरत कइ नाहीं। सुमिरत जिनहि रामु मन माहीं ॥  
 बारक राम कहत जग जेऊ। होत तरन तारन नर तेऊ ॥  
 भरतु राम प्रिय पुनि लघु भ्राता। कस न होइ मगु मंगलदाता ॥  
 सिद्ध साधु मुनिबर अस कहहीं। भरतहि निरखि हरषु हियँ लहहीं ॥  
 देखि प्रभाउ सुरेसहि सोचू। जगु भल भलेहि पोच कहूँ पोचू ॥  
 गुर सन कहेउ करिअ प्रभु सोई। रामहि भरतहि भेंट न होई ॥

दो. रामु सँकोची प्रेम बस भरत सपेम पयोधि।

बनी बात बेगरन चहति करिअ जतनु छलु सोधि ॥ २१७ ॥

बचन सुनत सुरगुरु मुसकाने। सहस्रनयन विनु लोचन जाने ॥  
 मायापति सेवक सन माया। करइ त उलटि परइ सुरराया ॥  
 तब किल्लु कीन्ह राम रुख जानी। अब कुचालि करि होइहि हानी ॥  
 सुनु सुरेस रघुनाथ सुभाऊ। निज अपराध रिसाहिं न काऊ ॥  
 जो अपराधु भगत कर करई। राम रोष पावक सो जरई ॥  
 लोकहुँ बेद विदित इतिहासा। यह महिमा जानहिं दुरबासा ॥  
 भरत सरिस को राम सनेही। जगु जप राम रामु जप जेही ॥

दो. मनहुँ न आनिअ अमरपति रघुबर भगत अकाजु।

अजसु लोक परलोक दुख दिन दिन सोक समाजु ॥ २१८ ॥

सुनु सुरेस उपदेसु हमार। रामहि सेवकु परम पिआरा ॥  
 मानत सुखु सेवक सेवकाई। सेवक बैर बैरु अधिकाई ॥  
 जद्यपि सम नहिं राग न रोषू। गहहिं न पाप पूनु गुन दोषू ॥  
 करम प्रधान बिस्व करि राखा। जो जस करइ सो तस फलु चाखा ॥  
 तदपि करहिं सम बिषम बिहार। भगत अभगत हृदय अनुसार ॥  
 अगुन अलेप अमान एकरस। रामु सगुन भए भगत पेम बस ॥  
 राम सदा सेवक रुचि राखी। बेद पुरान साधु सुर साखी ॥  
 अस जियँ जानि तजहु कृटिलाई। करहु भरत पद प्रीति सुहाई ॥

दो. राम भगत परहित निरत पर दुख दुखी दयाल।

भगत सिरोमनि भरत तें जनि डरपहु सुरपाल ॥ २१९ ॥

सत्यसंध प्रभु सुर हितकारी। भरत राम आयस अनुसारी ॥  
 स्वारथ बिबस विकल तुम्ह होहू। भरत दोसु नहिं राउर मोहू ॥  
 सुनि सुरवर सुरगुर बर बानी। भा प्रमोदु मन मिटी गलानी ॥

बरषि प्रसून हरषि सुरराऊ। लगे सराहन भरत सुभाऊ ॥  
 एहि विधि भरत चले मग जाहीं। दसा देखि मुनि सिद्ध सिहाहीं ॥  
 जबहिं रामु कहि लेहिं उसासा। उमगत पेमु मनहँ चहु पासा ॥  
 द्रवहिं बचन सुनि कुलिस पषाना। पुरजन पेमु न जाइ बखाना ॥  
 बीच बास करि जमुनहिं आए। निरखि नीरु लोचन जल छाए ॥

दो. रघुबर बरन बिलोकि बर बारि समेत समाज।

होत मगन बारिधि बिरह चढे बिबेक जहाज ॥ २२० ॥

जमुन तीर तेहि दिन करि बासू। भयउ समय सम सबहि सुपासू ॥  
 रातहिं घाट घाट की तरनी। आई अगनित जाहिं न बरनी ॥  
 प्रात पार भए एकहि खेवाँ। तोषे रामसखा की सेवाँ ॥  
 चले नहाइ नदिहि सिर नाई। साथ निषादनाथ दोउ भाई ॥  
 आगें मुनिबर बाहन आछें। राजसमाज जाइ सबु पाछें ॥  
 तेहिं पाछें दोउ बंधु पयादें। भूषन बसन बेष सुठि सादें ॥  
 सेवक सुहृद सचिवसुत साथा। सुमिरत लखनु सीय रघुनाथा ॥  
 जहँ जहँ राम बास विश्रामा। तहँ तहँ करहिं सप्रेम प्रनामा ॥

दो. मगबासी नर नारि सुनि धाम काम तजि धाइ।

देखि सरूप सनेह सब मुदित जनम फलु पाइ ॥ २२१ ॥

कहहिं सपेम एक एक पाहीं। रामु लखनु सखि होहिं कि नाहीं ॥  
 बय बपु बरन रूप सोइ आली। सीलु सनेहु सरिस सम चाली ॥  
 बेषु न सो सखि सीय न संगी। आगें अनी चली चतुरंगा ॥  
 नहिं प्रसन्न मुख मानस खेदा। सखि संदेहु होइ एहिं भेदा ॥  
 तासु तरक तियगन मन मानी। कहहिं सकल तेहि सम न सयानी ॥  
 तेहि सराहि बानी फुरि पूजी। बोली मधुर बचन तिय दूजी ॥  
 कहि सपेम सब कथाप्रसंगू। जेहि विधि राम राज रस भंगू ॥  
 भरतहि बहुरि सराहन लागी। सील सनेह सुभाय सुभागी ॥

दो. चलत पयादें खात फल पिता दीन्ह तजि राजु।

जात मनावन रघुबरहि भरत सरिस को आजु ॥ २२२ ॥

भायप भगति भरत आचरनू। कहत सुनत दुख दूषन हरनू ॥  
 जो कछु कहब थोर सखि सोई। राम बंधु अस काहे न होई ॥  
 हम सब सानुज भरतहि देखें। भइन्ह धन्य जुबती जन लेखें ॥

सुनि गुन देखि दसा पछिताहीं। कैकइ जननि जोगु सुतु नाहीं ॥  
 कोउ कह दूषनु रानिहि नाहिन। बिधि सबु कीन्ह हमहि जो दाहिन ॥  
 कहँ हम लोक बेद बिधि हीनी। लघु तिय कुल करतूति मलीनी ॥  
 बसहिँ कुदेस कुगाँव कुबामा। कहँ यह दरसु पुन्य परिनामा ॥  
 अस अनंदु अचिरिजु प्रति ग्रामा। जनु मरुभूमि कलपतरु जामा ॥  
 दो. भरत दरसु देखत खुलेउ मग लोगन्ह कर भागु।

जनु सिंघलबासिन्ह भयउ बिधि बस सुलभ प्रयागु ॥ २२३ ॥

निज गुन सहित राम गुन गाथा। सुनत जाहिँ सुमिरत रघुनाथा ॥  
 तीरथ मुनि आश्रम सुरधामा। निरखि निमज्जहिँ करहिँ प्रनामा ॥  
 मनहीं मन मागहिँ बरु एहू। सीय राम पद पदुम सनेहू ॥  
 मिलहिँ किरात कोल बनबासी। बैखानस बटु जती उदासी ॥  
 करि प्रनामु पूँछहिँ जेहिँ तेही। केहि बन लखनु रामु बैदेही ॥  
 ते प्रभु समाचार सब कहहीं। भरतहि देखि जनम फलु लहहीं ॥  
 जे जन कहहिँ कुसल हम देखे। ते प्रिय राम लखन सम लेखे ॥  
 एहि बिधि बूझत सबहि सुबानी। सुनत राम बनबास कहानी ॥  
 दो. तेहि बासर बसि प्रातहीं चले सुमिरि रघुनाथ।

राम दरस की लालसा भरत सरिस सब साथ ॥ २२४ ॥

मंगल सगुन होहिँ सब काहू। फरकहिँ सुखद बिलोचन बाहू ॥  
 भरतहि सहित समाज उछाहू। मिलिहहिँ रामु मिटहि दुख दाहू ॥  
 करत मनोरथ जस जियँ जाके। जाहिँ सनेह सुराँ सब छाके ॥  
 सिथिल अंग पग मग डगि डोलहिँ। बिहबल बचन पेम बस बोलहिँ ॥  
 रामसखाँ तेहि समय देखावा। सैल सिरोमनि सहज सुहावा ॥  
 जासु समीप सरित पय तीरा। सीय समेत बसहिँ दोउ बीरा ॥  
 देखि करहिँ सब दंड प्रनामा। कहि जय जानकि जीवन रामा ॥  
 प्रेम मगन अस राज समाजू। जनु फिरि अवध चले रघुराजू ॥  
 दो. भरत प्रेमु तेहि समय जस तस कहि सकइ न सेषु।

कबिहिँ अगम जिमि ब्रह्मसुखु अह मम मलिन जनेषु ॥ २२५ ॥

सकल सनेह सिथिल रघुबर कें। गए कोस दुइ दिनकर ढरकें ॥  
 जलु थलु देखि बसे निसि बीतें। कीन्ह गवन रघुनाथ पिरीतें ॥  
 उहाँ रामु रजनी अवसेषा। जागे सीयँ सपन अस देखा ॥

सहित समाज भरत जनु आए। नाथ बियोग ताप तन ताए ॥  
 सकल मलिन मन दीन दुखारी। देखीं सासु आन अनुहारी ॥  
 सुनि सिय सपन भरे जल लोचन। भए सोचबस सोच बिमोचन ॥  
 लखन सपन यह नीक न होई। कठिन कुचाह सुनाइहि कोई ॥  
 अस कहि बंधु समेत नहाने। पूजि पुरारि साधु सनमाने ॥

छं. सनमानि सुर मुनि बंदि बैठे उत्तर दिसि देखत भए।  
 नभ धूरि खग मृग भूरि भागे बिकल प्रभु आश्रम गए ॥  
 तुलसी उठे अवलोकि कारनु काह चित सचकित रहे।  
 सब समाचार किरात कोलन्हि आइ तेहि अवसर कहे ॥

दो. सुनत सुमंगल बैन मन प्रमोद तन पुलक भर।  
 सरद सरोरुह नैन तुलसी भरे सनेह जल ॥ २२६ ॥

बहुरि सोचबस भे सियरवनू। कारन कवन भरत आगवनू ॥  
 एक आइ अस कहा बहोरी। सेन संग चतुरंग न थोरी ॥  
 सो सुनि रामहि भा अति सोचू। इत पितु बच इत बंधु सकोचू ॥  
 भरत सुभाउ समुझि मन माहीं। प्रभु चित हित थिति पावत नाही ॥  
 समाधान तब भा यह जाने। भरतु कहे महुँ साधु सयाने ॥  
 लखन लखेउ प्रभु हृदयँ खभारू। कहत समय सम नीति बिचारू ॥  
 विनु पूँछ कछु कहउँ गोसाईं। सेवकु समयँ न ढीठ ढिठाई ॥  
 तुम्ह सर्वग्य सिरामनि स्वामी। आपनि समुझि कहउँ अनुगामी ॥

दो. नाथ सुहृद सुठि सरल चित सील सनेह निधान ॥  
 सब पर प्रीति प्रतीति जियँ जानिअ आपु समान ॥ २२७ ॥

बिषई जीव पाइ प्रभुताई। मूढ मोह बस होहिं जनाई ॥  
 भरतु नीति रत साधु सुजाना। प्रभु पद प्रेम सकल जगु जाना ॥  
 तेऊ आजु राम पदु पाई। चले धरम मरजाद मेटाई ॥  
 कुटिल कुबंध कुअवसरु ताकी। जानि राम बनवास एकाकी ॥  
 करि कुमंत्रु मन साजि समाजू। आए करै अकंटक राजू ॥  
 कोटि प्रकार कलपि कुटलाई। आए दल बटोरि दोउ भाई ॥  
 जौं जियँ होति न कपट कुचाली। केहि सोहाति रथ बाजि गजाली ॥  
 भरतहि दोसु देइ को जाएँ। जग बौराइ राज पदु पाएँ ॥

दो. ससि गुर तिय गामी नघुषु चढेउ भूमिसुर जान।

लोक बेद तें विमुख भा अधम न बेन समान ॥ २२८ ॥

सहसबाहु सुरनाथु त्रिसंकू। केहि न राजमद दीन्ह कलंकू ॥  
 भरत कीन्ह यह उचित उपाऊ। रिपु रिन रंच न राखब काऊ ॥  
 एक कीन्हि नहिं भरत भलाई। निदरे रामु जानि असहाई ॥  
 समुझि परिहि सोउ आजु बिसेषी। समर सरोष राम मुखु पेखी ॥  
 एतना कहत नीति रस भूला। रन रस बिटपु पुलक मिस फूला ॥  
 प्रभु पद बंदि सीस रज राखी। बोले सत्य सहज बलु भाषी ॥  
 अनुचित नाथ न मानब मोरा। भरत हमहि उपचार न थोरा ॥  
 कहँ लागि सहिअ रहिअ मनु मारें। नाथ साथ धनु हाथ हमारें ॥

दो. छत्रि जाति रघुकुल जनमु राम अनुग जगु जान।

लातहुँ मारें चढति सिर नीच को धूरि समान ॥ २२९ ॥

उठि कर जोरि रजायसु मागा। मनहुँ बीर रस सोवत जागा ॥  
 बाँधि जटा सिर कसि कटि भाथा। साजि सरासनु सायकु हाथा ॥  
 आजु राम सेवक जसु लेऊँ। भरतहि समर सिखावन देऊँ ॥  
 राम निरादर कर फलु पाई। सोवहुँ समर सेज दोउ भाई ॥  
 आइ बना भल सकल समाजू। प्रगट करउँ रिस पाछिल आजू ॥  
 जिमि करि निकर दलइ मृगराजू। लेइ लपेटि लवा जिमि बाजू ॥  
 तैसेहि भरतहि सेन समेता। सानुज निदरि निपातउँ खेता ॥  
 जौँ सहाय कर संकरु आई। तौ मारउँ रन राम दोहाई ॥

दो. अति सरोष माखे लखनु लखि सुनि सपथ प्रवान।

सभय लोक सब लोकपति चाहत भभरि भगान ॥ २३० ॥

जगु भय मगन गगन भइ बानी। लखन बाहुबलु विपुल बखानी ॥  
 तात प्रताप प्रभाउ तुम्हारा। को कहि सकइ को जाननिहारा ॥  
 अनुचित उचित काजु किछु होऊ। समुझि करिअ भल कह सबु कोऊ ॥  
 सहसा करि पाछैं पछिताहीं। कहहिं बेद बुध ते बुध नाहीं ॥  
 सुनि सुर बचन लखन सकुचाने। राम सीयँ सादर सनमाने ॥  
 कही तात तुम्ह नीति सुहाई। सब तें कठिन राजमदु भाई ॥  
 जो अचवँत नृप मातहिं तेई। नाहिन साधुसभा जेहिं सेई ॥  
 सुनहु लखन भल भरत सरीसा। बिधि प्रपंच महुँ सुना न दीसा ॥

दो. भरतहि होइ न राजमदु बिधि हरि हर पद पाइ ॥

कबहुँ कि काँजी सीकरनि छीरसिंधु विनसाइ ॥ २३१ ॥

तिमिरु तरुन तरनिहि मकु गिलई। गगनु मगन मकु मेघहिं मिलई ॥  
 गोपद जल बूडहिं घटजोनी। सहज छमा बरु छाडै छोनी ॥  
 मसक फूँक मकु मेरु उडाई। होइ न नृपमदु भरतहि भाई ॥  
 लखन तुम्हार सपथ पितु आना। सुचि सुबंधु नहिं भरत समाना ॥  
 सगुन खीरु अवगुन जलु ताता। मिलइ रचइ परपंचु बिधाता ॥  
 भरतु हंस रबिबंस तडागा। जनमि कीन्ह गुन दोष बिभागा ॥  
 गहिं गुन पय तजि अवगुन बारी। निज जस जगत कीन्हि उजिआरी ॥  
 कहत भरत गुन सीलु सुभाऊ। पेम पयोधि मगन रघुराऊ ॥

दो. सुनि रघुवर बानी बिबुध देखि भरत पर हेतु।

सकल सराहत राम सो प्रभु को कृपानिकेतु ॥ २३२ ॥

जौं न होत जग जनम भरत को। सकल धरम धुर धरनि धरत को ॥  
 कबि कुल अगम भरत गुन गाथा। को जानइ तुम्ह बिनु रघुनाथा ॥  
 लखन राम सियँ सुनि सुर बानी। अति सुखु लहेउ न जाइ बखानी ॥  
 इहाँ भरतु सब सहित सहाए। मंदाकिनीं पुनीत नहाए ॥  
 सरित समीप राखि सब लोगा। मागि मातु गुर सचिव नियोगा ॥  
 चले भरतु जहँ सिय रघुराई। साथ निषादनाथु लघु भाई ॥  
 समुझि मातु करतब सकुचाहीं। करत कुतरक कोटि मन माहीं ॥  
 रामु लखनु सिय सुनि मम नाऊँ। उठि जनि अनत जाहिं तजि ठाऊँ ॥

दो. मातु मते महुँ मानि मोहि जो कछु करहिं सो थोर।

अघ अवगुन छमि आदरहिं समुझि आपनी ओर ॥ २३३ ॥

जौं परिहरहिं मलिन मनु जानी। जौ सनमानहिं सेवकु मानी ॥  
 मोरें सरन रामहि की पनही। राम सुस्वामि दोसु सब जनही ॥  
 जग जस भाजन चातक मीना। नेम पेम निज निपुन नबीना ॥  
 अस मन गुनत चले मग जाता। सकुच सनेहँ सिथिल सब गाता ॥  
 फेरत मनहुँ मातु कृत खोरी। चलत भगति बल धीरज धोरी ॥  
 जब समुझत रघुनाथ सुभाऊ। तब पथ परत उताइल पाऊ ॥  
 भरत दसा तेहि अवसर कैसी। जल प्रवाहँ जल अलि गति जैसी ॥  
 देखि भरत कर सोचु सनेह। भा निषाद तेहि समयँ बिदेह ॥

दो. लगे होन मंगल सगुन सुनि गुनि कहत निषादु।

मिटिहि सोचु होइहि हरषु पुनि परिनाम बिषादु ॥ २३४ ॥

सेवक बचन सत्य सब जाने। आश्रम निकट जाइ निअराने ॥  
 भरत दीख बन सैल समाजू। मुदित छुधित जनु पाइ सुनाजू ॥  
 ईति भीति जनु प्रजा दुखारी। त्रिविध ताप पीडित ग्रह मारी ॥  
 जाइ सुराज सुदेस सुखारी। होहि भरत गति तेहि अनुहारी ॥  
 राम बास बन संपति भ्राजा। सुखी प्रजा जनु पाइ सुराजा ॥  
 सचिव बिरागु बिबेकु नरेसू। बिपिन सुहावन पावन देसू ॥  
 भट जम नियम सैल रजधानी। सांति सुमति सुचि सुंदर रानी ॥  
 सकल अंग संपन्न सुराऊ। राम चरन आश्रित चित चाऊ ॥

दो. जीति मोह महिपालु दल सहित बिबेक भुआलु।

करत अकंटक राजु पुरँ सुख संपदा सुकालु ॥ २३५ ॥

बन प्रदेस मुनि बास घनेरे। जनु पुर नगर गाउँ गन खेरे ॥  
 बिपुल बिचित्र बिहग मृग नाना। प्रजा समाजु न जाइ बखाना ॥  
 खगहा करि हरि बाघ बराहा। देखि महिष वृष साजु सराहा ॥  
 बयरु बिहाइ चरहिँ एक संग्गा। जहँ तहँ मनहुँ सेन चतुरंग्गा ॥  
 झरना झरहिँ मत्त गज गाजहिँ। मनहुँ निसान बिबिधि बिधि बाजहिँ ॥  
 चक चकोर चातक सुक पिक गन। कूजत मंजु मराल मुदित मन ॥  
 अलिगन गावत नाचत मोरा। जनु सुराज मंगल चहु ओरा ॥  
 बेलि बिटप तुन सफल सफूला। सब समाजु मुद मंगल मूला ॥  
 दो. राम सैल सोभा निरखि भरत हृदयँ अति पेमु।

तापस तप फलु पाइ जिमि सुखी सिरानेँ नेमु ॥ २३६ ॥

मासपारायण, बीसवाँ विश्राम

नवाह्नपारायण, पाँचवाँ विश्राम

तब केवट ऊँचेँ चढि धाई। कहेउ भरत सन भुजा उठाई ॥  
 नाथ देखिअहिँ बिटप बिसाला। पाकरि जंबु रसाल तमाला ॥  
 जिन्ह तरुबरन्ह मध्य बटु सोहा। मंजु बिसाल देखि मनु मोहा ॥  
 नील सघन पल्लव फल लाला। अबिरल छाहँ सुखद सब काला ॥  
 मानहुँ तिमिर अरुनमय रासी। बिरची बिधि सँकैलि सुषमा सी ॥  
 ए तरु सरित समीप गोसाँई। रघुबर परनकुटी जहँ छाई ॥  
 तुलसी तरुबर बिबिध सुहाए। कहँ कहँ सियँ कहँ लखन लगाए ॥

बट छायाँ बेदिका बनाई। सियँ निज पानि सरोज सुहाई ॥

दो. जहाँ बैठि मुनिगन सहित नित सिय राम सुजान।

सुनहिँ कथा इतिहास सब आगम निगम पुरान ॥ २३७ ॥

सखा बचन सुनि बिटप निहारी। उमगे भरत बिलोचन बारी ॥

करत प्रनाम चले दोउ भाई। कहत प्रीति सारद सकुचाई ॥

हरषहिँ निरखि राम पद अंका। मानहुँ पारसु पायउ रंका ॥

रज सिर धरि हियँ नयनन्हि लावहिँ। रघुबर मिलन सरिस सुख पावहिँ ॥

देखि भरत गति अकथ अतीवा। प्रेम मगन मृग खग जड जीवा ॥

सखहि सनेह बिबस मग भूला। कहि सुपंथ सुर बरषहिँ फूला ॥

निरखि सिद्ध साधक अनुरागे। सहज सनेहु सराहन लागे ॥

होत न भूतल भाउ भरत को। अचर सचर चर अचर करत को ॥

दो. पेम अमिअ मंदरु बिरहु भरतु पयोधि गँभीर।

मथि प्रगटेउ सुर साधु हित कृपासिंधु रघुबीर ॥ २३८ ॥

सखा समेत मनोहर जोटा। लखेउ न लखन सघन बन ओटा ॥

भरत दीख प्रभु आश्रमु पावन। सकल सुमंगल सदन सुहावन ॥

करत प्रवेस मिटे दुख दावा। जनु जोगीं परमारथु पावा ॥

देखे भरत लखन प्रभु आगे। पूँछे बचन कहत अनुरागे ॥

सीस जटा कटि मुनि पट बाँधे। तून कसैं कर सरु धनु काँधे ॥

बेदी पर मुनि साधु समाजू। सीय सहित राजत रघुराजू ॥

बलकल बसन जटिल तनु स्यामा। जनु मुनि बेष कीन्ह रति कामा ॥

कर कमलनि धनु सायकु फेरत। जिय की जरनि हरत हँसि हेरत ॥

दो. लसत मंजु मुनि मंडली मध्य सीय रघुचंदु।

ग्यान सभाँ जनु तनु धरे भगति सच्चिदानंदु ॥ २३९ ॥

सानुज सखा समेत मगन मन। बिसरे हरष सोक सुख दुख गन ॥

पाहि नाथ कहि पाहि गोसाई। भूतल परे लकुट की नाई ॥

बचन सपेम लखन पहिचाने। करत प्रनामु भरत जियँ जाने ॥

बंधु सनेह सरस एहि ओरा। उत साहिब सेवा बस जोरा ॥

मिलि न जाइ नहिँ गुदरत बनई। सुकवि लखन मन की गति भनई ॥

रहे राखि सेवा पर भारू। चढी चंग जनु खैंच खेलारू ॥

कहत सप्रेम नाइ महि माथा। भरत प्रनाम करत रघुनाथा ॥

उठे रामु सुनि पेम अधीरा। कहूँ पट कहूँ निषंग धनु तीरा ॥

दो. बरबस लिए उठाइ उर लाए कृपानिधान।

भरत राम की मिलनि लखि विसरे सबहि अपान ॥ २४० ॥

मिलनि प्रीति किमि जाइ बखानी। कबिकुल अगम करम मन बानी ॥  
परम पेम पूरन दोउ भाई। मन बुधि चित अहमिति बिसराई ॥  
कहहु सुपेम प्रगट को करई। केहि छाया कवि मति अनुसरई ॥  
कबिहि अरथ आखर बलु साँचा। अनुहरि ताल गतिहि नटु नाचा ॥  
अगम सनेह भरत रघुवर को। जहँ न जाइ मनु बिधि हरि हर को ॥  
सो मैं कुमति कहौं केहि भाँती। बाज सुराग कि गाँडर ताँती ॥  
मिलनि बिलोकि भरत रघुवर की। सुरगन सभय धकधकी धरकी ॥  
समुझाए सुरगुरु जड जागे। बरषि प्रसून प्रसंसन लागे ॥

दो. मिलि सपेम रिपुसूदनहि केवटु भेंटउ राम।

भूरि भायँ भेंट भरत लछिमन करत प्रनाम ॥ २४१ ॥

भेंटउ लखन ललकि लघु भाई। बहुरि निषादु लीन्ह उर लाई ॥  
पुनि मुनिगन दुहुँ भाइन्ह बंदे। अभिमत आसिष पाइ अनंदे ॥  
सानुज भरत उमगि अनुरागा। धरि सिर सिय पद पदुम परागा ॥  
पुनि पुनि करत प्रनाम उठाए। सिर कर कमल परसि बैठाए ॥  
सीयँ असीस दीन्ह मन माहीं। मगन सनेहँ देह सुधि नाही ॥  
सब बिधि सानुकूल लखि सीता। भे निसोच उर अपडर बीता ॥  
कोउ किछु कहइ न कोउ किछु पूँछा। प्रेम भरा मन निज गति छूँछा ॥  
तेहि अवसर केवटु धीरजु धरि। जोरि पानि बिनवत प्रनामु करि ॥

दो. नाथ साथ मुनिनाथ के मातु सकल पुर लोग।

सेवक सेनप सचिव सब आए बिकल बियोग ॥ २४२ ॥

सीलसिंधु सुनि गुर आगवनू। सिय समीप राखे रिपुदवनू ॥  
चले सबेग रामु तेहि काला। धीर धरम धुर दीनदयाला ॥  
गुरहि देखि सानुज अनुरागे। दंड प्रनाम करन प्रभु लागे ॥  
मुनिबर धाइ लिए उर लाई। प्रेम उमगि भेंट दोउ भाई ॥  
प्रेम पुलकि केवट कहि नामू। कीन्ह दूरि तें दंड प्रनामू ॥  
रामसखा रिषि बरबस भेंट। जनु महि लुठत सनेह समेटा ॥  
रघुपति भगति सुमंगल मूला। नभ सराहि सुर बरिसहिं फूला ॥

एहि सम निपट नीच कोउ नाहीं। बड बसिष्ठ सम को जग माहीं ॥

दो. जेहि लखि लखनहु तें अधिक मिले मुदित मुनिराउ।

सो सीतापति भजन को प्रगट प्रताप प्रभाउ ॥ २४३ ॥

आरत लोग राम सबु जाना। करुनाकर सुजान भगवाना ॥  
जो जेहि भायँ रहा अभिलाषी। तेहि तेहि कै तसि तसि रुख राखी ॥

सानुज मिलि पल महु सब काहू। कीन्ह दूरि दुखु दारुन दाहू ॥  
यह बडि बातँ राम कै नाहीं। जिमि घट कोटि एक रबि छाहीं ॥  
मिलि केवटिहि उमगि अनुरागा। पुरजन सकल सराहहि भागा ॥  
देखी राम दुखित महतारी। जनु सुबेलि अवली हिम मारी ॥  
प्रथम राम भेंटी कैकेई। सरल सुभायँ भगति मति भेई ॥  
पग परि कीन्ह प्रबोधु बहोरी। काल करम विधि सिर धरि खोरी ॥

दो. भेटीं रघुवर मातु सब करि प्रबोधु परितोषु ॥

अंब ईस आधीन जगु काहु न देइअ दोषु ॥ २४४ ॥

गुरतिय पद बंदे दुहु भाई। सहित बिप्रतिय जे सँग आई ॥  
गंग गौरि सम सब सनमानी ॥ देहिं असीस मुदित मृदु बानी ॥  
गहि पद लगे सुमित्रा अंका। जनु भेटीं संपति अति रंका ॥  
पुनि जननि चरननि दोउ भ्राता। परे पेम ब्याकुल सब गाता ॥  
अति अनुराग अंब उर लाए। नयन सनेह सलिल अन्हवाए ॥  
तेहि अवसर कर हरष बिषादू। किमि कवि कहै मूक जिमि स्वादू ॥  
मिलि जननहि सानुज रघुराऊ। गुर सन कहेउ कि धारिअ पाऊ ॥  
पुरजन पाइ मुनीस नियोगू। जल थल तकि तकि उतरेउ लोगू ॥

दो. महिसुर मंत्री मातु गुर गने लोग लिए साथ ॥

पावन आश्रम गवनु किय भरत लखन रघुनाथ ॥ २४५ ॥

सीय आइ मुनिबर पग लागी। उचित असीस लही मन मागी ॥  
गुरपतिनिहि मुनितियन्ह समेता। मिली पेमु कहि जाइ न जेता ॥  
बंदि बंदि पग सिय सबही के। आसिरबचन लहे प्रिय जी के ॥  
सासु सकल जब सीयँ निहारीं। मूदे नयन सहमि सुकुमारीं ॥  
परीं बधिक बस मनहुँ मरालीं। काह कीन्ह करतार कुचालीं ॥  
तिन्ह सिय निरखि निपट दुखु पावा। सो सबु सहिअ जो दैउ सहावा ॥  
जनकसुता तब उर धरि धीरा। नील नलिन लोयन भरि नीरा ॥

मिली सकल सासुन्ह सिय जाई। तेहि अवसर करुना महि छाई ॥

दो. लागि लागि पग सबनि सिय भेंटति अति अनुराग ॥

हृदयँ असीसहिँ पेम बस रहिअहु भरी सोहाग ॥ २४६ ॥

बिकल सनेहँ सीय सब रानीं। बैठन सबहि कहेउ गुर ग्यानीं ॥

कहि जग गति मायिक मुनिनाथा। कहे कछुक परमारथ गाथा ॥

नृप कर सुरपुर गवनु सुनावा। सुनि रघुनाथ दुसह दुखु पावा ॥

मरन हेतु निज नेहु बिचारी। भे अति बिकल धीर धुर धारी ॥

कुलिस कठोर सुनत कटु बानी। बिलपत लखन सीय सब रानी ॥

सोक बिकल अति सकल समाजू। मानहुँ राजु अकाजेउ आजू ॥

मुनिबर बहुरि राम समुझाए। सहित समाज सुसरित नहाए ॥

व्रतु निरंबु तेहि दिन प्रभु कीन्हा। मुनिहु कहेँ जलु काहुँ न लीन्हा ॥

दो. भोरु भएँ रघुनंदनहि जो मुनि आयसु दीन्ह ॥

श्रद्धा भगति समेत प्रभु सो सबु सादरु कीन्ह ॥ २४७ ॥

करि पितु क्रिया बेद जसि बरनी। भे पुनीत पातक तम तरनी ॥

जासु नाम पावक अघ तूला। सुमिरत सकल सुमंगल मूला ॥

सुद्ध सो भयउ साधु संमत अस। तीरथ आवाहन सुरसरि जस ॥

सुद्ध भएँ दुइ बासर बीते। बोले गुर सन राम पिरीते ॥

नाथ लोग सब निपट दुखारी। कंद मूल फल अंबु अहारी ॥

सानुज भरतु सचिव सब माता। देखि मोहि पल जिमि जुग जाता ॥

सब समेत पुर धारिअ पाऊ। आपु इहाँ अमरावति राऊ ॥

बहुत कहेउँ सब कियउँ ढिठाई। उचित होइ तस करिअ गोसाँई ॥

दो. धर्म सेतु करुनायतन कस न कहहु अस राम।

लोग दुखित दिन दुइ दरस देखि लहहुँ विश्राम ॥ २४८ ॥

राम बचन सुनि सभय समाजू। जनु जलनिधि महुँ बिकल जहाजू ॥

सुनि गुर गिरा सुमंगल मूला। भयउ मनहुँ मारुत अनुकुला ॥

पावन पर्यँ तिहुँ काल नहाहीं। जो बिलोकि अंघ ओघ नसाहीं ॥

मंगलमूरति लोचन भरि भरि। निरखहि हरषि दंडवत करि करि ॥

राम सैल बन देखन जाहीं। जहँ सुख सकल सकल दुख नाहीं ॥

झरना झरिहि सुधासम बारी। त्रिविध तापहर त्रिविध बयारी ॥

बिटप बेलि तुन अगनित जाती। फल प्रसून पल्लव बहु भाँती ॥

सुंदर सिला सुखद तरु छाहीं। जाइ बरनि बन छबि केहि पाहीं ॥

दो. सरनि सरोरुह जल बिहग कूजत गुंजत भुंग।

बैर बिगत बिहरत बिपिन मृग बिहंग बहुरंग ॥ २४९ ॥

कोल किरात भिल्ल बनवासी। मधु सुचि सुंदर स्वादु सुधा सी ॥

भरि भरि परन पुटीं रचि रुरी। कंद मूल फल अंकुर जूरी ॥

सबहि देहिं करि बिनय प्रनामा। कहि कहि स्वाद भेद गुन नामा ॥

देहिं लोग बहु मोल न लेहीं। फेरत राम दोहाई देहीं ॥

कहहिं सनेह मगन मृदु बानी। मानत साधु पेम पहिचानी ॥

तुम्ह सुकृती हम नीच निषादा। पावा दरसनु राम प्रसादा ॥

हमहि अगम अति दरसु तुम्हारा। जस मरु धरनि देवधुनि धारा ॥

राम कृपाल निषाद नेवाजा। परिजन प्रजउ चहिअ जस राजा ॥

दो. यह जिंयँ जानि सँकोचु तजि करिअ छोहु लखि नेहु।

हमहि कृतारथ करन लागि फल तन अंकुर लेहु ॥ २५० ॥

तुम्ह प्रिय पाहुने बन पगु धारे। सेवा जोगु न भाग हमारे ॥

देव काह हम तुम्हहि गोसाँई। ईधनु पात किरात मितार्ई ॥

यह हमारि अति बडि सेवकाई। लेहि न बासन बसन चोराई ॥

हम जड जीव जीव गन घाती। कुटिल कुचाली कुमति कुजाती ॥

पाप करत निसि बासर जाहीं। नहिं पट कटि नहिं पेट अघाहीं ॥

सपोनेहुँ धरम बुद्धि कस काऊ। यह रघुनंदन दरस प्रभाऊ ॥

जब तें प्रभु पद पदुम निहारे। मिटे दुसह दुख दोष हमारे ॥

बचन सुनत पुरजन अनुरागे। तिन्ह के भाग सराहन लागे ॥

छं. लागे सराहन भाग सब अनुराग बचन सुनावहीं।

बोलनि मिलनि सिय राम चरन सनेहु लखि सुखु पावहीं ॥

नर नारि निदरहिं नेहु निज सुनि कोल भिल्लनि की गिरा।

तुलसी कृपा रघुवंसमनि की लोह लै लौका तिरा ॥

सो. बिहरहिं बन चहु ओर प्रतिदिन प्रमुदित लोग सब।

जल ज्यों दादुर मोर भए पीन पावस प्रथम ॥ २५१ ॥

पुर जन नारि मगन अति प्रीती। बासर जाहिं पलक सम बीती ॥

सीय सासु प्रति बेष बनाई। सादर करइ सरिस सेवकाई ॥

लखा न मरमु राम बिनु काहूँ। माया सब सिय माया माहूँ ॥

सीयँ सासु सेवा बस कीन्हीं। तिन्ह लहि सुख सिख आसिष दीन्हीं ॥  
लखि सिय सहित सरल दोउ भाई। कुटिल रानि पछितानि अघाई ॥  
अवनि जमहि जाचति कैकेई। महि न बीचु विधि मीचु न देई ॥  
लोकहुँ बेद विदित कवि कहहीं। राम विमुख थलु नरक न लहहीं ॥  
यहु संसउ सब के मन माहीं। राम गवनु विधि अवध कि नाहीं ॥

दो. निसि न नीद नहिँ भूख दिन भरतु बिकल सुचि सोच।

नीच कीच बिच मगन जस मीनहि सलिल सँकोच ॥ २५२ ॥

कीन्ही मातु मिस काल कुचाली। ईति भीति जस पाकत साली ॥  
केहि विधि होइ राम अभिषेकू। मोहि अवकलत उपाउ न एकू ॥  
अवसि फिरहिँ गुर आयसु मानी। मुनि पुनि कहव राम रुचि जानी ॥  
मातु कहेहुँ बहुरहिँ रघुराऊ। राम जननि हठ करवि कि काऊ ॥  
मोहि अनुचर कर केतिक बाता। तेहि महुँ कुसमउ बाम बिधाता ॥  
जौँ हठ करउँ त निपट कुकरमू। हरगिरि तें गुरु सेवक धरमू ॥  
एकउ जुगुति न मन ठहरानी। सोचत भरतहिँ रैनि बिहानी ॥  
प्रात नहाइ प्रभुहिँ सिर नाई। बैठत पठए रिषयँ बोलाई ॥

दो. गुर पद कमल प्रनामु करि बैँठे आयसु पाइ।

विप्र महाजन सचिव सब जुरे सभासद आइ ॥ २५३ ॥

बोले मुनिबरु समय समाना। सुनहु सभासद भरत सुजाना ॥  
धरम धुरीन भानुकुल भानू। राजा रामु स्वबस भगवानू ॥  
सत्यसंध पालक श्रुति सेतू। राम जनमु जग मंगल हेतू ॥  
गुर पितु मातु बचन अनुसारी। खल दलु दलन देव हितकारी ॥  
नीति प्रीति परमारथ स्वारथु। कोउ न राम सम जान जथारथु ॥  
बिधि हरि हरु ससि रवि दिसिपाला। माया जीव करम कुलि काला ॥  
अहिप महिप जहुँ लगि प्रभुताई। जोग सिद्धि निगमागम गाई ॥  
करि बिचार जिँयँ देखहु नीकें। राम रजाइ सीस सबही कें ॥

दो. राखें राम रजाइ रुख हम सब कर हित होइ।

समुझि सयाने करहु अब सब मिलि संमत सोइ ॥ २५४ ॥

सब कहूँ सुखद राम अभिषेकू। मंगल मोद मूल मग एकू ॥  
केहि बिधि अवध चलहिँ रघुराऊ। कहहु समुझि सोइ करिअ उपाऊ ॥  
सब सादर सुनि मुनिबर बानी। नय परमारथ स्वारथ सानी ॥

उतरु न आव लोग भए भोरे। तब सिरु नाइ भरत कर जोरे ॥  
 भानुबंस भए भूप घनेरे। अधिक एक तें एक बडेरे ॥  
 जनमु हेतु सब कहँ पितु माता। करम सुभासुभ देइ बिधाता ॥  
 दलि दुख सजइ सकल कल्याना। अस असीस राउरि जगु जाना ॥  
 सो गोसाइँ विधि गति जेहिं छेंकी। सकइ को टारि टेक जो टेकी ॥

दो. बूझिअ मोहि उपाउ अब सो सब मोर अभागु।

सुनि सनेहमय बचन गुर उर उमगा अनुरागु ॥ २५५ ॥

तात बात फुरि राम कृपाहीं। राम विमुख सिधि सपनेहुँ नाहीं ॥  
 सकुचउँ तात कहत एक बाता। अरध तजहिं बुध सरबस जाता ॥  
 तुम्ह कानन गवनहु दोउ भाई। फेरिअहिं लखन सीय रघुराई ॥  
 सुनि सुबचन हरषे दोउ भ्राता। भे प्रमोद परिपूरन गाता ॥  
 मन प्रसन्न तन तेजु बिराजा। जनु जिय राउ रामु भए राजा ॥  
 बहुत लाभ लोगन्ह लघु हानी। सम दुख सुख सब रोवहिं रानी ॥  
 कहहिं भरतु मुनि कहा सो कीन्हे। फलु जग जीवन्ह अभिमत दीन्हे ॥  
 कानन करउँ जनम भरि बासू। एहिं तें अधिक न मोर सुपासू ॥

दो. अँतरजामी रामु सिय तुम्ह सरबग्य सुजान।

जो फुर कहहु त नाथ निज कीजिअ बचनु प्रवान ॥ २५६ ॥

भरत बचन सुनि देखि सनेहू। सभा सहित मुनि भए बिदेहू ॥  
 भरत महा महिमा जलरासी। मुनि मति ठाढि तीर अबला सी ॥  
 गा चह पार जतनु हियँ हेरा। पावति नाव न बोहितु बेरा ॥  
 औरु करिहि को भरत बडाई। सरसी सीपि कि सिंधु समाई ॥  
 भरतु मुनिहि मन भीतर भाए। सहित समाज राम पहिँ आए ॥  
 प्रभु प्रनामु करि दीन्ह सुआसनु। बैठे सब सुनि मुनि अनुसासनु ॥  
 बोले मुनिबरु बचन बिचारी। देस काल अवसर अनुहारी ॥  
 सुनहु राम सरबग्य सुजाना। धरम नीति गुन ग्यान निधाना ॥

दो. सब के उर अंतर बसहु जानहु भाउ कुभाउ।

पुरजन जननी भरत हित होइ सो कहिअ उपाउ ॥ २५७ ॥

आरत कहहिं बिचारि न काऊ। सूझ जूआरिहि आपन दाऊ ॥  
 सुनि मुनि बचन कहत रघुराऊ। नाथ तुम्हारेहि हाथ उपाऊ ॥  
 सब कर हित रुख राउरि राखँ। आयसु किउँ मुदित फुर भाषँ ॥

प्रथम जो आयसु मो कहँ होई। माथँ मानि करौ सिख सोई ॥  
 पुनि जेहि कहँ जस कहब गोसाईं। सो सब भाँति घटिहि सेवकाई ॥  
 कह मुनि राम सत्य तुम्ह भाषा। भरत सनेहँ बिचारु न राखा ॥  
 तेहि तें कहउँ बहोरि बहोरी। भरत भगति बस भइ मति मोरी ॥  
 मोरँ जान भरत रुचि राखि। जो कीजिअ सो सुभ सिव साखी ॥

दो. भरत विनय सादर सुनिअ करिअ बिचारु बहोरि।

करब साधुमत लोकमत नृपनय निगम निचोरि ॥ २५८ ॥

गुरु अनुराग भरत पर देखी। राम हृदयँ आनंदु बिसेषी ॥  
 भरतहि धरम धुरंधर जानी। निज सेवक तन मानस बानी ॥  
 बोले गुरु आयस अनुकूला। बचन मंजु मृदु मंगलमूला ॥  
 नाथ सपथ पितु चरन दोहाई। भयउ न भुअन भरत सम भाई ॥  
 जे गुरु पद अंबुज अनुरागी। ते लोकहुँ वेदहुँ बडभागी ॥  
 राउर जा पर अस अनुरागू। को कहि सकइ भरत कर भागू ॥  
 लखि लघु बंधु बुद्धि सकुचाई। करत बदन पर भरत बडाई ॥  
 भरतु कहहीं सोइ किऐँ भलाई। अस कहि राम रहे अरगाई ॥

दो. तब मुनि बोले भरत सन सब सँकोचु तजि तात।

कृपासिंधु प्रिय बंधु सन कहहु हृदय कै बात ॥ २५९ ॥

सुनि मुनि बचन राम रुख पाई। गुरु साहिब अनुकूल अघाई ॥  
 लखि अपने सिर सबु छरु भारू। कहि न सकहिँ कछु करहिँ बिचारू ॥  
 पुलकि सरीर सभाँ भए ठाहें। नीरज नयन नेह जल बाहें ॥  
 कहब मोर मुनिनाथ निबाहा। एहि तें अधिक कहौँ मैं काहा।  
 मैं जानउँ निज नाथ सुभाऊ। अपराधिहु पर कोह न काऊ ॥  
 मो पर कृपा सनेह बिसेषी। खेलत खुनिस न कबहुँ देखी ॥  
 सिसुपन तेम परिहरेउँ न संगू। कबहुँ न कीन्ह मोर मन भंगू ॥  
 मैं प्रभु कृपा रीति जियँ जोही। हारेहुँ खेल जितावहिँ मोही ॥

दो. महुँ सनेह सकोच बस सनमुख कही न बैन।

दरसन तृपित न आजु लागि पेम पिआसे नैन ॥ २६० ॥

बिधि न सकेउ सहि मोर दुलारा। नीच बीचु जननी मिस पारा।  
 यहउ कहत मोहि आजु न सोभा। अपनी समुझि साधु सुचि को भा ॥  
 मातु मंदि मैं साधु सुचाली। उर अस आनत कोटि कुचाली ॥

फरइ कि कोदव बालि सुसाली। मुकुता प्रसव कि संबुक काली ॥  
 सपनेहुँ दोसक लेसु न काहू। मोर अभाग उदधि अवगाहू ॥  
 विनु समुझें निज अघ परिपाकू। जारिउँ जायँ जननि कहि काकू ॥  
 हृदयँ हेरि हारेउँ सब ओरा। एकहि भाँति भलेहिँ भल मोरा ॥  
 गुर गोसाईँ साहिव सिय रामू। लागत मोहि नीक परिनामू ॥

दो. साधु सभा गुर प्रभु निकट कहउँ सुथल सति भाउ।

प्रेम प्रपंचु कि झूठ फुर जानहिँ मुनि रघुराउ ॥ २६१ ॥

भूपति मरन पेम पनु राखी। जननी कुमति जगतु सबु साखी ॥  
 देखि न जाहि बिकल महतारी। जरहिँ दुसह जर पुर नर नारी ॥  
 महीं सकल अनरथ कर मूला। सो सुनि समुझि सहिउँ सब सूला ॥  
 सुनि बन गवनु कीन्ह रघुनाथा। करि मुनि बेष लखन सिय साथा ॥  
 विनु पानहिन्ह पयादेहि पाएँ। संकरु साखि रहेउँ एहि घाएँ ॥  
 बहुरि निहार निषाद सनेहू। कुलिस कठिन उर भयउ न बेहू ॥  
 अब सबु आँखिन्ह देखेउँ आई। जिअत जीव जड सबइ सहाई ॥  
 जिन्हहि निरखि मग साँपिनि बीछी। तजहिँ बिषम बिषु तामस तीछी ॥

दो. तेइ रघुनंदनु लखनु सिय अनहित लागे जाहि।

तासु तनय तजि दुसह दुख दैउ सहावइ काहि ॥ २६२ ॥

सुनि अति बिकल भरत बर बानी। आरति प्रीति विनय नय सानी ॥  
 सोक मगन सब सभौँ खभारू। मनहुँ कमल बन परेउ तुसारू ॥  
 कहि अनेक विधि कथा पुरानी। भरत प्रबोधु कीन्ह मुनि ग्यानी ॥  
 बोले उचित बचन रघुनंदू। दिनकर कुल कैरव बन चंदू ॥  
 तात जाँय जियँ करहु गलानी। ईस अधीन जीव गति जानी ॥  
 तीनि काल तिभुअन मत मोरें। पुन्यसिलोक तात तर तोरें ॥  
 उर आनत तुम्ह पर कुटिलाई। जाइ लोको परलोको नसाई ॥  
 दोसु देहिँ जननिहि जड तेई। जिन्ह गुर साधु सभा नहिँ सेई ॥

दो. मिटिहहिँ पाप प्रपंच सब अखिल अमंगल भार।

लोक सुजसु परलोक सुखु सुमिरत नामु तुम्हार ॥ २६३ ॥

कहउँ सुभाउ सत्य सिव साखी। भरत भूमि रह राउरि राखी ॥  
 तात कुतरक करहु जनि जाएँ। बैर पेम नहि दुरइ दुराएँ ॥  
 मुनि गन निकट बिहग मृग जाहीं। बाधक बधिक बिलोकि पराहीं ॥

हित अनहित पसु पच्छिउ जाना। मानुष तनु गुन ग्यान निधाना ॥  
 तात तुम्हहि मैं जानउँ नीकें। करौं काह असमंजस जीकें ॥  
 राखेउ रायँ सत्य मोहि त्यागी। तनु परिहरेउ पेम पन लागी ॥  
 तासु बचन मेटत मन सोचू। तेहि तें अधिक तुम्हार सँकोचू ॥  
 ता पर गुर मोहि आयसु दीन्हा। अवसि जो कहहु चहउँ सोइ कीन्हा ॥

दो. मनु प्रसन्न करि सकुच तजि कहहु करौं सोइ आजु।

सत्यसंध रघुबर बचन सुनि भा सुखी समाजु ॥ २६४ ॥

सुर गन सहित सभय सुरराजू। सोचहिं चाहत होन अकाजू ॥  
 बनत उपाउ करत कछु नाहीं। राम सरन सब गे मन माहीं ॥  
 बहुरि बिचारि परस्पर कहहीं। रघुपति भगत भगति बस अहहीं।  
 सुधि करि अंबरीष दुरबासा। भे सुर सुरपति निपट निरासा ॥  
 सहे सुरन्ह बहु काल बिषादा। नरहरि किए प्रगट प्रहलादा ॥  
 लागि लागि कान कहहिं धुनि माथा। अब सुर काज भरत के हाथा ॥  
 आन उपाउ न देखिअ देवा। मानत रामु सुसेवक सेवा ॥  
 हियँ सपेम सुमिरहु सब भरतहि। निज गुन सील राम बस करतहि ॥

दो. सुनि सुर मत सुरगुर कहेउ भल तुम्हार बड भागु।

सकल सुमंगल मूल जग भरत चरन अनुरागु ॥ २६५ ॥

सीतापति सेवक सेवकाई। कामधेनु सय सरिस सुहाई ॥  
 भरत भगति तुम्हरेँ मन आई। तजहु सोचु बिधि बात बनाई ॥  
 देखु देवपति भरत प्रभाऊ। सहज सुभायँ विवस रघुराऊ ॥  
 मन थिर करहु देव डरु नाहीं। भरतहि जानि राम परिछाहीं ॥  
 सुनो सुरगुर सुर संमत सोचू। अंतरजामी प्रभुहि सकोचू ॥  
 निज सिर भारु भरत जियँ जाना। करत कोटि बिधि उर अनुमाना ॥  
 करि बिचारु मन दीन्ही ठीका। राम रजायस आपन नीका ॥  
 निज पन तजि राखेउ पनु मोरा। छोहु सनेहु कीन्ह नहिं थोरा ॥

दो. कीन्ह अनुग्रह अमित अति सब बिधि सीतानाथ।

करि प्रनामु बोले भरतु जोरि जलज जुग हाथ ॥ २६६ ॥

कहाँ कहावौं का अब स्वामी। कृपा अंबुनिधि अंतरजामी ॥  
 गुर प्रसन्न साहिव अनुकूला। मिटी मलिन मन कलपित सूला ॥  
 अपडर डरेउँ न सोच समूलें। रबिहि न दोसु देव दिसि भूलें ॥

मोर अभागु मातु कुटिलाई। विधि गति बिषम काल कठिनाई ॥  
पाउ रोऽपि सब मिलि मोहि घाला। प्रनतपाल पन आपन पाला ॥  
यह नइ रीति न राउरि होई। लोकहुँ बेद विदित नहिँ गोई ॥  
जगु अनभल भल एकु गोसाई। कहिअ होइ भल कासु भलाई ॥  
देउ देवतरु सरिस सुभाऊ। सनमुख बिमुख न काहुहि काऊ ॥

दो. जाइ निकट पहिचानि तरु छाहँ समनि सब सोच।

मागत अभिमत पाव जग राउ रंकु भल पोच ॥ २६७ ॥

लखि सब विधि गुर स्वामि सनेहू। मिटेउ छोभु नहिँ मन संदेहू ॥  
अब करुनाकर कीजिअ सोई। जन हित प्रभु चित छोभु न होई ॥  
जो सेवकु साहिबहि सँकोची। निज हित चहइ तासु मति पोची ॥  
सेवक हित साहिब सेवकाई। करै सकल सुख लोभ बिहाई ॥  
स्वारथु नाथ फिरें सबही का। किऐँ रजाइ कोटि विधि नीका ॥  
यह स्वारथ परमारथ सारु। सकल सुकृत फल सुगति सिंगारु ॥  
देव एक बिनती सुनि मोरी। उचित होइ तस करब बहोरी ॥  
तिलक समाजु साजि सबु आना। करिअ सुफल प्रभु जौँ मनु माना ॥

दो. सानुज पठइअ मोहि बन कीजिअ सबहि सनाथ।

नतरु फेरिअहिँ बंधु दोउ नाथ चलौँ मैं साथ ॥ २६८ ॥

नतरु जाहिँ बन तीनिउ भाई। बहुरिअ सीय सहित रघुराई ॥  
जेहि विधि प्रभु प्रसन्न मन होई। करुना सागर कीजिअ सोई ॥  
देवँ दीन्ह सबु मोहि अभारु। मोरें नीति न धरम बिचारु ॥  
कहउँ बचन सब स्वारथ हेतू। रहत न आरत कें चित चेतू ॥  
उतरु देइ सुनि स्वामि रजाई। सो सेवकु लखि लाज लजाई ॥  
अस मैं अवगुन उदधि अगाधू। स्वामि सनेहँ सराहत साधू ॥  
अब कृपाल मोहि सो मत भावा। सकुच स्वामि मन जाईँ न पावा ॥  
प्रभु पद सपथ कहउँ सति भाऊ। जग मंगल हित एक उपाऊ ॥

दो. प्रभु प्रसन्न मन सकुच तजि जो जेहि आयसु देव।

सो सिर धरि धरि करिहि सबु मिटिहि अनट अवरेव ॥ २६९ ॥

भरत बचन सुचि सुनि सुर हरषे। साधु सराहि सुमन सुर बरषे ॥  
असमंजस बस अवध नेवासी। प्रमुदित मन तापस बनवासी ॥  
चुपहिँ रहे रघुनाथ सँकोची। प्रभु गति देखि सभा सब सोची ॥

जनक दूत तेहि अवसर आए। मुनि बसिष्ठ सुनि बेगि बोलाए ॥  
करि प्रनाम तिन्ह रामु निहारे। बेधु देखि भए निपट दुखारे ॥  
दूतन्ह मुनिबर बूझी बाता। कहहु बिदेह भूप कुसलाता ॥  
सुनि सकुचाइ नाइ महि माथा। बोले चर बर जोरें हाथा ॥  
बूझव राउर सादर साई। कुसल हेतु सो भयउ गोसाई ॥

दो. नाहि त कोसल नाथ कें साथ कुसल गइ नाथ।

मिथिला अवध बिसेष तें जगु सब भयउ अनाथ ॥ २७० ॥

कोसलपति गति सुनि जनकौरा। भे सब लोक सोक बस बौरा ॥  
जेहि देखे तेहि समय बिदेहू। नामु सत्य अस लाग न केहू ॥  
रानि कुचालि सुनत नरपालहि। सूझ न कछु जस मनि बिनु ब्यालहि ॥  
भरत राज रघुवर बनवासू। भा मिथिलेसहि हृदयँ हराँसू ॥  
नृप बूझे बुध सचिव समाजू। कहहु बिचारि उचित का आजू ॥  
समुझि अवध असमंजस दोऊ। चलिअ कि रहिअ न कह कछु कोऊ ॥  
नृपहि धीर धरि हृदयँ बिचारी। पठए अवध चतुर चर चारी ॥  
बूझि भरत सति भाउ कुभाऊ। आएहु बेगि न होइ लखाऊ ॥

दो. गए अवध चर भरत गति बूझि देखि करतूति।

चले चित्रकूटहि भरतु चार चले तेरहूति ॥ २७१ ॥

दूतन्ह आइ भरत कइ करनी। जनक समाज जथामति बरनी ॥  
सुनि गुर परिजन सचिव महीपति। भे सब सोच सनेहँ बिकल अति ॥  
धरि धीरजु करि भरत बडाई। लिए सुभट साहनी बोलाई ॥  
घर पुर देस राखि रखवारे। हय गय रथ बहु जान सँवारे ॥  
दुधरी साधि चले ततकाला। किए विश्रामु न मग महीपाला ॥  
भोरहिं आजु नहाइ प्रयागा। चले जमुन उतरन सबु लागा ॥  
खवारि लेन हम पठए नाथा। तिन्ह कहि अस महि नायउ माथा ॥  
साथ किरात छ सातक दीन्हे। मुनिबर तुरत बिदा चर कीन्हे ॥

दो. सुनत जनक आगवनु सबु हरषेउ अवध समाजु।

रघुनंदनहि सकोचु बड सोच बिबस सुरराजु ॥ २७२ ॥

गरइ गलानि कुटिल कैकेई। काहि कहै केहि दूषनु देई ॥  
अस मन आनि मुदित नर नारी। भयउ बहोरि रहब दिन चारी ॥  
एहि प्रकार गत बासर सोऊ। प्रात नहान लाग सबु कोऊ ॥

करि मज्जनु पूजहिं नर नारी। गनप गौरि तिपुरारि तमारी ॥  
रमा रमन पद बंदि बहोरी। बिनवहिं अंजुलि अंचल जोरी ॥  
राजा रामु जानकी रानी। आनँद अवधि अवध रजधानी ॥  
सुबस बसउ फिरि सहित समाजा। भरतहि रामु करहुँ जुबाराजा ॥  
एहि सुख सुधाँ सींची सब काहू। देव देहु जग जीवन लाहू ॥

दो. गुर समाज भाइन्ह सहित राम राजु पुर होउ।

अछत राम राजा अवध मरिअ माग सबु कोउ ॥ २७३ ॥

सुनि सनेहमय पुरजन बानी। निंदहिं जोग बिरति मुनि ग्यानी ॥  
एहि विधि नित्यकरम करि पुरजन। रामहि करहिं प्रनाम पुलकि तन ॥  
ऊँच नीच मध्यम नर नारी। लहहिं दरसु निज निज अनुहारी ॥  
सावधान सबही सनमानहिं। सकल सराहत कृपानिधानहिं ॥  
लरिकाइहि ते रघुबर बानी। पालत नीति प्रीति पहिचानी ॥  
सील सकोच सिंधु रघुराऊ। सुमुख सुलोचन सरल सुभाऊ ॥  
कहत राम गुन गन अनुरागे। सब निज भाग सराहन लागे ॥  
हम सम पुन्य पुंज जग थोरे। जिन्हहि रामु जानत करि मोरे ॥

दो. प्रेम मगन तेहि समय सब सुनि आवत मिथिलेसु।

सहित सभा संभ्रम उठेउ रबिकुल कमल दिनेसु ॥ २७४ ॥

भाइ सचिव गुर पुरजन साथ। आगें गवनु कीन्ह रघुनाथा ॥  
गिरिबरु दीख जनकपति जबहीं। करि प्रनाम रथ त्यागेउ तबहीं ॥  
राम दरस लालसा उछाहू। पथ श्रम लेसु कलेसु न काहू ॥  
मन तहँ जहँ रघुबर बैदेही। बिनु मन तन दुख सुख सुधि केही ॥  
आवत जनकु चले एहि भाँती। सहित समाज प्रेम मति माती ॥  
आए निकट देखि अनुरागे। सादर मिलन परसपर लागे ॥  
लगे जनक मुनिजन पद बंदन। रिषिन्ह प्रनामु कीन्ह रघुनंदन ॥  
भाइन्ह सहित रामु मिलि राजहि। चले लवाइ समेत समाजहि ॥

दो. आश्रम सागर सांत रस पूरन पावन पाथु।

सेन मनहुँ करुना सरित लिहँ जाहिं रघुनाथु ॥ २७५ ॥

बोरति ग्यान बिराग करारे। बचन ससोक मिलत नद नारे ॥  
सोच उसास समीर तंरगा। धीरज तट तरुबर कर भंगा ॥  
बिषम बिषाद तोरावति धारा। भय भ्रम भवँर अबर्त अपारा ॥

केवट बुध बिद्या बडि नावा। सकहिं न खेइ ऐक नहिं आवा ॥  
 बनचर कोल किरात बिचारे। थके बिलोकि पथिक हियँ हारे ॥  
 आश्रम उदधि मिली जब जाई। मनहुँ उठेउ अबुधि अकुलाई ॥  
 सोक बिकल दोउ राज समाजा। रहा न ग्यानु न धीरजु लाजा ॥  
 भूप रूप गुन सील सराही। रोवहिं सोक सिंधु अवगाही ॥

छं. अवगाहि सोक समुद्र सोचहिं नारि नर ब्याकुल महा।  
 दै दोष सकल सरोष बोलहिं बाम बिधि कीन्हो कहा ॥  
 सुर सिद्ध तापस जोगिजन मुनि देखि दसा बिदेह की।  
 तुलसी न समरथु कोउ जो तरि सकै सरित सनेह की ॥

सो. किए अमित उपदेस जहँ तहँ लोगन्ह मुनिबरन्ह।  
 धीरजु धरिअ नरेस कहेउ बसिष्ठ बिदेह सन ॥ २७६ ॥

जासु ग्यानु रबि भव निसि नासा। बचन किरन मुनि कमल बिकासा ॥  
 तेहि कि मोह ममता निअराई। यह सिय राम सनेह बडाई ॥  
 बिषई साधक सिद्ध सयाने। त्रिविध जीव जग बेद बखाने ॥  
 राम सनेह सरस मन जासू। साधु सभाँ बड आदर तासू ॥  
 सोह न राम पेम बिनु ग्यानु। करनधार बिनु जिमि जलजानू ॥  
 मुनि बहुबिधि बिदेहु समुझाए। रामघाट सब लोग नहाए ॥  
 सकल सोक संकुल नर नारी। सो बासरु बीतेउ बिनु बारी ॥  
 पसु खग मृगन्ह न कीन्ह अहारू। प्रिय परिजन कर कौन बिचारू ॥

दो. दोउ समाज निमिराजु रघुराजु नहाने प्रात।  
 बैठे सब बट बिटप तर मन मलीन कृस गात ॥ २७७ ॥

जे महिसुर दसरथ पुर बासी। जे मिथिलापति नगर निवासी ॥  
 हंस बंस गुर जनक पुरोधा। जिन्ह जग मगु परमारथु सोधा ॥  
 लगे कहन उपदेस अनेका। सहित धरम नय बिरति बिबेका ॥  
 कौसिक कहि कहि कथा पुरानी। समुझाई सब सभा सुबानी ॥  
 तब रघुनाथ कोसिकहि कहेऊ। नाथ कालि जल बिनु सबु रहेऊ ॥  
 मुनि कह उचित कहत रघुराई। गयउ बीति दिन पहर अढाई ॥  
 रिषि रुख लखि कह तेरहुतिराजू। इहाँ उचित नहिं असन अनाजू ॥  
 कहा भूप भल सबहि सोहाना। पाइ रजायसु चले नहाना ॥

दो. तेहि अवसर फल फूल दल मूल अनेक प्रकार।

लइ आए बनचर बिपुल भरि भरि काँवरि भार ॥ २७८ ॥

कामद मे गिरि राम प्रसादा। अवलोकत अपहरत बिषादा ॥  
सर सरिता बन भूमि बिभागा। जनु उमगत आनँद अनुरागा ॥  
बेलि बिटप सब सफल सफूला। बोलत खग मृग अलि अनुकूला ॥  
तेहि अवसर बन अधिक उछाहू। त्रिविध समीर सुखद सब काहू ॥  
जाइ न बरनि मनोहरताई। जनु महि करति जनक पहुनाई ॥  
तब सब लोग नहाइ नहाई। राम जनक मुनि आयसु पाई ॥  
देखि देखि तरुबर अनुरागे। जहँ तहँ पुरजन उतरन लागे ॥  
दल फल मूल कंद विधि नाना। पावन सुंदर सुधा समाना ॥

दो. सादर सब कहँ रामगुर पठए भरि भरि भार।

पूजि पितर सुर अतिथि गुर लगे करन फरहार ॥ २७९ ॥

एहि विधि बासर बीते चारी। रामु निरखि नर नारि सुखारी ॥  
दुहु समाज असि रुचि मन माहीं। बिनु सिय राम फिरब भल नाहीं ॥  
सीता राम संग बनबासू। कोटि अमरपुर सरिस सुपासू ॥  
परिहारि लखन रामु बैदेही। जेहि घरु भाव बाम विधि तेही ॥  
दाहिन दइउ होइ जब सबही। राम समीप बसिअ बन तबही ॥  
मंदाकिनि मज्जनु तिहु काला। राम दरसु मुद मंगल माला ॥  
अटनु राम गिरि बन तापस थल। असनु अमिअ सम कंद मूल फल ॥  
सुख समेत संवत दुइ साता। पल सम होहिं न जनिअहिं जाता ॥

दो. एहि सुख जोग न लोग सब कहहिं कहाँ अस भागु ॥

सहज सुभायँ समाज दुहु राम चरन अनुरागु ॥ २८० ॥

एहि विधि सकल मनोरथ करहीं। बचन सप्रेम सुनत मन हरहीं ॥  
सीय मातु तेहि समय पठाई। दासीं देखि सुअवसरु आई ॥  
सावकास सुनि सब सिय सासू। आयउ जनकराज रनिवासू ॥  
कौसल्याँ सादर सनमानी। आसन दिए समय सम आनी ॥  
सीलु सनेह सकल दुहु ओरा। द्रवहिं देखि सुनि कुलिस कठोरा ॥  
पुलक सिथिल तन बारि बिलोचन। महि नख लिखन लगीं सब सोचन ॥  
सब सिय राम प्रीति कि सि मूर्ती। जनु करुना बहु बेष विसूरति ॥  
सीय मातु कह विधि बुधि बाँकी। जो पय फेनु फोर पवि टाँकी ॥

दो. सुनिअ सुधा देखिअहिं गरल सब करतूति कराल।

जहँ तहँ काक उलूक बक मानस सकृत मराल ॥ २८१ ॥

सुनि ससोच कह देवि सुमित्रा। विधि गति बडि बिपरीत बिचित्रा ॥  
जो सृजि पालइ हरइ बहोरी। बाल केलि सम विधि मति भोरी ॥  
कौसल्या कह दोसु न काहू। करम बिबस दुख सुख छति लाहू ॥  
कठिन करम गति जान बिधाता। जो सुभ असुभ सकल फल दाता ॥  
ईस रजाइ सीस सबही कें। उतपति थिति लय बिषहु अमी कें ॥  
देवि मोह बस सोचिअ बादी। विधि प्रपंचु अस अचल अनादी ॥  
भूपति जिअब मरब उर आनी। सोचिअ सखि लखि निज हित हानी ॥  
सीय मातु कह सत्य सुबानी। सुकृती अवधि अवधपति रानी ॥

दो. लखनु राम सिय जाहुँ बन भल परिनाम न पोचु।

गहबरि हियँ कह कौसिला मोहि भरत कर सोचु ॥ २८२ ॥

ईस प्रसाद असीस तुम्हारी। सुत सुतबधू देवसरि बारी ॥  
राम सपथ मैँ कीन्ह न काऊ। सो करि कहउँ सखी सति भाऊ ॥  
भरत सील गुन विनय बडाई। भायप भगति भरोस भलाई ॥  
कहत सारदहु कर मति हीचे। सागर सीप कि जाहिँ उलीचे ॥  
जानउँ सदा भरत कुलदीपा। बार बार मोहि कहेउ महीपा ॥  
कसैं कनकु मनि पारिखि पाएँ। पुरुष परिखिअहिँ समयँ सुभाएँ।  
अनुचित आजु कहब अस मोरा। सोक सनेहँ सयानप थोरा ॥  
सुनि सुरसरि सम पावनि बानी। भई सनेह बिकल सब रानी ॥

दो. कौसल्या कह धीर धरि सुनहु देवि मिथिलेसि।

को बिबेकनिधि बल्लभहि तुम्हहि सकइ उपदेसि ॥ २८३ ॥

रानि राय सन अवसरु पाई। अपनी भाँति कहब समुझाई ॥  
रखिअहिँ लखनु भरतु गबनहिँ बन। जौँ यह मत मानै महीप मन ॥  
तौँ भल जतनु करब सुबिचारी। मोरें सौचु भरत कर भारी ॥  
गूढ सनेह भरत मन माही। रहैं नीक मोहि लागत नाहीं ॥  
लखि सुभाउ सुनि सरल सुबानी। सब भइ मगन करुन रस रानी ॥  
नभ प्रसून झरि धन्य धन्य धुनि। सिथिल सनेहँ सिद्ध जोगी मुनि ॥  
सबु रनिवासु बिथकि लखि रहेऊ। तब धरि धीर सुमित्राँ कहेऊ ॥  
देवि दंड जुग जामिनि बीती। राम मातु सुनी उठी सप्रीती ॥

दो. बेगि पाउ धारिअ थलहि कह सनेहँ सतिभाय।

हमरें तौ अब ईस गति के मिथिलेस सहाय ॥ २८४ ॥

लखि सनेह सुनि बचन बिनीता। जनकप्रिया गह पाय पुनीता ॥  
 देवि उचित असि बिनय तुम्हारी। दसरथ घरिनि राम महतारी ॥  
 प्रभु अपने नीचहु आदरहीं। अगिनि धूम गिरि सिर तिनु धरहीं ॥  
 सेवकु राउ करम मन बानी। सदा सहाय महेसु भवानी ॥  
 रउरे अंग जोगु जग को है। दीप सहाय कि दिनकर सोहै ॥  
 रामु जाइ बनु करि सुर काजू। अचल अवधपुर करिहहिं राजू ॥  
 अमर नाग नर राम बाहुबल। सुख बसिहहिं अपने अपने थल ॥  
 यह सब जागबलिक कहि राखा। देवि न होइ मुधा मुनि भाषा ॥

दो. अस कहि पग परि पेम अति सिय हित बिनय सुनाइ ॥  
 सिय समेत सियमातु तब चली सुआयसु पाइ ॥ २८५ ॥

प्रिय परिजनहि मिली बैदेही। जो जेहि जोगु भाँति तेहि तेही ॥  
 तापस बेष जानकी देखी। भा सबु बिकल बिषाद बिसेषी ॥  
 जनक राम गुर आयसु पाई। चले थलहि सिय देखी आई ॥  
 लीन्हि लाइ उर जनक जानकी। पाहुन पावन पेम प्रान की ॥  
 उर उमगेउ अंबुधि अनुरागू। भयउ भूप मनु मनहुँ पयागू ॥  
 सिय सनेह बटु बाढत जोहा। ता पर राम पेम सिसु सोहा ॥  
 चिरजीवी मुनि ग्यान बिकल जनु। बूडत लहेउ बाल अवलंबनु ॥  
 मोह मगन मति नहिं बिदेह की। महिमा सिय रघुवर सनेह की ॥

दो. सिय पितु मातु सनेह बस बिकल न सकी सँभारि।

धरनिसुताँ धीरजु धरेउ समउ सुधरमु बिचारि ॥ २८६ ॥

तापस बेष जनक सिय देखी। भयउ पेमु परितोषु बिसेषी ॥  
 पुत्रि पवित्र किए कुल दोऊ। सुजस धवल जगु कह सबु कोऊ ॥  
 जिति सुरसरि कीरति सरि तोरी। गवनु कीन्ह बिधि अंड करोरी ॥  
 गंग अवनि थल तीनि बडेरै। एहिं किए साधु समाज घनेरै ॥  
 पितु कह सत्य सनेहँ सुबानी। सीय सकुच महुँ मनहुँ समानी ॥  
 पुनि पितु मातु लीन्ह उर लाई। सिख आसिष हित दीन्हि सुहाई ॥  
 कहति न सीय सकुचि मन माहीं। इहाँ बसब रजनीं भल नाहीं ॥  
 लखि रूख रानि जनायउ राऊ। हृदयँ सराहत सीलु सुभाऊ ॥

दो. बार बार मिलि भेंट सिय बिदा कीन्ह सनमानि।

कही समय सिर भरत गति रानि सुवानि सयानि ॥ २८७ ॥

सुनि भूपाल भरत व्यवहारू। सोन सुगंध सुधा ससि सारू ॥  
 मूदे सजल नयन पुलके तन। सुजसु सराहन लगे मुदित मन ॥  
 सावधान सुनु सुमुखि सुलोचनि। भरत कथा भव बंध विमोचनि ॥  
 धरम राजनय ब्रह्मबिचारू। इहाँ जथामति मोर प्रचारू ॥  
 सो मति मोरि भरत महिमाही। कहै काह छलि छुअति न छाँही ॥  
 विधि गनपति अहिपति सिव सारद। कवि कोबिद बुध बुद्धि बिसारद ॥  
 भरत चरित कीरति करतूती। धरम सील गुन बिमल बिभूती ॥  
 समुझत सुनत सुखद सब काहू। सुचि सुरसरि रुचि निदर सुधाहू ॥

दो. निरवधि गुन निरुपम पुरुषु भरतु भरत सम जानि।

कहिअ सुमेरु कि सेर सम कबिकुल मति सकुचानि ॥ २८८ ॥

अगम सबहि बरनत बरबरनी। जिमि जलहीन मीन गमु धरनी ॥  
 भरत अमित महिमा सुनु रानी। जानहिं रामु न सकहिं बखानी ॥  
 बरनि सप्रेम भरत अनुभाऊ। तिय जिय की रुचि लखि कह राऊ ॥  
 बहुरहिं लखनु भरतु बन जाहीं। सब कर भल सब के मन माहीं ॥  
 देवि परंतु भरत रघुबर की। प्रीति प्रतीति जाइ नहिं तरकी ॥  
 भरतु अवधि सनेह ममता की। जद्यपि रामु सीम समता की ॥  
 परमारथ स्वारथ सुख सारे। भरत न सपनेहुँ मनहुँ निहारे ॥  
 साधन सिद्ध राम पग नेहू ॥ मोहि लखि परत भरत मत एहू ॥

दो. भोरेहुँ भरत न पेलिहहिं मनसहुँ राम रजाइ।

करिअ न सोचु सनेह बस कहेउ भूप बिलखाइ ॥ २८९ ॥

राम भरत गुन गनत सप्रीती। निसि दंपतिहि पलक सम बीती ॥  
 राज समाज प्रात जुग जागे। न्हाइ न्हाइ सुर पूजन लागे ॥  
 गे नहाइ गुर पहीं रघुराई। बंदि चरन बोले रुख पाई ॥  
 नाथ भरतु पुरजन महतारी। सोक बिकल बनबास दुखारी ॥  
 सहित समाज राउ मिथिलेसू। बहुत दिवस भए सहत कलेसू ॥  
 उचित होइ सोइ कीजिअ नाथा। हित सबही कर रौरैं हाथा ॥  
 अस कहि अति सकुचे रघुराऊ। मुनि पुलके लखि सीलु सुभाऊ ॥  
 तुम्ह बिनु राम सकल सुख साजा। नरक सरिस दुहु राज समाजा ॥

दो. प्रान प्रान के जीव के जिव सुख के सुख राम।

तुम्ह तजि तात सोहात गृह जिन्हहि तिन्हहिं बिधि बाम ॥ २९० ॥

सो सुखु करमु धरमु जरि जाऊ। जहँ न राम पद पंकज भाऊ ॥  
जोगु कुजोगु ग्यानु अग्यानु। जहँ नहिं राम पेम परधानू ॥  
तुम्ह बिनु दुखी सुखी तुम्ह तेहीं। तुम्ह जानहु जिय जो जेहि केहीं ॥  
राउर आयसु सिर सबही कें। बिदित कृपालहि गति सब नीकें ॥  
आपु आश्रमहि धारिअ पाऊ। भयउ सनेह सिथिल मुनिराऊ ॥  
करि प्रनाम तब रामु सिधाए। रिषि धरि धीर जनक पहिं आए ॥  
राम बचन गुरु नृपहि सुनाए। सील सनेह सुभायँ सुहाए ॥  
महाराज अब कीजिअ सोई। सब कर धरम सहित हित होई।

दो. ग्यान निधान सुजान सुचि धरम धीर नरपाल।

तुम्ह बिनु असमंजस समन को समरथ एहि काल ॥ २९१ ॥

सुनि मुनि बचन जनक अनुरागे। लखि गति ग्यानु विरागु विरागे ॥  
सिथिल सनेहँ गुनत मन माहीं। आए इहाँ कीन्ह भल नाही ॥  
रामहि रायँ कहेउ बन जाना। कीन्ह आपु प्रिय प्रेम प्रवाना ॥  
हम अब बन तें बनहि पठाई। प्रमुदित फिरब बिबेक बडाई ॥  
तापस मुनि महिसुर सुनि देखी। भए प्रेम बस बिकल बिसेषी ॥  
समउ समुझि धरि धीरजु राजा। चले भरत पहिं सहित समाजा ॥  
भरत आइ आगें भइ लीन्हे। अवसर सरिस सुआसन दीन्हे ॥  
तात भरत कह तेरहुति राऊ। तुम्हहि बिदित रघुवीर सुभाऊ ॥

दो. राम सत्यव्रत धरम रत सब कर सीलु सनेहु ॥

संकट सहत सकोच बस कहिअ जो आयसु देहु ॥ २९२ ॥

सुनि तन पुलकि नयन भरि बारी। बोले भरतु धीर धरि भारी ॥  
प्रभु प्रिय पूज्य पिता सम आपू। कुलगुरु सम हित माय न बापू ॥  
कौसिकादि मुनि सचिव समाजू। ग्यान अंबुनिधि आपुनु आजू ॥  
सिसु सेवक आयसु अनुगामी। जानि मोहि सिख देइअ स्वामी ॥  
एहिं समाज थल बूझब राउर। मौन मलिन मैं बोलब बाउर ॥  
छोटे बदन कहउँ बडि बाता। छमब तात लखि वाम बिधाता ॥  
आगम निगम प्रसिद्ध पुराना। सेवाधरमु कठिन जगु जाना ॥  
स्वामि धरम स्वारथहि विरोधू। बैरु अंध प्रेमहि न प्रबोधू ॥

दो. राखि राम रुख धरमु ब्रतु पराधीन मोहि जानि।

सब कें संमत सर्व हित करिअ पेमु पहिचानि ॥ २९३ ॥

भरत बचन सुनि देखि सुभाऊ। सहित समाज सराहत राऊ ॥  
सुगम अगम मृदु मंजु कठोरे। अरथु अमित अति आखर थोरे ॥  
ज्यौ मुख मुकुर मुकुरु निज पानी। गहि न जाइ अस अदभुत बानी ॥  
भूप भरत मुनि सहित समाजू। गे जहँ बिबुध कुमुद द्विजराजू ॥  
सुनि सुधि सोच विकल सब लोगा। मनहुँ मीनगन नव जल जोगा ॥  
देवँ प्रथम कुलगुर गति देखी। निरखि बिदेह सनेह बिसेषी ॥  
राम भगतिमय भरतु निहारे। सुर स्वारथी हहरि हियँ हारे ॥  
सब कोउ राम पेममय पेखा। भउ अलेख सोच बस लेखा ॥

दो. रामु सनेह सकोच बस कह ससोच सुरराज।

रचहु प्रपंचहि पंच मिलि नाहि त भयउ अकाजु ॥ २९४ ॥

सुरन्ह सुमिरि सारदा सराही। देवि देव सरनागत पाही ॥  
फेरि भरत मति करि निज माया। पालु बिबुध कुल करि छल छाया ॥  
बिबुध बिनय सुनि देवि सयानी। बोली सुर स्वारथ जड जानी ॥  
मो सन कहहु भरत मति फेरू। लोचन सहस न सझ सुमेरू ॥  
बिधि हरि हर माया बडि भारी। सोउ न भरत मति सकइ निहारी ॥  
सो मति मोहि कहत करु भोरी। चंदिनि कर कि चंडकर चोरी ॥  
भरत हृदयँ सिय राम निवासू। तहँ कि तिमिर जहँ तरनि प्रकासू ॥  
अस कहि सारद गइ बिधि लोका। बिबुध विकल निसि मानहुँ कोका ॥

दो. सुर स्वारथी मलीन मन कीन्ह कुमंत्र कुठाटु ॥

रचि प्रपंच माया प्रबल भय भ्रम अरति उचाटु ॥ २९५ ॥

करि कुचालि सोचत सुरराजू। भरत हाथ सबु काजु अकाजू ॥  
गए जनकु रघुनाथ समीपा। सनमाने सब रबिकुल दीपा ॥  
समय समाज धरम अबिरोधा। बोले तब रघुवंस पुरोधा ॥  
जनक भरत संबाहु सुनाई। भरत कहाउति कही सुहाई ॥  
तात राम जस आयसु देहू। सो सबु करै मोर मत प्हू ॥  
सुनि रघुनाथ जोरि जुग पानी। बोले सत्य सरल मृदु बानी ॥  
बिद्यमान आपुनि मिथिलेसू। मोर कहब सब भाँति भदेसू ॥  
राउर राय रजायसु होई। राउरि सपथ सही सिर सोई ॥

दो. राम सपथ सुनि मुनि जनकु सकुचे सभा समेत।

सकल बिलोकत भरत मुखु बनइ न उतरु देत ॥ २९६ ॥

सभा सकुच बस भरत निहारी। रामबंधु धरि धीरजु भारी ॥  
 कुसमउ देखि सनेहु सँभारा। बढत बिधि जिमि घटज निवारा ॥  
 सोक कनकलोचन मति छोनी। हरी बिमल गुन गन जगजोनी ॥  
 भरत बिबेक बराहँ बिसाला। अनायास उधरी तेहि काला ॥  
 करि प्रनामु सब कहँ कर जोरे। रामु राउ गुर साधु निहोरे ॥  
 छमव आजु अति अनुचित मोरा। कहउँ बदन मूदु बचन कठोरा ॥  
 हियँ सुमिरी सारदा सुहाई। मानस तें मुख पंकज आई ॥  
 बिमल बिबेक धरम नय साली। भरत भारती मंजु मराली ॥

दो. निरखि बिबेक बिलोचनन्हि सिथिल सनेहँ समाजु।

करि प्रनामु बोले भरतु सुमिरि सीय रघुराजु ॥ २९७ ॥

प्रभु पितु मातु सुहृद गुर स्वामी। पूज्य परम हित अंतरजामी ॥  
 सरल सुसाहिबु सील निधानू। प्रनतपाल सर्वग्य सुजानू ॥  
 समरथ सरनागत हितकारी। गुनगाहकु अवगुन अघ हारी ॥  
 स्वामि गोसाँइहि सरिस गोसाई। मोहि समान मैं साईँ दोहाई ॥  
 प्रभु पितु बचन मोह बस पेली। आयउँ इहाँ समाजु सकेली ॥  
 जग भल पोच ऊँच अरु नीचू। अमिअ अमरपद माहुरु मीचू ॥  
 राम रजाइ मेट मन माहीं। देखा सुना कतहुँ कोउ नाहीं ॥  
 सो मैं सब बिधि कीन्हि ढिठाई। प्रभु मानी सनेह सेवकाई ॥

दो. कृपाँ भलाई आपनी नाथ कीन्ह भल मोर।

दूषन भे भूषन सरिस सुजसु चारु चहु ओर ॥ २९८ ॥

राउरि रीति सुबानि बडाई। जगत बिदित निगमागम गाई ॥  
 कूर कुटिल खल कुमति कलंकी। नीच निसील निरीस निसंकी ॥  
 तेउ सुनि सरन सामुहें आए। सकृत प्रनामु किहें अपनाए ॥  
 देखि दोष कबहुँ न उर आने। सुनि गुन साधु समाज बखाने ॥  
 को साहिब सेवकहि नेवाजी। आपु समाज साज सब साजी ॥  
 निज करतूति न समुझिअ सपनें। सेवक सकुच सोचु उर अपनें ॥  
 सो गोसाईँ नहि दूसर कोपी। भुजा उठाइ कहउँ पन रोपी ॥  
 पसु नाचत सुक पाठ प्रवीना। गुन गति नट पाठक आधीना ॥

दो. यों सुधारि सनमानि जन किए साधु सिरमोर।

को कृपाल विनु पालिहै बिरिदावलि बरजोर ॥ २९९ ॥

सोक सनेहँ कि बाल सुभाएँ। आयउँ लाइ रजायसु बाएँ ॥  
 तबहुँ कृपाल हेरि निज ओरा। सबहि भाँति भल मानेउ मोरा ॥  
 देखेउँ पाय सुमंगल मूला। जानेउँ स्वामि सहज अनुकूला ॥  
 बडेँ समाज बिलोकेउँ भागू। बडीँ चूक साहिब अनुरागू ॥  
 कृपा अनुग्रह अंगु अघाई। कीन्हि कृपानिधि सब अधिकाई ॥  
 राखा मोर दुलार गोसाई। अपनेँ सील सुभायँ भलाई ॥  
 नाथ निपट मैँ कीन्हि ढिठाई। स्वामि समाज सकोच बिहाई ॥  
 अबिनय बिनय जथारुचि बानी। छमिहि देउ अति आरति जानी ॥

दो. सुहृद सुजान सुसाहिबहि बहुत कहब बडि खोरि।

आयसु देइअ देव अब सबइ सुधारी मोरि ॥ ३०० ॥

प्रभु पद पदुम पराग दोहाई। सत्य सुकृत सुख सीवँ सुहाई ॥  
 सो करि कहउँ हिए अपने की। रुचि जागत सोवत सपने की ॥  
 सहज सनेहँ स्वामि सेवकाई। स्वारथ छल फल चारि बिहाई ॥  
 अग्या सम न सुसाहिब सेवा। सो प्रसादु जन पावै देवा ॥  
 अस कहि प्रेम बिबस भए भारी। पुलक सरीर बिलोचन बारी ॥  
 प्रभु पद कमल गहे अकुलाई। समउ सनेहु न सो कहि जाई ॥  
 कृपासिंधु सनमानि सुबानी। बैठाए समीप गहि पानी ॥  
 भरत बिनय सुनि देखि सुभाऊ। सिथिल सनेहँ सभा रघुराऊ ॥

छं. रघुराउ सिथिल सनेहँ साधु समाज मुनि मिथिला धनी।

मन महुँ सराहत भरत भायप भगति की महिमा घनी ॥

भरतहि प्रसंसत बिबुध बरषत सुमन मानस मलिन से।

तुलसी बिकल सब लोग सुनि सकुचे निसागम नलिन से ॥

सो. देखि दुखारी दीन दुहु समाज नर नारि सब।

मघवा महा मलीन मुए मारि मंगल चहत ॥ ३०१ ॥

कपट कुचालि सीवँ सुरराजू। पर अकाज प्रिय आपन काजू ॥  
 काक समान पाकरिपु रीती। छली मलीन कतहुँ न प्रतीती ॥  
 प्रथम कुमत करि कपटु सँकला। सो उचाटु सब कें सिर मेला ॥  
 सुरमायाँ सब लोग बिमोहे। राम प्रेम अतिसय न बिछोहे ॥  
 भय उचाट बस मन थिर नाहीं। छन बन रुचि छन सदन सोहाहीं ॥

दुविध मनोगति प्रजा दुखारी। सरित सिंधु संगम जनु बारी ॥  
दुचित कतहुँ परितोषु न लहहीं। एक एक सन मरमु न कहहीं ॥  
लखि हियँ हँसि कह कृपानिधानू। सरिस स्वान मघवान जुबानू ॥

दो. भरतु जनकु मुनिजन सचिव साधु सचेत बिहाइ।

लागि देवमाया सबहि जथाजोगु जनु पाइ ॥ ३०२ ॥

कृपासिंधु लखि लोग दुखारे। निज सनेहँ सुरपति छल भारे ॥  
सभा राउ गुर महिसुर मंत्री। भरत भगति सब कै मति जंत्री ॥  
रामहि चितवत चित्र लिखे से। सकुचत बोलत बचन सिखे से ॥  
भरत प्रीति नति बिनय बडाई। सुनत सुखद बरनत कठिनाई ॥  
जासु बिलोकि भगति लवलेसू। प्रेम मगन मुनिगन मिथिलेसू ॥  
महिमा तासु कहै किमि तुलसी। भगति सुभायँ सुमति हियँ हुलसी ॥  
आपु छोटि महिमा बडि जानी। कबिकुल कानि मानि सकुचानी ॥  
कहि न सकति गुन रुचि अधिकाई। मति गति बाल बचन की नाई ॥

दो. भरत बिमल जसु बिमल विधु सुमति चकोरकुमारि।

उदित बिमल जन हृदय नभ एकटक रही निहारि ॥ ३०३ ॥

भरत सुभाउ न सुगम निगमहूँ। लघु मति चापलता कवि छमहूँ ॥  
कहत सुनत सति भाउ भरत को। सीय राम पद होइ न रत को ॥  
सुमिरत भरतहि प्रेमु राम को। जेहि न सुलभ तेहि सरिस बाम को ॥  
देखि दयाल दसा सबही की। राम सुजान जानि जन जी की ॥  
धरम धुरीन धीर नय नागर। सत्य सनेह सील सुख सागर ॥  
देसु काल लखि समउ समाजू। नीति प्रीति पालक रघुराजू ॥  
बोले बचन बानि सरबसु से। हित परिनाम सुनत ससि रसु से ॥  
तात भरत तुम्ह धरम धुरीना। लोक वेद विद प्रेम प्रवीना ॥

दो. करम बचन मानस बिमल तुम्ह समान तुम्ह तात।

गुर समाज लघु बंधु गुन कुसमयँ किमि कहि जात ॥ ३०४ ॥

जानहु तात तरनि कुल रीती। सत्यसंध पितु कीरति प्रीती ॥  
समउ समाजु लाज गुरुजन की। उदासीन हित अनहित मन की ॥  
तुम्हहि विदित सबही कर करमू। आपन मोर परम हित धरमू ॥  
मोहि सब भाँति भरोस तुम्हारा। तदपि कहउँ अवसर अनुसार ॥  
तात तात बिनु बात हमारी। केवल गुरुकुल कृपाँ सँभारी ॥

नतरु प्रजा परिजन परिवारू। हमहि सहित सबु होत खुआरू ॥  
जौं बिनु अवसर अथवँ दिनेसू। जग केहि कहहु न होइ कलेसू ॥  
तस उतपातु तात बिधि कीन्हा। मुनि मिथिलेस राखि सबु लीन्हा ॥

दो. राज काज सब लाज पति धरम धरनि धन धाम।

गुर प्रभाउ पालिहि सबहि भल होइहि परिनाम ॥ ३०५ ॥

सहित समाज तुम्हार हमारा। घर बन गुर प्रसाद रखवारा ॥  
मातु पिता गुर स्वामि निदेसू। सकल धरम धरनीधर सेसू ॥  
सो तुम्ह करहु करावहु मोहू। तात तरनिकुल पालक होहू ॥  
साधक एक सकल सिधि देनी। कीरति सुगति भूतिमय बेनी ॥  
सो बिचारि सहि संकटु भारी। करहु प्रजा परिवारु सुखारी ॥  
बाँटी बिपति सबहिं मोहि भाई। तुम्हहि अवधि भरि बडि कठिनाई ॥  
जानि तुम्हहि मृदु कहउँ कठोरा। कुसमयँ तात न अनुचित मोरा ॥  
होहि कुठायँ सुबंधु सुहाए। ओडिअहि हाथ असनिहु के घाए ॥

दो. सेवक कर पद नयन से मुख सो साहिबु होइ।

तुलसी प्रीति कि रीति सुनि सुकवि सराहहिं सोइ ॥ ३०६ ॥

सभा सकल सुनि रघुवर बानी। प्रेम पयोधि अमिअ जनु सानी ॥  
सिथिल समाज सनेह समाधी। देखि दसा चुप सारद साधी ॥  
भरतहि भयउ परम संतोषू। सनमुख स्वामि बिमुख दुख दोषू ॥  
मुख प्रसन्न मन मिटा बिषादू। भा जनु गूँगेहि गिरा प्रसादू ॥  
कीन्ह सप्रेम प्रनामु बहोरी। बोले पानि पंकरुह जोरी ॥  
नाथ भयउ सुखु साथ गए को। लहेउँ लाहु जग जनमु भए को ॥  
अब कृपाल जस आयसु होई। करौं सीस धरि सादर सोई ॥  
सो अवलंब देव मोहि देई। अवधि पारु पावौं जेहि सेई ॥

दो. देव देव अभिषेक हित गुर अनुसासनु पाइ।

आनेउँ सब तीरथ सलिलु तेहि कहँ काह रजाइ ॥ ३०७ ॥

एकु मनोरथु बड मन माहीं। सभयँ सकोच जात कहि नाही ॥  
कहहु तात प्रभु आयसु पाई। बोले बानि सनेह सुहाई ॥  
चित्रकूट सुचि थल तीरथ बन। खग मृग सर सरि निर्झर गिरिगन ॥  
प्रभु पद अंकित अवनि बिसेषी। आयसु होइ त आवौं देखी ॥  
अवसि अत्रि आयसु सिर धरहू। तात बिगतभय कानन चरहू ॥

मुनि प्रसाद बनु मंगल दाता। पावन परम सुहावन भ्राता ॥  
रिषिनायकु जहँ आयसु देहीं। राखेहु तीरथ जलु थल तेहीं ॥  
सुनि प्रभु बचन भरत सुख पावा। मुनि पद कमल मुदित सिरु नावा ॥

दो. भरत राम संबादु सुनि सकल सुमंगल मूल।

सुर स्वारथी सराहि कुल बरषत सुरतरु फूल ॥ ३०८ ॥

धन्य भरत जय राम गोसाईं। कहत देव हरषत बरिआई।  
मुनि मिथिलेस सभौं सब काहू। भरत बचन सुनि भयउ उछाहू ॥  
भरत राम गुन ग्राम सनेहू। पुलकि प्रसंसत राउ बिदेहू ॥  
सेवक स्वामि सुभाउ सुहावन। नेमु पेमु अति पावन पावन ॥  
मति अनुसार सराहन लागे। सचिव सभासद सब अनुरागे ॥  
सुनि सुनि राम भरत संबादू। दुहु समाज हियँ हरषु बिषादू ॥  
राम मातु दुखु सुखु सम जानी। कहि गुन राम प्रबोधी रानी ॥  
एक कहहिं रघुवीर बडाई। एक सराहत भरत भलाई ॥

दो. अत्रि कहेउ तब भरत सन सैल समीप सुकूप।

राखिअ तीरथ तोय तहँ पावन अमिअ अनूप ॥ ३०९ ॥

भरत अत्रि अनुसासन पाई। जल भाजन सब दिए चलाई ॥  
सानुज आपु अत्रि मुनि साधू। सहित गए जहँ कूप अगाधू ॥  
पावन पाथ पुन्यथल राखा। प्रमुदित प्रेम अत्रि अस भाषा ॥  
तात अनादि सिद्ध थल पहू। लोपेउ काल बिदित नहिं केहू ॥  
तब सेवकन्ह सरस थलु देखा। किन्ह सुजल हित कूप बिसेषा ॥  
विधि बस भयउ बिस्व उपकारू। सुगम अगम अति धरम विचारू ॥  
भरतकूप अब कहिहहिं लोगा। अति पावन तीरथ जल जोगा ॥  
प्रेम सनेम निमज्जत प्राणी। होइहहिं बिमल करम मन बानी ॥

दो. कहत कूप महिमा सकल गए जहाँ रघुराउ।

अत्रि सुनायउ रघुवरहि तीरथ पुन्य प्रभाउ ॥ ३१० ॥

कहत धरम इतिहास सप्रीती। भयउ भोरु निसि सो सुख बीती ॥  
नित्य निबाहि भरत दोउ भाई। राम अत्रि गुर आयसु पाई ॥  
सहित समाज साज सब सादें। चले राम बन अटन पयादें ॥  
कोमल चरन चलत बिनु पनहीं। भइ मृदु भूमि सकुचि मन मनहीं ॥  
कुस कंटक काँकरीं कुराई। कटुक कठोर कुवस्तु दुराई ॥

महि मंजुल मृदु मारग कीन्हे। बहत समीर त्रिबिध सुख लीन्हे ॥  
सुमन बरषि सुर घन करि छाहीं। बिटप फूलि फलि तृन मृदुताहीं ॥  
मृग बिलोकि खग बोलि सुबानी। सेवहिं सकल राम प्रिय जानी ॥

दो. सुलभ सिद्धि सब प्राकृतहु राम कहत जमुहात।

राम प्रान प्रिय भरत कहुं यह न होइ बडि बात ॥ ३११ ॥

एहि विधि भरतु फिरत बन माहीं। नेमु प्रेमु लखि मुनि सकुचाहीं ॥  
पुन्य जलाश्रय भूमि बिभागा। खग मृग तरु तृन गिरि बन बागा ॥  
चारु बिचित्र पवित्र बिसेषी। बूझत भरतु दिव्य सब देखी ॥  
सुनि मन मुदित कहत रिषिराऊ। हेतु नाम गुन पुन्य प्रभाऊ ॥  
कतहुं निमज्जन कतहुं प्रनामा। कतहुं बिलोकत मन अभिरामा ॥  
कतहुं बैठि मुनि आयसु पाई। सुमिरत सीय सहित दोउ भाई ॥  
देखि सुभाउ सनेहु सुसेवा। देहिं असीस मुदित बनदेवा ॥  
फिरहिं गएँ दिनु पहर अढाई। प्रभु पद कमल बिलोकहिं आई ॥

दो. देखे थल तीरथ सकल भरत पाँच दिन माझ।

कहत सुनत हरि हर सुजसु गयउ दिवसु भइ साँझ ॥ ३१२ ॥

भोर न्हाइ सबु जुरा समाजू। भरत भूमिसुर तेरहुति राजू ॥  
भल दिन आजु जानि मन माहीं। रामु कृपाल कहत सकुचाहीं ॥  
गुर नृप भरत सभा अवलोकी। सकुचि राम फिरि अवनि बिलोकी ॥  
सील सराहि सभा सब सोची। कहुं न राम सम स्वामि सँकोची ॥  
भरत सुजान राम रुख देखी। उठि सप्रेम धरि धीर बिसेषी ॥  
करि दंडवत कहत कर जोरी। राखीं नाथ सकल रुचि मोरी ॥  
मोहि लागि सहेउ सबहिं संतापू। बहुत भाँति दुखु पावा आपू ॥  
अब गोसाईं मोहि देउ रजाई। सेवौं अवघ अवधि भरि जाई ॥

दो. जेहि उपाय पुनि पाय जनु देखै दीनदयाल।

सो सिख देइअ अवधि लागि कोसलपाल कृपाल ॥ ३१३ ॥

पुरजन परिजन प्रजा गोसाईं। सब सुचि सरस सनेहँ सगाईं ॥  
राउर बदि भल भव दुख दाहू। प्रभु विनु बादि परम पद लाहू ॥  
स्वामि सुजानु जानि सब ही की। रुचि लालसा रहनि जन जी की ॥  
प्रनतपालु पालिहि सब काहू। देउ दुहू दिसि ओर निबाहू ॥  
अस मोहि सब बिधि भूरि भरोसो। किएँ विचारु न सोचु खरो सो ॥

आरति मोर नाथ कर छोहू। दुहूँ मिलि कीन्ह ढीठु हठि मोहू ॥  
यह बड दोषु दूरि करि स्वामी। तजि सकोच सिखइअ अनुगामी ॥  
भरत बिनय सुनि सबहिँ प्रसंसी। खीर नीर बिबरन गति हंसी ॥

दो. दीनबंधु सुनि बंधु के बचन दीन छलहीन।

देस काल अवसर सरिस बोले रामु प्रवीन ॥ ३१४ ॥

तात तुम्हारि मोरि परिजन की। चिंता गुरहि नृपहि घर बन की ॥  
माथे पर गुर मुनि मिथिलेसू। हमहि तुम्हहि सपनेहुँ न कलेसू ॥  
मोर तुम्हार परम पुरुषारथु। स्वारथु सुजसु धरमु परमारथु ॥  
पितु आयसु पालिहिँ दुहु भाई। लोक बेद भल भूप भलाई ॥  
गुर पितु मातु स्वामि सिख पालें। चलेहुँ कुमग पग परहिँ न खालें ॥  
अस बिचारि सब सोच बिहाई। पालहु अवध अवधि भरि जाई ॥  
देसु कोसु परिजन परिवारू। गुर पद रजहिँ लाग छरुभारू ॥  
तुम्ह मुनि मातु सचिव सिख मानी। पालेहु पुहुमि प्रजा रजधानी ॥

दो. मुखिआ मुखु सो चाहिए खान पान कहूँ एक।

पालइ पोषइ सकल अँग तुलसी सहित बिबेक ॥ ३१५ ॥

राजधरम सरबसु एतनोई। जिमि मन माहूँ मनोरथ गोई ॥  
बंधु प्रबोधु कीन्ह बहु भाँती। विनु अधार मन तोषु न साँती ॥  
भरत सील गुर सचिव समाजू। सकुच सनेह बिबस रघुराजू ॥  
प्रभु करि कृपा पाँवरीं दीन्हीं। सादर भरत सीस धरि लीन्हीं ॥  
चरनपीठ करुनानिधान के। जनु जुग जामिक प्रजा प्रान के ॥  
संपुट भरत सनेह रतन के। आखर जुग जुन जीव जतन के ॥  
कुल कपाट कर कुसल करम के। विमल नयन सेवा सुधरम के ॥  
भरत मुदित अवलंब लहे तें। अस सुख जस सिय रामु रहे तें ॥

दो. मागेउ बिदा प्रनामु करि राम लिए उर लाइ।

लोग उचाटे अमरपति कुटिल कुअवसरु पाइ ॥ ३१६ ॥

सो कुचालि सब कहूँ भइ नीकी। अवधि आस सम जीवनि जी की ॥  
नतरु लखन सिय सम बियोगा। हहरि मरत सब लोग कुरोगा ॥  
रामकृपाँ अवरेब सुधारी। विबुध धारि भइ गुनद गोहारी ॥  
भेंटत भुज भरि भाइ भरत सो। राम प्रेम रसु कहि न परत सो ॥  
तन मन बचन उमग अनुरागा। धीर धुरंधर धीरजु त्यागा ॥

बारिज लोचन मोचत बारी। देखि दसा सुर सभा दुखारी ॥  
मुनिगन गुर धुर धीर जनक से। ग्यान अनल मन कसें कनक से ॥  
जे विरंचि निरलेप उपाए। पदुम पत्र जिमि जग जल जाए ॥

दो. तेउ बिलोकि रघुबर भरत प्रीति अनूप अपार।

भए मगन मन तन बचन सहित विराग बिचार ॥ ३१७ ॥

जहाँ जनक गुर मति भोरी। प्राकृत प्रीति कहत बडि खोरी ॥  
बरनत रघुबर भरत बियोगू। सुनि कठोर कबि जानिहि लोगू ॥  
सो सकोच रसु अकथ सुबानी। समउ सनेहु सुमिरि सकुचानी ॥  
भैंटे भरत रघुबर समुझाए। पुनि रिपुदवनु हरषि हियँ लाए ॥  
सेवक सचिव भरत रुख पाई। निज निज काज लगे सब जाई ॥  
सुनि दारुन दुखु दुहँ समाजा। लगे चलन के साजन साजा ॥  
प्रभु पद पदुम बंदि दोउ भाई। चले सीस धरि राम रजाई ॥  
मुनि तापस बनदेव निहोरी। सब सनमानि बहोरि बहोरी ॥

दो. लखनहि भैंटे प्रनामु करि सिर धरि सिय पद धूरि।

चले सप्रेम असीस सुनि सकल सुमंगल मूरि ॥ ३१८ ॥

सानुज राम नृपहि सिर नाई। कीन्हि बहुत विधि बिनय बडाई ॥  
देव दया बस बड दुखु पायउ। सहित समाज काननहि आयउ ॥  
पुर पगु धारिअ देइ असीसा। कीन्ह धीर धरि गवनु महीसा ॥  
मुनि महिदेव साधु सनमाने। बिदा किए हरि हर सम जाने ॥  
सासु समीप गए दोउ भाई। फिरे बंदि पग आसिष पाई ॥  
कौसिक बामदेव जाबाली। पुरजन परिजन सचिव सुचाली ॥  
जथा जोगु करि बिनय प्रनामा। बिदा किए सब सानुज रामा ॥  
नारि पुरुष लघु मध्य बडेरें। सब सनमानि कृपानिधि फेरे ॥

दो. भरत मातु पद बंदि प्रभु सुचि सनेहँ मिलि भैंटे।

बिदा कीन्ह सजि पालकी सकुच सोच सब मेटि ॥ ३१९ ॥

परिजन मातु पितहि मिलि सीता। फिरी प्रानप्रिय प्रेम पुनीता ॥  
करि प्रनामु भैंटी सब सासू। प्रीति कहत कबि हियँ न हुलासू ॥  
सुनि सिख अबिमत आसिष पाई। रही सीय दुहु प्रीति समाई ॥  
रघुपति पटु पालकी मगाई। करि प्रबोधु सब मातु चढाई ॥  
बार बार हिलि मिलि दुहु भाई। सम सनेहँ जननी पहुँचाई ॥

साजि बाजि गज बाहन नाना। भरत भूप दल कीन्ह पयाना ॥  
हृदयँ रामु सिय लखन समेता। चले जाहिँ सब लोग अचेता ॥  
बसह बाजि गज पसु हियँ हारें। चले जाहिँ परबस मन मारें ॥

दो. गुर गुरतिय पद बंदि प्रभु सीता लखन समेत।

फिरे हरष बिसमय सहित आए परन निकेत ॥ ३२० ॥

बिदा कीन्ह सनमानि निषादू। चलेउ हृदयँ बड बिरह बिषादू ॥  
कोल किरात भिल्ल बनचारी। फेरे फिरे जोहारि जोहारी ॥  
प्रभु सिय लखन बैठि बट छाहीं। प्रिय परिजन बियोग बिलखाहीं ॥  
भरत सनेह सुभाउ सुबानी। प्रिया अनुज सन कहत बखानी ॥  
प्रीति प्रतीति बचन मन करनी। श्रीमुख राम प्रेम बस बरनी ॥  
तेहि अवसर खग मृग जल मीना। चित्रकूट चर अचर मलीना ॥  
बिबुध बिलोकि दसा रघुबर की। बरषि सुमन कहि गति घर घर की ॥  
प्रभु प्रनामु करि दीन्ह भरोसो। चले मुदित मन डर न खरो सो ॥

दो. सानुज सीय समेत प्रभु राजत परन कुटीर।

भगति ग्यानु बैराग्य जनु सोहत धरें सरिर ॥ ३२१ ॥

मुनि महिसुर गुर भरत भुआलू। राम बिरहँ सबु साजु बिहालू ॥  
प्रभु गुन ग्राम गनत मन माहीं। सब चुपचाप चले मग जाहीं ॥  
जमुना उतरि पार सबु भयऊ। सो बासरु बिनु भोजन गयऊ ॥  
उतरि देवसरि दूसर बासू। रामसखाँ सब कीन्ह सुपासू ॥  
सई उतरि गोमतीं नहाए। चौथें दिवस अवधपुर आए।  
जनकु रहे पुर बासर चारी। राज काज सब साज सँभारी ॥  
सौँपि सचिव गुर भरतहि राजू। तेरहुति चले साजि सबु साजू ॥  
नगर नारि नर गुर सिख मानी। बसे सुखेन राम रजधानी ॥

दो. राम दरस लागि लोग सब करत नेम उपबास।

तजि तजि भूषन भोग सुख जिअत अवधि कीं आस ॥ ३२२ ॥

सचिव सुसेवक भरत प्रबोधे। निज निज काज पाइ पाइ सिख ओधे ॥  
पुनि सिख दीन्ह बोलि लघु भाई। सौँपी सकल मातु सेवकाई ॥  
भूसुर बोलि भरत कर जोरे। करि प्रनाम बय बिनय निहोरे ॥  
ऊँच नीच कारजु भल पोचू। आयसु देब न करब सँकोचू ॥  
परिजन पुरजन प्रजा बोलाए। समाधानु करि सुबस बसाए ॥

सानुज गे गुर गेहँ बहोरी। करि दंडवत कहत कर जोरी ॥  
आयसु होइ त रहौँ सनेमा। बोले मुनि तन पुलकि सपेमा ॥  
समुझव कहब करब तुम्ह जोई। धरम सारु जग होइहि सोई ॥

दो. सुनि सिख पाइ असीस बडि गनक बोलि दिनु साधि।  
सिंघासन प्रभु पादुका बैठारे निरुपाधि ॥ ३२३ ॥

राम मातु गुर पद सिरु नाई। प्रभु पद पीठ रजायसु पाई ॥  
नंदिगावँ करि परन कुटीरा। कीन्ह निवासु धरम धुर धीरा ॥  
जटाजूट सिर मुनिपट धारी। महि खनि कुस साँथरी सँवारी ॥  
असन बसन बासन व्रत नेमा। करत कठिन रिषिधरम सप्रेमा ॥  
भूषन बसन भोग सुख भूरी। मन तन बचन तजे तिन तूरी ॥  
अवध राजु सुर राजु सिहाई। दसरथ धनु सुनि धनु लजाई ॥  
तेहिँ पुर बसत भरत बिनु रागा। चंचरीक जिमि चंपक बागा ॥  
रमा बिलासु राम अनुरागी। तजत बमन जिमि जन बडभागी ॥

दो. राम पेम भाजन भरतु बडे न एहिँ करतूति।

चातक हंस सराहिअत टेंक बिबेक बिभूति ॥ ३२४ ॥

देह दिनहुँ दिन दूबरि होई। घटइ तेजु बलु मुखछवि सोई ॥  
नित नव राम प्रेम पनु पीना। बढत धरम दलु मनु न मलीना ॥  
जिमि जलु निघटत सरद प्रकासे। बिलसत बेतस बनज बिकासे ॥  
सम दम संजम नियम उपासा। नखत भरत हिय बिमल अकासा ॥  
ध्रुव बिस्वास अवधि राका सी। स्वामि सुरति सुरवीथि बिकासी ॥  
राम पेम बिधु अचल अदोषा। सहित समाज सोह नित चोखा ॥  
भरत रहनि समुझनि करतूती। भगति बिरति गुन बिमल बिभूती ॥  
बरनत सकल सुकचि सकुचाहीं। सेस गनेस गिरा गमु नाहीं ॥

दो. नित पूजत प्रभु पाँवरी प्रीति न हृदयँ समाति ॥

मागि मागि आयसु करत राज काज बहु भाँति ॥ ३२५ ॥

पुलक गात हियँ सिय रघुबीरू। जीह नामु जप लोचन नीरू ॥  
लखन राम सिय कानन बसहीं। भरतु भवन बसि तप तनु कसहीं ॥  
दोउ दिसि समुझि कहत सबु लोगू। सब बिधि भरत सराहन जोगू ॥  
सुनि व्रत नेम साधु सकुचाहीं। देखि दसा मुनिराज लजाहीं ॥  
परम पुनीत भरत आचरनू। मधुर मंजु मुद मंगल करनू ॥

हरन कठिन कलि कलुष कलेसू। महामोह निसि दलन दिनेसू ॥  
पाप पुंज कुंजर मृगराजू। समन सकल संताप समाजू।  
जन रंजन भंजन भव भारू। राम सनेह सुधाकर सारू ॥

छं. सिय राम प्रेम पियूष पूरन होत जनमु न भरत को।  
मुनि मन अगम जम नियम सम दम बिषम व्रत आचरत को ॥  
दुख दाह दारिद दंभ दूषन सुजस मिस अपहरत को।  
कलिकाल तुलसी से सठन्हि हठि राम सनमुख करत को ॥

सो. भरत चरित करि नेमु तुलसी जो सादर सुनहिं।  
सीय राम पद पेमु अवसि होइ भव रस विरति ॥ ३२६ ॥

मासपारायण, इक्कीसवाँ विश्राम  
इति श्रीमद्रामचरितमानसे सकलकलिकलुषविध्वंसने  
द्वितीयः सोपानः समाप्तः।

-----  
(अयोध्याकाण्ड समाप्त)

---

—o—o—o—o—o—  
*Shri Ram Charit Manas*

pdf was typeset on February 13, 2024

—o—o—o—o—o—

Please send corrections to [sanskrit@cheerful.com](mailto:sanskrit@cheerful.com)

